

ՀՆԴԿԱՆՐԱԿԱՆ ԵԿԵՂԵՑՈՒՄ ՀԱՅՐԵՐ

Բ

Ս. ԳՐԻԳՈՐ ՆՅՈՒՍԱՅԻ



ԸՆԴՀԱՆՐԱԿԱՆ ԵԿԵՂԵՑՈՒ ՀԱՅՐԵՐ

Բ

ՀՐԱՄԱՆԱՒ

Ն.Ա.Օ.Տ.Տ. ԳԱՐԵԳԻՆԻ ԵՐԿՐՈՐԴԻ

ՍՐԲԱՁՆԱԳՈՅՆ ԵՒ ՎԵՀԱՓԱՌ
ԿԱԹՈՂԻԿՈՍԻ ԱՄԵՆԱՅՆ ՀԱՅՈՑ

ՍՈՒՐԲ ԳՐԻԳՈՐ ՆՅՈՒՍԱՅԻ

ՔՐԻՍՈՆԵԱԿԱՆ



Ա. ԷԶՄԻԱԾԻՆ - 2007

ՆԱԽԱԲԱՆ

Թարգմ. Փրանսերենից՝
Պարզև Շահրապյանի

Ա. ԳՐԻԳՈՐ ՆՅՈՒՍԱՑԻ

Ս – 970 Քրիստոնեական: - Էջմիածին: Մայր Աթոռ Սուրբ Էջմիածին, 2007.- 144 էշ:

ԳՄԴ 86.37

Տպագրվում է մեկենասությամբ՝

.....

ISBN 978-99930-75-52-3 © Մայր Աթոռ Սուրբ Էջմիածին, 2007 թ.

Ղնդիանրական եկեղեցու նշանավոր հայրապետներից, որոնք հայտնի են «Երկոտասան Վարդապետք» անունով: Սերել է քրիստոնեական բարեպաշտությամբ, կենցաղավարությամբ և առաքինությամբ հոչակված մեծահարուստ և ազնվական ընտանիքից: Բարսեղ Կեսարացու կրտսեր եղբայրը, որին համարել է իր ուսուցիչն ու դաստիարակը: Գրիգոր Նյուսացին, Բարսեղ Կեսարացին և Գրիգոր Նազիանզացին Ընդհանրական եկեղեցու և համարդիստոնեական աստվածաբանական մտքի պատմության մեջ հայտնի են «կապաղովկյան հայրեր» կամ «Երեք մեծ կապաղովկիացիներ» անունով: Նախնական կրթությունն ստացել է ծննդավայրում, ապա Պաղեստինյան Կեսարիայի հանրահայտ դպրոցում՝ հնտանալով ճարտասանության և իմաստասիրության մեջ: Պատրաստվել է դառնալ աշխարհիկ հոետոր, տնօրինել հայրական կալվածքը, սակայն եղբոր՝ Բարսեղ Կեսարացու և հատկապես Գրիգոր Նազիանզացու հորդորներով դարձել է հոգևորական (ձեռնադրել է Բարսեղ Կեսարացին), 371-ից անցել է եկեղեցական գործունեության: Հեռացել է անսպատ, այնտեղ խորացրել կրոնական գիտելիքները: Եղել է հայաբնակ Նյուսա գյուղի (372-379) և Սերաստիա քաղաքի (380-ից) եպիսկոպոսը: Գրիգոր Նյուսացին անդրւ պայքար է մղել արիոսականության դեմ, ինչի համար հալածվել է. արիոսամետ Վաղես կայսրը նրան աքոռազրկել է և աքսորել: Գրիգոր Նյուսացին մասնակցել է 379-ին Անտիոքում գումարված ուղղափառ եպիսկոպոսների ժողովին: Ժողովի որոշումով որպես թեմական քննիչ և տեսուչ ուղարկվել է Պոնտոսի, Պաղեստինի և Արարիայի թեմերը՝ ամրապնդելու ուղղափառության դիրքերը, զապելու արիոսականների և մյուս հերետիկոսների անկարգությունները: Գրիգոր Նյուսացին մասնակցել է Կոստանդնուպոլսի Բ տիեզերական ժողովին (381) և Գրիգոր Նազիանզացու հետ վճռական դեր խաղացել

Նիկիական հաճգանակը պաշտպանելու և Մակերոնի հերձվածը դատապարտելու գործում:

Գրիգոր Նյուսացին թողել է մատենագրական հարուստ ժառանգություն: Աշխատությունները շարադրել է կյանքի վերջին տարիներին՝ 380-394-ին: Ի տարբերություն Կապաղովկիայի եկեղեցու մյուս նշանավոր հայրապետների հոգեսր ժառանգության՝ նրա երկերը հատկորոշվում են վառ արտահայտված խորհրդապաշտական ողբածությամբ: Գրիգոր Նյուսացու դավանաբանական գրվածքների մեծ մասը հակածառական քննությի է՝ ուղղված ընդդեմ ժամանակի հերետիկոսների: «Ընդդեմ Եվնոմիոսի» աշխատության մեջ հաստատել է Սուրբ Երրորդության ուղղափառ վարդապետությունը: Գրիգոր Նյուսացու երրորդաբանական տեսությունը շարադրված է նաև «Սուրբ Հոգու մասին» աշխատությունում, «Առ Եւստաքէոս բժշկական Յաղաց Սրբոյ Երրորդութեան» թղթում, Սուրբ Երրորդության վարդապետության ուղղափառ բացատրությանը նվիրված ճառերում, որոնցից նշանավոր է «Ոչ երեք Աստուածք»-ը, և այլ գրվածքներում: «Հրահանգ քրիստոնեական հավատքի» գործը հորդոր է՝ ուղղված նորադարձ հեթանոսներին ու հրեաներին, պարունակում է նաև հերետիկոսությանը հակածառելու եղանակներ: «Ընդդեմ Ապողինարիոսի» երկում հերքել է Ապողինար Լավողիկեցու ուսմունքը, իսկ «Ընդդեմ մանիքեցիների» երկում ապացուցել, որ Աստված չարի պատճառ չէ: Ցույց է տվել ճակատագրի նկատմամբ հավատի հիմնազորկ լինելը: Բացառիկ է «Մարդու արարչագործման մասին» երկասիրությունը, որտեղ խոսվում է մարդու մեջ Աստծո պատկերի նախաստեղծ արժանիքների, հոգու ոգեղենության, նրա գորությունների, հարության, մարդու քննության մեջ սողոսկած արատի, դրա ծագման մասին:

Գրիգոր Նյուսացու դավանաբանական գլխավոր և ծավալուն երկը «Քրիստոնեական»-ն է («Ճառ յաղաց մեծին քրիստոնեականին»), որը հեղինակի ուղղափառ վարդապետության ամփոփումն է: Գրիգոր Նյուսացին ներկայացրել է քրիստոնեական համակարգված վարդապետության հիմնական կետերը, խոսել Սուրբ Երրորդության, Արարչագործության, Մարդե-

ղորթյան և Փրկագործության մասին: Գրիգոր Նյուսացու գրչին են պատկանում նաև Աստվածաշնչի մեկնություններ, որոնք հիմնականում այլաբանական խորհրդածություններ են: Գրել է սաղմոսների երկու մեկնություն, սաղմոսները զնահատել որպես կատարելության ու բարության հասնելու սանդուղքներ, ուր քարոզակերպ այլաբանական մեկնություններ ժողովող գործի վրա: Տասնինգ ներբողներ է հորինել Երգ Երգոցի, իին աղորքներ՝ Տերունական աղորքի կամ «Հայր մերի» վերաբերյալ, որոնցում դարձյալ շեշտը դրել է Ավետարանի բնագրի այլաբանական իմաստի վրա, ուր քարոզներ՝ նվիրված Ավետարանների «Երանի»-ներին, երկու մեկնություն՝ Բարսեղ Կեսարացու «Վեցօրեայք»-ին: Ծգմափրական-վաճական կյանքն արծարծող գործերում այն միտքն է հայցել, թե մարդը կարող է հասնել մարդկային ամենաբարձր առաքինությանը միմիայն ճշմարիտ իմաստության շնորհիվ: Հեղինակել է նաև ծիսապաշտական քարոզներ՝ նվիրված Հիսոս Քրիստոսի Ծննդյան և Աստվածահայտնության, Զատկի և Հարության, Համբարձման, Հոգեգալստյան տոներին, գրել բարոյախրատական բնույթի ճառեր, ներբողներ, դամբանականներ, խրատներ, նամակներ:

Գրիգոր Նյուսացու աստվածաբանությունը հիմնված է քրիստոնեական հավատի ընդհանրական դրույթների, Որոզինեսի աստվածաբանության, Փիլոն Ալեքսանդրացու խորհրդապաշտական իմաստափրության և նեռալատոնականության վրա: Կապաղովկյան հայրերը եղել են Արանաս Ալեքսանդրացու և Ալեքսանդրիայի դպրոցի աստվածաբանության կրողները և, իրենց առանձնահատկություններով հանդերձ, դրա շարունակողները: Նրանք բանաձևել են աստվածաբանական, դավանաբանական շատ հասկացություններ, հատկապես՝ Սուրբ Երրորդության ուղղափառ լմբոնումը, և բացատրել եկեղեցու վարդապետությունը այնպես, ինչպես դա արտահայտված է Նիկիայի Հավատի Հանգանակում:

Գրիգոր Նյուսացու գործերի զգալի մասը հայերեն է թարգմանվել V-VIII դդ.: Թարգմանված առաջին ճառը տպագրվել է «Գիրք և ճառը հոգեշահ» (1722) ժողովածուում, ճառերից հատվածներ՝ «Կնիք հաւատոյ»-ում, Տիմոքեոս Կուզի «Հակածառու-

թիւն» (1908) երկում: «Հայաստանի միջնադարյան վարդապետարաններում օգտագործվել և լայն շրջանառության մեջ են եղել հատկապես նրա «Առ այնուիկ որք ասեն, եթէ մեծ է Հայր քան զՄրդի», «Մեկնութիւն Ժողովողի», «Խաւաք յինն երանութիւնս», «Ի Հայր մեր որ յերկիխն», «Տեսութիւն ի մարդոյն կազմութիւնն», «Յաղագս կուսութեան», «Յաղագս Երգոյ Երգոց», «Քան խոստվանութեան հաւատոյ» աշխատությունները: Գրիգոր Նյուսացու երկերից հատվածներ են վկայակոչվել Անանիա Սահմանեցու «Հակաճառության» մեջ, Վարդան Այգեկցու կազմած «Արմատ հաւատոյ»-ում և այլուր: Նրա աշխատությունների հիմնան վրա, ուսումնական նպատակներից ելնելով, կազմվել են հարցուապատասխաններ: Գրիգոր Նյուսացին եղել է Հայ եկեղեցու սիրված և ընդունված հայրապետներից: Նրա մատենագրական վաստակը սերտորեն կապված է Հայ եկեղեցու և մշակույթի պատմության հետ:

Սույն «Որիստոնեական»-ը առաջին անգամ է թարգմանվում հայերեն:

Հ. Քյոսեյան

ՆԱԽԱԲԱՆ

Արանց համար, ովքեր պարտականությունն ունեն ուսուցանելու քրիստոնեության խորհուրդը, խիստ անհրաժեշտ է հավատի քրիստոնեականը: Նրանք, քրիստոնեական վարդապետության վստահելի խոսքը (Տիտ. 1, 9) լսելի դարձնելով անհավատներին, թույլ կտան, որ եկեղեցին բարգավաճի, քանի որ այդպիսով կմեծանա փրկված հոգիների թիվը:

Ուսուցման մեթոդը

Սակայն ուսուցման նույն մեթոդը չի կարող հավասարապես պատշաճել բոլոր նրանց, ովքեր գալիս են ունկնդրելու այդ խոսքը. պետք է քրիստոնեականը հարմարեցնել կրոնական հավատալիքների բազմազանությանը՝ առաջադրելով միշտ նույն նպատակները, բայց կիրառելով տարբեր փաստարկներ՝ ըստ մասնավոր պարագաների:

Հուգայական կրոնից եկող մարդը միևնույն կանխակալ գաղափարները չունի, քան այն մարդը, որն ապրում է հեթանոսական աշխարհում¹: Նույն բանը կարելի է ասել անոմեականների, մանկքեականների, Մարկիոնի, Վալենտիանոսի, Վասիլիկեսի կողմնակիցների և այն մարդկանց ամբողջ շարքի մասին, որոնց մոլորեցնում են հերետիկոսության այլազան ձևերը²: Նրանցից յուրաքանչյուրն ունի իր առանձին կանխակալ կարծիքները, և դա ստիպում է մեզ, ըստ յուրաքանչյուր պարագայի, մարտնչել այն բանի դեմ, ինչը հիմնավորում է նրանց կարծիքը, որովհետև հիվանդության բնույթն է, որ պետք է որոշի այն դարմանելու եղանակը:

Բուժման նույն եղանակը չենք կիրառելու բազմաստվածությանը հավատացող հելենականի և այն հրեայի համար, որը մերժում է հավատալ միածին Որդի Աստծուն։ Գալով այն մարդկանց, որոնք մոլորվել են հերետիկոսությունների մեջ, միշտ նույն եղանակները գործադրելով չեն, որ հնարավոր կլինի հերքել այն առասպելաբանությունները, որ նրանք երեակայում են, թե գոյություն ունեն դոգմաների շուրջ։ Հիրավի, այն փաստարկները, որ ուղիղ ճանապարհի մեջ կդնեն սարելականին³, ոչ մի օգտակարություն չեն ունենա անոմեականի համար, և մանիքեականի դեմ մղված պայքարը ապարդյուն կլինի հրեայի համար։ Հարկավոր է, կրկնում ենք, հաշվի առնել առանձին անհատների կանխակալ կարծիքները և ուսուցումը պատշաճեցնել յուրաքանչյուրին հատուկ մոլորության տեսակին։ Իսկ դրա համար, ամեն վեճի ընթացքում, նախ պետք է առաջ քաշել հիմնավորված տրամաբանական սկզբունքներ և առաջարկություններ։ Այն ժամանակ շնորհիվ այն կետերի, որոնց համաձայն է թե՛ մեկ և թե՛ մյուս կողմը, փաստարկման տրամաբանական շարունակությունը թույլ կտա բացահայտել ճշմարտությունը։

Ուստի ամեն անգամ, երբ հարկ լինի վիճել հեթանոսի հետ, լավ է վեճն սկսել այսպես. հավատո՞ւմ է նա աստվածությանը, թե՞ հարում է անաստվածների կարծիքին։ Եթե ասում է, թե Աստված գոյություն չունի, ապա կմեկնենք այն գաղափարից, թե որքա՛ն հանճարեղ և իմաստուն կերպով է կազմված այս աշխարհը, և այդ միջոցով նրան կբերենք այն բանին, որ ընդունի, թե գոյություն ունի այնտեղ ի հայտ եկող մի գորություն, որ գերիվեր է այդ ամբողջից։ Եթե, ընդհակառակը, նա կասկածի տակ չի առնում Աստծու գոյությունը, բայց հակված է հավատալու բազմաթիվ աստվածների, ահա փաստարկի այն տեսակը, որը պետք է

կիրառենք. ըստ նրա կարծիքի, աստվածությունը կատարյալ է, թե՞ անկատար։ Եթե, ինչպես այդ հավանական է, նա վկայի, թե աստվածային բնությունը կատարյալ է, մենք իրավունք կունենանք նրանից պահանջելու, որ այդ կատարելությունը տարածի աստվածության բոլոր կողմերի վրա, այլապես նա աստվածայինը կնկատի որպես հակառակ բաների խառնուրդ, որտեղ անկատարը կմիանա կատարյալին։ Հարցը ինչի էլ վերաբերի՝ Աստծու գորությանը, բարին հղանալու նրա կարողությանը, իմաստությանը, անապականությանը, հավիտենությանը, թե աստվածությանը առնչվող ուրիշ ամեն ըմբռնումի, փաստարկման տրամաբանական շարքը նրան ընդունել կտա, որ կատարելությունը նկատելի է աստվածային բնության մեջ ամենուրեք։

Այս կետը մի անգամ նրան ընդունել տալուց հետո դժվար չի լինի նրա մտածումը, որ մինչ այդ ցրված էր բազմաթիվ աստվածների վրա, բերել հասցնել այն բանին, որ նա ընդունի մեկ աստվածություն։ Արդարեւ, եթե ընդունենք, որ բացարձակ կատարելություն պետք է շնորհել վեճի առարկա հանդիսացող աստվածությանը, պաշտպանելով հանդերձ այն գաղափարը, որ բազմաթիվ են այն էությունները, որոնք ներկայացնում են այդ նույն հատկանիշները, անհրաժեշտորեն հարկավոր է ապացուցել այն, ինչը հատուկ է յուրաքանչյուրին։ Եվ կամ՝ եթե ճիշտ է, որ միտքը չի կարող ըմբռնել ոչ մի առանձնահատկություն այնտեղ, ուր տարբերություն գոյություն չունի, չպետք է ենթադրել զատորոշում։

Արդարեւ, չենք կարող տարբերություն գտնել ավելիի կամ պակասի իմաստով, քանի որ կատարելության հասկացությունը բացառում է ամեն նվազեցում։ Նույնպես չենք կարող գտնել ոչ մի տարբերություն, որ առաջ է գալիս ստորադասությունից կամ գերադասությունից, որովհետեւ

կարելի՝ է աստվածայինն ըմբռնել այնտեղ, ուր գոյություն ունի ստորագասի որակումը։ Նաև չենք կարող գտնել ոչ մի տարբերություն հնության և նորության վերաբերյալ, որովհետև հնարավոր չէ աստվածայինը պատկերացնել առանց հավիտենության դադափարի։ Հետևաբար աստվածության գաղափարը լինելով մեկ, նման ինքն իրեն, և դատողությունը ոչ մեկ տեղ չբացահայտելով նվազագույն առանձնահատկությունը՝ նա, ով մոլորության մեջ երևակայում էր բազմաթիվ աստվածներ, հարկադրված կլինի խոստովանել, որ կա միայն մեկ աստվածություն. որովհետև, եթե բարությունն ու արդարությունը, իմաստությունն ու զորությունը հավասարապես հատուկ են նրան, եթե անմահությունը, հավերժությունը և աստվածապաշտությանը համապատասխան ուրիշ ամեն ստորոգելի նույն ձևով հատուկ են նրան, ապա ինչպիսին էլ լինի դրան հետեւող դատողությունը, ամեն տարբերություն վերանում է, և դրա հետ մեկտեղ անպայման վերանում է հավատը բազմաստվածության հանդեպ, քանի որ բացարձակ նույնականությունը բերում է այն բանին, որ նա հավատա միաստվածությանը⁴:



1. ԱՍՏՎԱԾ ՄԵԿ Է ԵՌԱԾԻԱՄՆԱԿԱՆ

1. Բայց մեր կրոնի վարդապետությունը աստվածային բնության մեջ կատարում է անձերի զատորոշում⁵: Ուստի մեր սույն քննասիրությունը հեթանոսների դեմ մեր մղած պայքարում չպետք է գնա դեպի հուգայականություն։ Հարկավոր է, խելամիտ մի տարբերակման օգնությամբ, իր հերթին սրբագրել այս կետի շուրջ ի հայտ եկած մոլորությունը։

Աստված որպես Խոսր

Նույնիսկ նրանք, ովքեր օտար են մնում մեր հավատին, աստվածությունը չեն պատկերացնում խոսքից անմասն⁶: Բավկական է ունենալ նրանց համաձայնությունը այս կետի շուրջ, որպեսզի հստակորեն բացատրենք մեր դրույթը։ Արդարե, համաձայնել, որ Աստված անմասն չէ խոսքից՝ նշանակում է միանգամայն ընդունել, որ նա ունի խոսք, որ նա անբաժան չէ խոսքից։ Բայց արդյո՞ք դրանք նույն բառերն են, որ մենք գործածում ենք մարդկային խոսքի պարագայում։ Եթե մեր հակառակորդն ասի, թե ինքը աստվածային Խոսքը պատկերացնում է մեր մարդկային խոսքի նմանողությամբ, ապա հենց դրանով էլ մենք նրան կառաջնորդենք դեպի ավելի բարձր մի հասկացություն։

Արդարե, պետք է անհրաժեշտաբար համոզվել, որ բանը (խոսքը), ինչպես մյուս բոլոր ունակությունները, համեմատական է բնությանը։ Մարդու մեջ կարող ենք նկատել որոշ մի զորություն, մի կյանք, մի իմաստություն։ Բայց

ինչքան էլ որ բառերը նույնանման լինեն, դա մեզ թույլ չի տա աստվածային բնության մեջ ենթադրել նույն տեսակի մի կյանք, մի զորություն կամ մի իմաստություն։ Այդպիսի բառերի նշանակությունը փոքրանում է մեր մարդկային բնության չափի մեջ։ Արդ, մեր բնությունը ենթակա է ապականության, թույլ է. մեր կյանքն էլ ունի շատ կարճ տևողություն, իսկ մեր զորությունը անկայուն է, և մեր խոսքը՝ անորոշ։

Աստվածային բնության մեջ, ընդհակառակը, ամեն ինչ, որ ասվում է նրա մասին, բարձրանում և հասնում է քննարկվող նյութի մեծությանը։ Հետեւբար, երբ խոսվում է Աստծու Խոսք հասկացության մասին, պետք չէ կարծել, որ այն առաջ է գալիս սոսկ հնչյուններ արտաքերելու իրողությունից, իրողություն, որ այնուհետև կկորսվի, ինչպես մենք ենք կորցնում մեր մարդկային խոսքը։ Բայց ինչպես որ մեր կորստական բնությունը ունի կորստական խոսք, այնպես էլ անապական և հավիտենական բնությունը ունի հավիտենական և գոյացական խոսք⁷։

Խոսքը կյանք է

Այսպիսով, նյութի տրամաբանական շարունակությունը մեր հակառակորդին կառաջնորդի այն բանին, որ նա կընդունի Խոսքի (Բանի) հավիտենական գոյացությունը։ Այն ժամանակ նա անպայման կհամաձայնի, որ Բանի գոյացությունը օժտված է կյանքով. որովհետև մտածել, որ Բանը անկենդան մի գոյացություն է, ինչպես, օրինակ՝ քարերը, աստվածամերժություն կլիներ։ Երկուսից մեկը. եթե նա (Բանը) մտածող և մարմնավոր գոյացություն է, ապա բացարձակապես ունի կյանք, իսկ եթե, ընդհակառակը, զուրկ է կյանքից, ապա զուրկ է նաև գոյացությունից։ Արդ, մենք հստակորեն ցույց տվեցինք, որ աստվածամերժություն կլի-

ներ Խոսքը (Բանը) նկատել որպես գոյացությունից զուրկ մի բան։ Ուրեմն հենց դրանով էլ տրամաբանորեն ապացուցեցինք, որ Բանը, որի մասին խոսվում է, ունի կյանք։ Եվ, եթե համոզված ենք, որ Բանի էությունը պարզ է ըստ ամենայն հավանականության (այսինքն՝ որ նա ո՛չ երկակի է և ո՛չ էլ՝ բաղադրյալ), այլևս կենդանի Բանը չենք կարող նկատել որպես կյանքին սոսկ մասնակցություն ունեցող մի բան։ Հիրավի, ընդունել, որ մի բան մի ուրիշ բանի մեջ է՝ նշանակում է մնալ բաղադրյալի հասկացության մեջ։ Ընդհակառակը, աստվածային բնության միությունն ընդունելուց հետո, անհրաժեշտություն է դառնում հավատալ, որ Բանը կենդանի է ինքն իրենով և ոչ թե պարզապես մասնակից է կյանքին։

Բանի զորությունը

Ուրեմն, եթե Բանը ապրում է՝ ինքն իսկ լինելով կյանքը, նա բացարձակ իմաստով ունի նաև կամքի ունակություն, որովհետև կենդանի էակներից ոչ մեկը զուրկ չէ դրանից։ Բայց, տրամաբանորեն, աստվածապաշտությունը ուղղում է, որ նրա մեջ որպես զորություն տեսնենք վճռելու այդ ունակությունը։ Զընդունել, որ նա օժտված է զորությամբ՝ կնշանակեր ուղղակիորեն նրան անզոր ենթադրել։

Արդ, իսկապես, երբ ընկալում ենք աստվածայինը, դրանից բացառում ենք անզորությունը։ Երբ ջանում ենք հասկանալ աստվածային բնությունը, չենք կարող ընդունել, որ նրա մեջ կարող է լինել որևէ աններդաշնակ տարր։ Պետք է, ուրեմն, անհրաժեշտաբար համաձայնել, որ Բանի զորությունը հավասար է նրա կամքին, այլապես կնշանակեր ընդունել մի խառնուրդ, իրար հակառակ բաների հարակցություն այդ միության մեջ։ Որովհետև նույն կամքի մեջ միաժամանակ կենթադրվեր թե՛ զորություն և թե՛ անզո-

բություն, այսինքն՝ թե նա որոշ պարագաներում զորավոր է, այլ պարագաներում՝ անզոր:

Ուրեմն, լինելով ամենազոր, Բանի կամքը անհրաժեշտաբար ոչ մի հակում չունի դեպի վատը, որովհետև չարի ձգտումը օտար է աստվածային բնությանը: Ընդհակառակը, ամեն ինչ բարի է. ահա՛ թե ինչ է կամենում նա: Եվ ինչ որ կամենում է, բացարձակապես կարող է այն անել: Եվ այդ զորությունը գերծ չէ արդյունավետությունից. նա բարու իր բոլոր ծրագրերը հասցնում է արարման:

Բանը արարող է

Արդ, աշխարհը և այն ամենը, ինչ նրա մեջ կա, բարի գործ է՝ դատելով այն իմաստությունից և ճարտարությունից, որ նկատվում է այնտեղ⁸: Ուրեմն ամեն ինչ Բանի գործն է, կենդանի և գոյացական Բանի գործը, քանի որ նա Աստծու Բանն է: Բայց Բանը նաև օժտված է կամքով, քանի որ ապրում է: Նա կարող է նմանապես իրականացնել այն ամենը, ինչ ընտրում է անելու համար՝ ընտրելով միշտ ինչ որ բարի է և իմաստուն: Կարճ ասած՝ նա ներկայացնում է գերակայության բոլոր հատկանիշները:

Աշխարհը, ուրեմն, բարի գործ է. սրանում մենք համակարծիք ենք. և ինչ որ ասացինք վերեռում, ապացուցեց, որ աշխարհը Բանի գործն է, այն Բանի, որն ընտրում է բարին և կարող է այն իրականացնել:

Մյուս կողմից՝ այս Բանը, որի մասին խոսում ենք, չի չփոթվում նրա հետ, որից բխում է, որովհետև այստեղ, որոշ իմաստով, խոսքը վերաբերում է հարաբերական մի հասկացության⁹, քանի որ, վստահաբար, Բանի հետ միաժամանակ պետք է հասկանալ նաև Բանի հեղինակին: Եթե, ուրեմն, ունկնդիրներն իրենց մտածողությամբ հարաբերությունն արտահայտող մի բառով տարբերում են Բանն

ինքը նրանից, որից նա բխում է, հեթանոսական ըմբռնում-ների դեմ պայքարելիս մենք այլևս վտանգի տակ չենք դնում մեզ՝ նշելով, որ այդ խորհուրդը գալիս համաձայնում է Հուդայական հավատալիքների հետ: Ընդհակառակը, նրանք՝ ունկնդիրները, կխուսափեն ինչպես հեթանուների, այնպես էլ Հուդայականների անհեթեթությունից՝ ընդունելով, որ Բանը միաժամանակ կենդանի է, գործուն և արարող (ինչը հրեան չի ընդունում)¹⁰, և որ չկա բնության տարբերություն Բանի և նրա միջև, որից նա բխում է:

Բանը ստեղծում է մարդուն

Արդարև, երբ հարցը մեզ՝ մարդկանց է վերաբերում, ասում ենք, որ խոսքը բխում է բանականությունից՝ առանց շփոթվելու նրա հետ, բայց և առանց ամբողջովին տարբերվելու նրանից, որովհետև, քանի որ բանականությունից է բխում, տարբերվում է նրանից և չի շփոթվում նրա հետ, բայց քանի որ դրսեռումն է բանականության, չի կարող համարվել բացարձակապես տարբեր: Եթե իր բնությամբ նա նույնանում է նրա հետ, ապա նրանից զատորոշվում է որպես սուբյեկտ¹¹: Նույն բանը պետք է ասել նաև Աստծու Խոսքի (Բանի) համար: Նա ունի իր սեփական գոյությունը և դրանով էլ տարբերվում է նրանից, որից բխում է: Բայց նա ինքն իրենով ցույց է տալիս այն բոլոր հատկանիշները, որ մենք նկատում ենք Աստծու մեջ, և հետևաբար իր բնությամբ շփոթվում է նրա հետ, ում ճանաչելի են դարձնում նույն հատկանիշները. բարություն, զորություն, իմաստություն, հավիտենականություն, նաև առանձնաշնորհում՝ զերծ լինելու ամեն ինչից, որ բացահայտում է չարը, մահը, ապականությունը: Ամբողջական կատարելություն մյուս բոլոր ատորոգելիներով, որոնք նրան դարձնում են Հոր գաղափարի հայտարար նշան: Այդ նույն

հատկանիշներով ենք ճանաչում Բանը, որի գոյությունը բխում է նրանից:

2. Աստծու Հոգին

Մենք սովորում ենք Բանը ճանաչել՝ մեր մարդկային մակարդակից բարձրանալով մինչև գերազույն բնությունը: Այդ նույն ձեռվ մենք կարողանում ենք ըմբռնել Հոգին¹² մեր սեփական բնության մեջ ներքին հայեցողությամբ դիտելով անտեսանելի գորության մի տեսակ ստվերը և պատկերը: Բայց մեր մեջ չունչը օդի կլանումն է, ներշնչումն օտար մի տարրի, որ բնական կերպով մուտք է գործում մեր օրդանիզմի մեջ և այնուհետև դուրս մղվում: Հստակ արտասանությունը ձայնի երևույթն է, որը դրսեռում է այն, ինչը իշխում է խոսքի մեջ:

Աստվածային բնության մեջ աստվածապաշտությունը մեզ ստիպում է հավատալ, որ կա Աստծու Հոգի, ճիշտ ինչպես ընդունեցինք, որ կա Աստծու Խոսք (Բան): Արդարեւ, Աստծու Խոսքը մեր խոսքից ցածր չպետք է լինի: Այդպես կլիներ, եթե կարծեինք, թե Բանը Հոգի չունի, մինչդեռ մեր խոսքն ուղեկցվում է չնչով: Սակայն մտածել, որ օտար մի տարր, ինչպես այդ տեղի է ունենում մեր չնչի պարագայում, դրսից առատորեն հոսում է աստվածային անձի մեջ և դառնում նրա մեջ Հոգի, դա կնշանակեր՝ նախատել Աստծուն:

Երբ մենք սովորում էինք, որ կա Աստծու Խոսք, մենք չկարծեցինք, որ այդ Խոսքը սեփական գոյացությունից գուրեկ մի առարկա է, ձեռք բերված մի ճանաչման պարզ արդյունքը, ոչ էլ ձայն, որ այն դրսեռում է և դրսերելուց անմիջապես հետո անհետանում. առավել ևս չկարծեցինք, որ նա ենթակա է դիպահածներին, որ մենք տեսնում ենք մեր խոսքի պարագայում: Մենք այն ըմբռնեցինք որ-

պես անձնական գոյացություն, որ ունի կամք, ակտիվ գործունեություն, զորություն:

Նույնպես՝ իմանալով, որ գոյություն ունի Աստծու Հոգի, որն ուղեկցում է Խոսքին (Բանին) և դրսեռում իր ակտիվ գործունեությունը, մենք այն չենք ըմբռնում որպես շունչ, մի պարզ չնչառություն. դա կնշանակեր աստվածային մեծությունն ինչեցնել մեր փոքրության աստիճանին՝ ենթադրելով, որ այն չունչը, որ նրա մեջ կա, նման է մեր չնչին: Ընդհակառակը, մենք այն նկատում ենք որպես գոյացական մի ուժ, որն ապրում է ինքն իր մեջ սեփական մի գոյությամբ, որը չի կարող բաժանված լինել Աստծուց, որի մեջ բնակվում է, ոչ էլ Աստծու Խոսքից, որին ուղեկցում է: Նա չի չքանում՝ տարածվելով դրսում, այլ նա, նույն ձեռվ, ինչպես Խոսքը (Բանը), ունի անձնական գոյություն, ունի կամք, շարժվում է ինքն իրենով, գործուն է՝ ընտրելով միշտ բարին, և ունի իր կամքին համապատասխանող գորություն՝ իրականացնելու համար իր բոլոր ծրագրերը:

3. Սիություն և տարրեր անձեր

Այսպես, ուշադրությամբ քննելով աստվածային խորհրդի խորությունը՝ մարդկային միտքը ներքին հայեցողությամբ կարողանում է որոշ չափով ըմբռնել Աստծու ճանաչմանը վերաբերող վարդապետությունը: Բայց նրա կարողությունից վեր է խոսքով հստակորեն արտահայտել այդ խորհրդի անպատճեմ խորությունը: Ինպէ՞ս կարող է միենալուն իրականությունը միաժամանակ հաշվարկելի լինել և խուսափել ամեն հաշվարկումից, ըմբռնվել իր առանձին մասերով և սակայն միաժամանակ ըմբռնվել իր միությամբ, բաժանվել անձի հասկացությամբ այն դեպքում, երբ այդպիսին չէ իր բնությունը:

Ի՞նչ է անձը

Անձի հասկացությունն, արդարե, զատորոշում է Հոգին Բանից, նաև զատորոշում է մեկն ու մյուսը նրանից, ով ունի թե՛ Բանը և թե՛ Հոգին: Բայց հասկանալուց հետո, թե ի՞նչն է դրանք բաժանում իրարից, պարզվում է, որ դրանց բնության միությունը չի ընդունում բաժանում: Հետեարար, միակ աստվածային զորությունն անբաժանելի է, այսինքն՝ չի բաժանվում տարբեր աստվածությունների միջև: Բայց այս վարդապետությունն այդ պատճառով չի շփոթվում հրեական հավատի հետ: Ճշմարտությունն այս երկու ըմբռնումների մեջտեղում է, մաքրում է թե՛ մեկը, թե՛ մյուսը իրենց մոլորություններից՝ ընդունելով հանդերձ այն լավը, որ դրանցից յուրաքանչյուրն ունի իր մեջ: Հրեայի հավատը մաքրվում է՝ ընդունելով Բանը և հավատը Հոգու հանդեպ: Բազմաստվածությանը հավատացող հեթանոսների մոլորությունը նույնպես անհետանում է, քանի որ աստվածային բնության միությունը ջնջում է բազմաքանակության երեակայածին դաշտավարը:

Հրեական ըմբռնումից պետք է պահել աստվածային բնութան միության հասկացությունը, իսկ հեթանոսությունից՝ միայն անձերի տարբերությունը՝ գործածելով թե՛ մեկի և թե՛ մյուսի համար այն դեղամիջոցը, որ համապատասխանում է յուրաքանչյուրի աստվածամերժությանը: Երրորդության հաշվարկումը, այսպես ասած, դեղամիջոցն է նրանց, ովքեր մոլորվում են միության հարցում, իսկ միության վարդապետությունը դեղամիջոցն է այն մտքերի, որոնք ցըլում են բազմադիմության մեջ:

4. Երրորդությունը Սուրբ Գրքում

Եթե հրեան հակածառում է մեզ այս հարցի շուրջ, ապա մենք այլևս մեծ դժվարություն չունենք պաշտպանելու մեր

դատողությունը նրա դեմ, որովհետև հենց այն նույն ուսուցումները, որոնց մեջ նա մեծացել է, հայտնի են դարձնում ճշմարտությունը: Որ գոյություն ունի Բան և Աստծու Հոգի, որոնք անձնական գոյացությամբ օժտված ուժեր են՝ ընդունակ ստեղծելու այն ամենը, ինչ եղել, և որոնք իրենց մեջ պարունակում են ամբողջ իրականությունը, դա հստակորեն ցույց է տալիս Սուրբ Գիրքը, որը ներշնչված է Աստծուց: Հիշատակենք միայն մեկը այդ վկայություններից, և դա բավարար կլինի, իսկ ուրիշ շատ վկայություններ բացահայտելու հոգսը կթողնենք ավելի ժրածան մտածողներին. «Տիրոջ Խոսքով, – ասվում է, – ստեղծվեց երկինքը (Սաղմ. 32, 6), և նրա բերանի շնչով (Հոգով)՝ բոլոր զորությունները»: Բայց ի՞նչ Խոսք և ի՞նչ Հոգի: Խոսքն այստեղ չի նշանակում «լեզու», ոչ էլ Հոգին՝ պարզապես «շունչ»: Արդարե, Աստվածությունը մարդկային նկարագիր կստանար ճիշտ մեր բնության պատվերով, եթե ուսացանեինք, որ տիեզերքի Արարիչը գործածել է այդ տեսակի Խոսք և այդ տեսակի Հոգի:

Հիրավի, ինչպես կարող է լեզվից և շնչից բիսել այնպիսի մի ուժ, որ բավարար լինի կազմավորելու երկինքն իր պարունակած բոլոր զորություններով: Արդարե, եթե Աստծու Խոսքը (Բանը) նման լիներ մեր լեզվին, իսկ նրա Հոգին՝ մեր շնչին, այդ նման տարբերից առաջ եկող ուժը նույնպես կլիներ բացարձակապես նման, և Աստծու Խոսքը (Բանը) կունենար մի ուժ, որն ավելի մեծ չէր լինի մեր ուժից: Բայց ճիշտն այն է, որ մեր խոսքերը անարդյունավետ են և անկայուն, ճիշտ ինչպես մեր շունչը, որը ցնդում է մեր արտասանած բառերի հետ միաժամանակ:

Անարդյունավետ և անկայուն. ահա, թե ինչպես են պատկերացնում Աստծու Խոսքը (Բանը) և Աստծու Հոգին նրանք, որոնք Աստվածությունն իջեցնում են՝ նմանեցնե-

լով այն մեր Խոսքին։ Արդ, ինչպես ասում է Դավիթը (Սաղմ. 32, 6), եթե Տերն իր Խոսքով (Բանով) ստեղծել է երկիրը, և եթե նրա բոլոր զորությունները կազմվել են Աստծու Հոգով, ապա հենց դրանով էլ հաստատվում է ճշմարտության խորհուրդը, որը մեզ բերում է այն բանին, որ խոսենք գոյացական մի Խոսքի (Բանի) և գոյացական մի Հոգու մասին։



2. ՍԱՐԴԸ

Անստեղծը և ստեղծվածը

5. Այն իրողությունը, որ գոյություն ունի Աստծու Բան և Աստծու Հոգի, հեթանոսին բերում է այն մտքին, որ նա չառարկի դրան՝ ելնելով ընդհանուր գաղափարներից, իսկ հրեան էլ չառարկի՝ ելնելով Սուրբ Գրքի ըմբռնումներից։ Բայց թե՛ մեկը և թե՛ մյուսը հավասարապես կմերժեն մարդուն վերաբերող Բան Աստծու ծրագիրը¹³՝ ասելով, որ այն անճշմարտանման է և միաժամանակ անարժան աստվածությանը։ Ահա, թե ինչու մեր մեկնակետը կլինի տարբեր՝ այս կետի շուրջ մեր հակառակորդներին առաջնորդելու համար դեպի հավատը¹⁴։

Նրանք համոզված են, որ ամեն ինչ ստեղծված է նրա բանականությամբ և իմաստությամբ, ով կազմավորել է տիեզերքը, կամ դեռևս մեծ դժվարությամբ են ընդունում այս ըմբռնումը։ Եթե չընդունեն, որ բանականությամբ և իմաստությամբ է իրագործվել տիեզերքի կազմավորումը, ապա անտրամաբանություն և անճարակություն կհամարեն տիեզերքի սկզբնապատճառը։ Բայց եթե դա անհեթեթություն և սրբապղծություն է, ապա պետք է համաձայնել, որ նրանք ի վերջո կընդունեն, որ ինչ որ բանականություն և իմաստություն գերազանցորեն կառավարում են իրականությունը։ Արդ, նախորդ գլխում հստակորեն ապացուցեցինք, որ Աստծու Խոսքը (Բանը) նույն իմաստը չունի, ինչ որ «Խոսք» բառը և ոչ էլ նա մի պարզ գիտություն կամ իմաստություն ունեցող ինչոր բան է։ Նա գոյացական մի զորություն է, որ միշտ բարին է ընտրում և կարող է կատարել այն, ինչ ընտրում է։ Ուրեմն, քանի որ աշ-

խարհը բարի է, դրա պատճառը այն զորությունն է, որ բաշխում և ստեղծում է բարին: Եվ եթե տիեզերքի հիմնադրումն իսկ կախված է Բանի զորությունից, ինչպես այդ ապացուցեց մեր դատողության շարունակությունը, ապա պետք է ստիպողաբար մտածել, որ տիեզերքի մասերի կազմավորումը ուրիշ պատճառ չունի, քան Բանն ինքը, որի միջոցով ամեն ինչ գալիս հասնում է կյանքին:

Ստեղծագործություն Բանով

Ինչպիսի անուն էլ ցանկանան տալ նրան՝ Բան կամ իմաստություն, կամ Զորություն, կամ Աստված և կամ վսեմ ու մեծարելի ուրիշ որևէ անուն, մենք չենք վիճի դրա շուրջ: Արդարեւ, ինչ էլ լինի այն բառը կամ անունը, որ մարդիկ գտնում են՝ նշելու համար սուբյեկտը, այդ բոլոր խոսքերը նշանակում են միակ և նույն իրականությունը, այսինքն՝ Աստծու հավիտենական զորություն, որն արարում է, ինչ որ գոյություն ունի, հնարում, ինչ որ չկա, ինքն իր մեջ պարունակում ստեղծված բաները և կանխատեսում նրանք, որ դեռևս չկան: Այս Բան-Աստվածը, որ իմաստություն և զորություն է, նաև (ինչպես մեր դատողության շարունակությունը դա ցույց տվեց մեզ) արարիչն է մարդկային բնության: Ոչ մեկ անհրաժեշտություն նրան չմղեց ձևավորելու մարդուն. իր սիրո գերառատությունն է, որ ծնունդ տվեց այդպիսի մի էակի¹⁵: Արդարեւ, հարկավոր էր, որ լիներ մի էակ, որպեսզի տեսներ իր լույսը, վկա լիներ իր փառքին, վայելեր իր բարությունը, և որպեսզի անդործ չմնային մյուս բոլոր որակները, որ մենք տեսնում ենք աստվածային բնության մեջ, ինչը կարող էր պատահել, եթե չլիներ ոչ ոք դրանց մասնակցելու և դրանցից օգտվելու համար¹⁶:

Մարդու բնությունը

Այսպես, ուրեմն, եթե մարդը կյանքի կոչվեց, որպեսզի մասնակցի Աստծու բարիքներին, ապա պետք է, որ նրա կազմությունը ընդունակ դարձնի նրան այդ մասնակցությանը: Աչքը մասնակից է լույսին չնորհիվ այն լուսավոր սկզբնատարրերին, որ բնությունը դրել է նրա մեջ¹⁷, և այդ բնածին կարողության չնորհիվ է, որ նա իրեն է ձգում այն, ինչ նույն բնությունն ունի: Ուրեմն, նույն ձեռվ անհրաժեշտ էր, որ աստվածայինի հետ որոշ մի նմանություն խառնված լիներ մարդկային բնությանը, որպեսզի այդ հաղորդականությունը նրան ձգեր այն բանին, ինչը նման է իրեն: Նույնիսկ բանականությունից գուրկ եղող էակների բնական կարգի մեջ յուրաքանչյուր անասուն ունի այնպիսի կազմություն, որը համապատասխանում է նրա կյանքի եղանակին, այնպես որ իրենց մարմնի մասնահատուկ համապատասխանության չնորհիվ նրանք գտնում են իրենց հարմար եղող տարրը. մեկի համար դա կլինի օդը, մյուսի համար՝ ջուրը: Նույնպես մարդը, որ ստեղծված է վայելելու համար աստվածային չնորհները, պետք է բնական մի նմանություն ունենար այն առարկայի հետ, որին նա մասնակցում է: Ահա թե ինչու նա օժտված է կյանքով, բանականությամբ, իմաստությամբ և աստվածությանն իրապես արժանի բոլոր հատկություններով, որպեսզի դրանցից յուրաքանչյուրը նրան ցանկանալ տա այն, ինչը նման է իրեն¹⁸: Եվ քանի որ հավիտենությունը նույնպես աստվածային բնությանը կապված չնորհներից մեկն է, մեր բնությունը բացարձակապես գուրկ չպիտի լիներ դրանից, այլ հենց իր մեջ պիտի ունենար անմահության սկզբունքը: Շնորհիվ այս բնածին հատկության մեր բնությունը կկարողանար ճանաչել այն, ինչը գերիվեր է իրենից, և կպահեր աստվածային հավերժության ցանկությունը:

Ստեղծված ըստ պատկերի և ըստ նմանության

Այս այս է, որ ցույց է տալիս աշխարհի ստեղծման պատմությունը, մեկ բառով՝ այն, ինչ իր մեջ պարունակում է ամեն բան, երբ «Աստված» ասում է. «Մարդ ստեղծենք մեր պատկերով և նմանությամբ» (Ծննդ. 1, 26). որովհետև այն նմանության մեջ, որը պատկերի նմանությունն է, վերագտնվում է աստվածային հատկանիշների ամբողջությունը: Եվ ինչ որ Մովսեսը մեզ պատմում է այս մասին՝ ներկայացնելով մեզ վարդապետություններ պատմողական ձևի տակ, կապվում է նույն ուսմունքին: Այսպես, օրինակ՝ գրախտը և նրա մրգերի առանձնահատկությունը. գրանք ուտելը չի հագեցնում ճաշակողների ստամոքսը, այլ նրանց տալիս է հավիտենական կյանքի ճանաչումը: Եվ այս բոլորը ներդաշնակվում է մարդու մասին մեր նախորդ խորհրդածությունների հետ, որոնց համաձայն ի սկզբանէ մեր բնությունը բարի էր և ապրում էր բարի եղող բանի մեջ¹⁹:

Մեծություն և թշվառություն

Բայց կարող է պատահել, որ այս հաստատումը վիճարկվի նրա կողմից, ով աչքի առաջ ունի մեր ներկա վիճակը: Նա կարծում է, թե կարող է ապացուցել, որ մենք ճշմարտությունը չենք ասում, որովհետև այսօր մենք մարդուն չենք տեսնում այդ բարիքների մեջ, այլ՝ գրեթե հակառակի մեջ: Արդարև, ո՞ւր է հոգու աստվածային հատկանիշը, ո՞ւր է մարմնի տառապանքի բացակայությունը, ո՞ւր է այդ հավիտենությունը: Կարճատև կյանք՝ ենթակա տառապանքի ու մահվան, հակամիտություն ենթարկվելու բոլոր տեսակի ֆիզիկական և բարոյական հիվանդությունների. ահա այն փաստարկները, որոնք նույն կարգի այլ փաս-

տարկների հետ միասին կծառայեն վիճարկողին խորտակելու մեր բնությունը, և նա այսպիսով կկարծի հերքել այն, ինչ մենք ասացինք մարդու մասին: Որպեսզի մեր սույն քննասիրությունը առաջ տարվի իր բնական ընթացքով, մենք պիտի տանք մի քանի բացատրություններ նաև այս կետի շուրջ:

Մարդկային կյանքի արդի պայմաններն անշուշտ բնական չեն, բայց դա բավական չէ ապացուցելու, որ մարդը երբեք չի ճանաչել այդ բարիքները: Մարդն Աստծու ստեղծած էակն է, և քանի որ Աստված բարի է, ծնունդ է տվել այդ էակին: Տրամաբանակա՞ն է, ուրեմն, կասկածել, որ նա, ով իր գոյությամբ պարտական է բարության, թաղված լինի դժբախտության մեջ իր իսկ ստեղծողի կողմից:

Մի ուրիշ պատճառ էլ կա, որը վերաբերում է ներկա կացությանը և ամենաթանկագին մի վիճակից զրկվելուն: Այստեղ նույնպես մեր փաստարկման մեկնակետը կարծում ենք կարժանանա մեր հակառակորդների հավանությանը: Նա, ով ստեղծել է մարդուն, որպեսզի մասնակից դարձնի նրան իր սեփական շնորհներին, այնպես է սահմանել նրա բնությունը, որ պարունակի սկզբունքն այն ամենի, ինչ գեղեցիկ է, և որ նրա հակումներից յուրաքանչյուրը նրան մղի ցանկանալու համապատասխան աստվածային ստորոգելին: Հետեւաբար, նա չէր կարող մարդուն զրկած լինել այդ ամենագեղեցիկ և ամենաթանկագին շնորհների մեկից, ուղղում եմ ասել՝ անկախ և ազատ լինելու շնորհից. որովհետև եթե ինչոր անհրաժեշտություն դեկավարեր մարդկային կյանքը, ապա այդ կետի շուրջ «Աստծու պատկեր» հասկացությունը կլիներ խաբուսիկ, քանի որ այն կեղծվեր բնօրինակի հետ ունեցած իր տարբերությամբ: Ինչպես կարողանայինք գերագույն բնության պատկեր կոչել այն, ինչը կլիներ անհրաժեշտությունների լծի և դրանց գերութ-

յան տակ: Այն, որ իր բոլոր կողմերով ստեղծված էր աստվածության պատկերի համաձայն, իր բնության մեջ իսկ պետք է ունենար ազատ և ինքնիշխան կամք, որպեսզի աստվածային չնորհներին իր մասնակցությունը լիներ իր առաքինության վարձատրությունը:

Չարի ծագումը

Բայց այն ժամանակ կասեն մեզ, թե ինչպե՞ս կլինի, որ բոլոր բնագավառներում ամենագեղեցիկ առանձնաշնորհումներով մեծարված էակը այդ շնորհների փոխարեն ստանա ստորին մի վիճակ: Այս կետի շուրջ մեր բացատրությունը պարզ է և հստակ: Զկա այնպիսի պարագա, երբ չարի ի հայտ գալն իր սկզբնապատճառն ունենա աստվածային կամքի մեջ. որովհետեւ չարը գերծ կլիներ պարսավանքներից, եթե կարողանար իրեն բիսած համարել Աստծուց՝ որպես իր ստեղծողից և հեղինակից: Ներսից է, որ չարը ծնունդ է առնում, ազատ ընտրությունն է, որ նրան տալիս է իր ամրությունն ամեն անդամ, երբ մարդու հոգին հեռանում է բարուց²⁰: Արդարեւ, ինչպես որ մարդուս տեսողությունը արդյունքն է նրա բնական մի հատկության՝ աշխատանքի, իսկ կուրությունը՝ այդ աշխատանքի բացակայության, նույն ձեռվ գոյություն ունի հակադրություն առաքինության և բարոյական արատի միջև, որովհետեւ կարելի չէ ըմբռնել չարի ծագման ուրիշ պատճառ, քան առաքինության բացակայությունը: Որ չափով, որ անհետանում է լույսը, նույն չափով մեծանում է խափարը, մինչդեռ նա գոյություն չունի լույսի ներկայությամբ: Նույնպես այնքան ժամանակ, որ բարին ներկա է մեր բնության մեջ, չարը գոյություն չունի: Բարու հեռացումն է, որ ծնունդ է տալիս իր հակառակին²¹: Ուստի, քանի որ ազատության հատուկ հատկանիշն իր ցանկությունների առարկան ազա-

տորեն ընտրելն է, Աստված պատասխանատու չէ այն չարիքներին, որոնցից գուշ տառապում եք այսօր, նա, որ ստեղծել է ձեր ինքնիշխան և ազատ բնությունը, այլ ձեր անխոհեմությունն է, որ ընտրել է վատագույնը լավագույնի փոխարեն:

Չարի պատճառը՝

իմացականը և զգացականը

6. Բայց դուք գուցե փնտրում եք, թե ո՞րն է այդ կամավոր սխալի պատճառը: Արդարեւ, հենց սա է այն հարցը, որին ձեզ բերում է մեր քննասիրության տրամաբանական շարունակությունը: Այստեղ նույնպես մենք կդտնենք տրամաբանության վրա հիմնված մի մեկնակետ, որ կպարզաբանի մեր որոնումը: Աչա այն ուսմունքը, որը մեզ փոխանցել են Եկեղեցու Հայրերը, ուսմունք, որ առասպելանման մի պատմություն չէ, այլ իր համոզիչ ուժը քաղում է մեր իսկ բնությունից:

Ստեղծված բոլոր էակների մեջ մարդկային միտքը զատորոցում է երկու աշխարհներ՝ մտահայեցողական կարգը բաժանված լինելով իմացականի և զգացականի միջև: Արանց կողքին բնության մեջ ուրիշ ոչինչ չենք կարող երևակայել, որ դուրս մնա այս բաժանումից: Մի մեծ տարածություն է բաժանում սրանց մեկը մյուսից, այնպես որ զգացականի բնությունը չի կարող դասվել իմացականի նշանների տակ, ոչ էլ իմացականը՝ զգացականի նշանների տակ: Իւրաք հակադիր որակներով են հատկանշվում մեկը և մյուսը: Արդարեւ, իմացականի բնությունն անմարմին է, անհպելի, ձև չունի: Մինչդեռ զգացականի բնությունը, ինչպես ցույց է տալիս իր անունը, ընկալվում է զգայարաններով²²:

Զգայական աշխարհում թեև հակադրությունը մեծ է այն տարրերի միջև, որոնցով նա կազմված է, սակայն որոշ

մի համաձայնություն պահպանված է այդ հակառակ տարրերի միջև տիեզերքը ղեկավարող իմաստության կողմից, և այդպես է, որ ծնվում է ամբողջ արարչագործության ներքին ներդաշնակությունը՝ բնական ոչ մեկ աններդաշնակություն չխզելով այդ համաձայնության շարունակականությունը²³: Նույն ձևով զգացականի և իմացականի միջև, ըստ աստվածային իմաստության, առաջ է գալիս մի խառնուրդ և մի բաղկացություն, որպեսզի ամեն ինչ հավասարապես մասնակցի բարուն և գոյություն ունեցող բաներից ոչինչ չբացառվի գերագույն բնությունից: Անկասկած իմացական բնությանը պատշաճող ոլորտը այն նուրբ և շարժուն է ուժությունն է, որն այն տեղի չնորհիվ, որ իր տեղն է աշխարհի վերևում, իր սեփական բնությունից դուրս է բերում մի մեծ նմանություն իմացականի հետ: Բայց բարձրագույն մի նախախնամություն կամենում է գոյացնել իմացականի և զգացականի մի խառնուրդ, որպեսզի ստեղծագործության մեջ, ինչպես մեզ ասում է Առաքյալը (Ա. Տիմ. 4, 4), ոչինչ դուրս չնետվի և ոչինչ չզրկվի աստվածային բարեշնորհումներին մասնակցելուց²⁴:

Ահա թե ինչու, մարդու մեջ ի հայտ է գալիս աստվածային բնության կողմից ստեղծված իմացականի և զգացականի խառնուրդը, ինչպես այդ ուսուցանում է աշխարհի ստեղծագործության պատմությունը. «Արդարեւ, – ասում է, – Աստված, վերցնելով հողը, կերպարանեց մարդուն և իր սեփական չնորհ կյանք տվեց իր ձեռակերտին» (Ծննդ. 2, 2): Այսպես, ինչ որ հողից էր ստեղծված, աստվածության հետ իր միացումով կբարձրանար և միակ ու նույն չնորհով կտարածվեր ամբողջ արարչագործության մեջ՝ ստորին բնությունը խառնվելով այն բնությանը, որն այս աշխարհի վերևում է:

Սատանայի նախանձը. Երկրի հրեշտակը

Իմացական աշխարհն առաջինը գոյության կոչվեց, և հրեշտակների զորություններից յուրաքանչյուրը²⁵ տեսավ, որ ամեն բան ղեկավարող իշխանության կողմից իրեն տրված է տիեզերքի կազմավորմանը վերաբերող գործունեության որոշ մի բաժին: Այսպես է, որ նրանցից մեկը հանձն էր առել պահպանել և կառավարել երկրային ոլորտը. նա այդ կարողությունն ստացել էր գերագույն Զորության կողմից: Այնուհետև ձևավորվել էր կավից ստեղծված մի դեմք գերագույն Զորության նմանողությամբ, և այդ էակը մարդն էր: Նա իր մեջ ուներ իմացական բնության գեղեցկությունը՝ խառնված թաքուն մի ուժով: Եվ ահա թե ինչու նա, որին տրված էր երկրի կառավարումը, տարօրինակ և անհանդուրժելի համարեց, որ, դուրս գալով այն բնությունից, որն իրենց կախում ուներ, երևան գա մի գոյացություն՝ կազմված գերագույն իշխանության նմանողությամբ²⁶:

Այն, ինչ ստեղծվել է, Ենթակա է փոփոխության²⁷

Բայց ինչպես եղավ, որ նախանձի կրքին կարողացավ անձնատուր լինել նա, ով ոչ մեկ վատ բանի ծառայելու նպատակով չէր ստեղծված այն Զորության կողմից, որը կազմավորել էր տիեզերքը բարի նպատակով: Մենք այս հարցը մանրամասնորեն չենք քննարկելու մեր ներկա աշխատության մեջ, բայց հնարավոր է, թեկուզ համառոտակի, մի բացատրություն տալ այն մտածողներին, որոնք քիչ թե շատ համամիտ են մեզ: Առաքինության և բարոյական արատի հակադրությունը չպետք է ըմբռնել որպես գոյացական իրականություն հանդիսացող երկու բաների հա-

կադրության դրսեորում, այլ, ինչպես որ չէությունը հակադրվում է էությանը առանց որ հնարավոր լինի ասել, թե այդ հակադրությունը գոյացական է (մեր ասածն այն է, որ չգոյությունը հակադրվում է գոյությանը), այնպես էլ բարոյական արատը հակադրվում է առաքինության գաղափարին, ոչ որովհետեւ նա գոյություն ունի իրենով, այլ որովհետեւ նա ըմբռնվում է որպես բարու բացակայություն։ Մենք ասում ենք, որ կուրությունը հակադրվում է տեսողությանը, բայց ոչ նրա համար, որ կուրությունը գոյություն ունի ինքն իրենով, որովհետեւ մի բան ունենալը նախորդում է զրկվածությանը։ Այդպես էլ, ասում ենք, չարը պետք է նկատվի որպես զրկվածություն բարուց, ճիշտ ստվերի նման, որն աճելով ուղեկցում է լույսին, երբ այն սկսում է նվազել։

Արդ, միայն անստեղծ բնությունն է, որ չգիտե, թե ինչ է շարժումը, որից առաջ է գալիս գոյացություն, կերպարանափոխություն, խաթարում։ մնացած ամեն բան, ընդհակառակը, ստեղծված լինելով, բնական կերպով ենթակա է փոփոխության, քանի որ արարչագործության գոյությունն իսկ սկզբել է մի փոփոխությամբ՝ աստվածային զորությունն անէությունը վերածելով էության։ Եվ պետք է ստեղծված համարել նաև այն զորությունը, որի մասին խոսեցինք, որն իր ազատ կամքի շարժումով ընտրում է այն, ինչն իրեն բարի է թվում։ Այն ժամանակ այդ էակը, որը փակել էր իր աչքերը բարու առջև և ճանաչել նախանձը, ինչպես այն մարդը, որն իջեցնում է իր կոպերն արևի լույսի դիմաց և տեսնում է միայն խավարը, այդ էակն ինքը ևս եկել է այն բանին, որ չի կամեցել իր միտքն ուղղել դեպի բարին, այլ խորհել է բարու հակառակը։ Եվ հենց դա է նախանձը²⁸։

Անվայլ իրեշտակը դասնում է փորձիչ

Համաձայնում ենք ընդունել, որ ամեն ինչում մեկնակետն է պատճառն այն բանի, ինչը տեղի է ունենում այնուհետև հետեւանքի ճանապարհով։ Օրինակ՝ առողջությունն իր հետեւից բերում է ֆիզիկական առույգություն, ժրաշնություն, ապրելու հաճույք. ընդհակառակը, հիվանդությանը հետեւում են թուլությունը, անգործությունը, գոյության զզվանքը։ Այսպես, ամեն ինչում հետեւանքներն առաջ են գալիս իրենց մեկնակետից։ Ուրեմն, ինչպես որ ստորին կրքերի բացակայությունը սկիզբն ու պայմանն է առաքինի մի կյանքի, այնպես էլ հակումը դեպի բարոյական արատը, որը ծնունդ է առնում նախանձից, ճանապարհ է բացում բոլոր չարիքներին, որոնք երևան են գալիս իր հետեւից։

Նա, ով մի անգամ իր մեջ ծնունդ տալով նախանձին և շեղվելով բարուց՝ սկսեց թեքվել դեպի չարը (ինչպես սարի գագաթից պոկված մի քար, որի սեփական ծանրությունը քշում տանում է նրան զառիթափն ի վար), անջատվելով բարու հետ իր ունեցած բնական նմանությունից և հակվելով դեպի բարոյական արատը, ինքնաբերաբար, ասես իր սեփական ծանրությամբ, քշվեց տարվեց դեպի ամենածայրահեղ ապականություն։ Նա Արարչից ստացել էր մտածելու կարողություն, որպեսզի աշխատի նրա հետ միասին հաղորդել բարին։ Նա այդ կարողությունը ծառայեցնում է հետագայում վատ ծրագրեր հնարելու համար։ Եվ այսպես է, որ իր խաբեություններով նա ի վերջո հաջողեց խաբել մարդուն և համոզել նրան, որ իր սեփական ձեռքով վերջ տա իր կյանքին։

Արդարեւ, մարդն աստվածային բնությունից ստացել էր մի զորություն, որը նրան դրել էր բարձր աստիճանի վրա,

որովհետև նրան հանձնարարվել էր իշխել երկրի և նրա վրա եղած ամեն ինչի վրա (Ծննդ. 1, 28-30): Նա գեղեցիկ էր, քանի որ ստեղծվել էր գեղեցկության բնօրինակի իսկ պատկերով, զերծ էր չար կրքերից, քանի որ դիմապատկերն էր նրա, ով չգիտեր չարությունը, ուներ խոսքի լիակատար ազատություն, քանի որ ապրում էր Աստծուն դեմ առ դեմ տեսնելու հաճույքով, և այս բոլորը թշնամու մեջ բորբոքում էր նախանձի կիրքը:

Մարդու անկումը

Գործադրել իր ծրագիրը ուժով և իր իշխանության բոնի կիրառում՝ թշնամին այդ անել չէր կարող, որովհետև Աստծու բարերարությունն ուներ այնպիսի մի զորություն, որ գերիւթեր էր իր բռնությունից: Ահա թե ինչու նա հնարեց մի խորամանկություն՝ մարդուն անջատելու համար այն Զորությունից, որը նրան տալիս էր իր ուժը: Այդպիսով նա դյուրությամբ մարդուն կցցեր այն թակարդի մեջ, որը պատրաստում էր նրա համար: Պատկերացրեք մի լապտեր, որի պատրույգը կրակ է առել ամեն կողմից. Եթե չհաջողվի բոցը հանգցնել փչելով նրա վրա, ապա ձեթին ջուր են խառնում և այդ հնարամտությամբ բոցը վերացնում: Նույն ձեռվ թշնամին խորամանկությամբ չար արատը մարդու ազատ կամքին խառնելով, այսպես ասած, հանգցնում, խավարեցնում է աստվածային բարերարությունը: Եվ այդ բարերարությունը վերանալով՝ նրա տեղը անվրեպ կերպով մուտք է գործում այն, ինչը հակադիր է նրան: Արդ, կյանքին հակադրվում է մահը, զորությանը՝ թուլությունը, օրհնությանը՝ անեծքը, խոսքի ազատությանը՝ ամոթի զգացումը և բոլոր բարիքներին՝ այն ամենը, ինչ համարվում է դրանց հակառակը: Եվ, ահա թե ինչու մարդկային ցեղը թաղվել է ներկա չարիքների մեջ՝ առա-

քինի քայլը հանդիսանալով այն մեկնակետը, որը նրան առաջնորդել է նման մի արդյունքի²⁹:

Արարիչը կարո՞ղ էր վատ լինել

7. Թող ոչ ոք հարց չտա իրեն, թե Աստված, երբ ստեղծեց մարդուն, նախատեսո՞ւմ էր արդյոք այն դժբախտությունը, որ մարդկային ցեղն իր վրա պիտի բերեր իր անխոհեմությամբ: Նախամեծար չէ՞ր արդյոք նրա համար բոլորվին գոյություն չունենալ, քան լինել չարիքներով շրջապատված: Այս հարցն էր, որ առաջ քաշեցին նրանք, որոնք տարվեցին մանիքեական ստապատիր վարդապետություններով՝ հիմնավորելու համար իրենց մոլորությունը. որովհետև այս հարցն է, որ նրանց ասել է տալիս, թե մարդկային բնության Արարիչը վատ էր³⁰: Արդարեւ, եթե Աստված ոչինչ չի անգիտանում այն ամենից, ինչ որ կա, և եթե մարդն ապրում է դժբախտության մեջ, ապա հնարավոր չէ պաշտպանել Աստծու բարության վարդապետությունը, քանի որ նա մարդուն գոյության կոչած կլիներ՝ նախասահմանելով՝ նրան ապրել չարիքների մեջ: Եթե բարին արարելու գործունեությունը բարի մի բնության հատկանիշն է, ապա հնարավոր չէ իսկապես այդ թշվառ և մահկանացու կյանքը բարձրացնել մի ստեղծագործության, որը լիներ բարի: Ուրեմն, այդպիսի մի կյանքի, որ ի բնե հակված է չարին, պետք է վերագրել ուրիշ մի պատճառ:

Ինչի՞ մեջ է կայանում չարը

Բերված այս բոլոր փաստարկները, ինչպես նաև նույն կարգի ուրիշ փաստարկներ, թվում է, թե որոշ ուժ են ներկայացնում (ունենալով խիստ մակերեսային մի ճշմարտանմանություն) այն մարդկանց աչքերին, որոնք խորապես տոգորված են հերետիկոսական խարենությամբ, ինչպես ա-

սես անջնջելի մի գույնով։ Դրան հակառակ՝ ավելի խորաթափանց մտածողներ հստակորեն տեսնում են, որ այս փաստարկները վատ որակի փաստարկներ են և մեր տրամադրության տակ դնում են դրանց խաբուսիկությունը ապացուցող միջոցներ։

Ինձ թվում է՝ տեղին է այս կետի շուրջ մեջ բերել (ի պաշտպանություն նրանց գեմ ուղղած մեր մեղադրանքի) հենց իր՝ Պողոս առաքյալի վկայությունը։ Արդարե, Կորնթացիներին ուղղած իր ճառի մեջ նա իրարից տարբերում է «մարմնավոր կյանքով ապրող հոգիներին և հոգեոր կյանքով ապրող հոգիներին» և այդ խոսքերով, ըստ իմ կարծիքի, ցույց է տալիս, որ զգացականությամբ չէ, որ պետք է տարբերել բարին չարից, այլ պետք է ձերբազատվել մարմնավոր իրողություններից՝ զատորոշելու համար բարու և չարի բնության առանձնահատուկ հատկանիշը։ «Մարմնավոր մարդը, ՝ ասում է նա, ՝ քննում է ամեն ինչ» (Ա. Կորնթ. 2, 15)։ Ի՞նչն է ծնունդ տվել այս երեակայածին վարդապետություններին այն մարդկանց մտքերում, ովքեր շրջանառության մեջ են դնում այս կարգի գաղափարներ։ Իմ կարծիքով դրա պատճառն այն է, որ նրանք բարին սահմանում են ըստ այն հաճույքի, որ տալիս է մարմինը։ Արդ, մարմնի բնությունը բացարձակապես ենթակա է պատահարների և տկարությունների, քանի որ մարմինը մի բաղկացություն է և գնում է դեպի քայլքայում, և այդ կարգի պատահարները, որոշ չափով, ուղեկցվում են ցավի զգացողությամբ։ Ահա այս է, որ մտածել է տալիս նրանց, թե մարդու ստեղծումը գործն է մի չար Աստծու։ Եթե նրանց մտածողությունը ավելի վեր բարձրանար, և եթե նրանք ազատելով իրենց միտքը հաճույքի տրամադրվածությունից, առանց կրքի դիտեին իրականության էությունը, ապա չէին հավատա բարոյական արատից գուրս չարի գոյությա-

նը։ Ամեն չար բան բնորոշվում է բարու բացակայությամբ, չարը չունի սեփական գոյություն, չենք կարող այն նկատել որպես իրականություն³¹։ Արդարե, ոչ մի չար բան գոյություն չունի ազատ կամքից գուրս, այլ նա իր անունն ստանում է բարու բացակայությունից։ Արդ, ինչ որ չկա, չունի իրականություն, և ինչ որ չունի իրականություն, գործը չէ նրա, ով ստեղծել է իրականությունը։

Ո՞վ է չարի պատասխանատուն

Այսպես, Աստված չի կարող համարվել չարի պատասխանատու։ Նա, որ ստեղծողն է գոյի և ոչ թե անգոյի, նա, որ տվել է տեսողությունը և ոչ թե կուրությունը, նա որ ծնունդ է տվել առաքինությանը և ոչ թե առաքինության բացակայությանը և, որպես վարձ, այն առաջարկել է նրանց, որոնք աստվածային բարիքները առաքինաբար վայելելու առանձնաշնորհն են ապրում, և դա առանց մարդկային բնությունը բոնադատությամբ ենթարկելու իր քմահաճության՝ նրան, հակառակ իր կամքին, քաշել տանելով դեպի բարին որպես անշունչ մի առարկա։ Եթե պայծառ երկնքում, երբ լույսը շողում է իր մաքուր փայլով, մեկը կամովին ծածկի իր տեսողությունը՝ իջեցնելով իր կոպերը, արեւ պատասխանատու չէ, որ նա լույսը չի տեսնում։

Գերազույն չարիքը՝ մահը

8. Բայց ինչ էլ լինի, մարդ ընդվզում է, երբ իր հայացքը դարձնում է դեպի մարմնի քայլքայումը։ Դժվարությամբ ենք ընդունում, որ մահը գալիս վերջ է գնում մեր գոյությանը։ Զարիքների վատագույնն այն է, հայտարարում են մարդիկ, որ մեր կյանքն ավարտելով դառնում ենք դիակ։ Դե ինչ, այս տխուր անհրաժեշտության մեջ մի պահ նկատի ունենանք աստվածային բարեհաճության անսահմա-

նությունը. այն ժամանակ գուցե ավելի շուտ կհասնենք այն բանին, որ հիացումով կլցվենք մարդու համար Աստծու ցուցաբերած հոգատարության նկատմամբ:

Հաճույքների վայելում – ահա թե ինչն է կյանքին կապում նրանց, որոնք ապրում են. որովհետև ով իր կյանքն անցկացնում է ցավերի մեջ, գտնում է, որ նման պայմաններում շատ ավելի լավ է բոլորովին գոյություն չունենալ, քան տանջանքների ու տառապանքի նշավակ դառնալ:

Քննենք, ուրեմն, թե նա, ով հոգացել է այս կյանքի կազմավորման մասին, առաջադրե՞լ է արդյոք մի ուրիշ նպատակ, քան մեզ ապրեցնել լավագույն պայմանների մեջ:

Մահ և հարություն

Մեր կամքի ազատ շարժումով մենք մասնակցեցինք չարին՝ հաճույքի զգացումից դրդված այն ընդունելով մեր մեջ մեղրով բարեխառնված թույնի նման: Եվ այդ մեղքի պատճառով ցած գլորվելով այն երանավետ վիճակից, որ մարդ ունենում է, երբ բացակայում են կրքերը, մենք ենթարկվեցինք մի կերպարանափոխության, որը մեզ շեղելով տարավ դեպի չարը: Ահա թե ինչու կավե անոթի նման մարդը քայքայվում և վերադառնում է հողին, որպեսզի իր կուտակած անմաքրությունից մեկընդմիշտ ազատվելով՝ հարությամբ վերանորոգվի իր նախնական ձեի մեջ³²:

Պատմաբանի նման և այլաբանությունների քողի տակ Մովսեսը մեր առջև պարզում է նմանօրինակ մի վարդապետություն: Այդ այլաբանություններն ի միջի այլոց պարունակում են շատ հստակ մի ուսմունք: Երբ երկրի առաջին մարդիկ, – ասում է նա, – (Ծննդ. 3, 21) թուլանալով, անձնատուր եղան այն բանին, ինչն արգելված էր, և զրկվեցին այն երանությունից, որ տրված էր իրենց, Տերը կաշվից զգեստներ տվեց իր ստեղծած առաջին էակներին: Հստ իս,

նա սովորական կաշվի մասին չէ, որ ուզում է խոսել այս պատմության մեջ: Արդարև, ինչպիսի՞ն են եղել այն կենդանիները, որոնք մորթվելուց և մորթազերծ լինելուց հետո այդպիսի երեակայված զգեստներ են հայթայթել նրանց համար: Բայց, քանի որ կենդանուց բաժանված ամեն մորթի մեռած բան է, ես համոզված եմ, որ այստեղ խոսքը վերաբերում է մահկանացու վիճակին: Մինչ այդ վերապահված լինելով բանականությունից գերծ բնությանը (կենդանուն)՝ կաշին այնուհետև նախախնամական հատուկ դիտավորությամբ մարդկանց է պատշաճեցվել նրա կողմից, ով հոգ էր տանում չարի նկատմամբ մեր հակվածությանը, բայց ոչ վերջնական կերպով: Արդարև, զգեստը մաս է կազմում այն բաներին, որոնք դրսից են տրվում՝ ըստ պատեհության ծառայելու մարմնի գործածությանը, առանց սակայն ամբողջացուցիչ մաս կազմելու նրա բնությանը³³:

Մահից դեպի անմահություն

Արդարև, մահկանացու վիճակը, բանականությունից զուրկ էակների վիճակի նման, ըստ նախախնամական մի ծրագրի, պատշաճեցվեց այն բնությանը, որն ստեղծված էր անմահության համար: Նա այդ բնությունը ծածկում է արտաքուստ, բայց չի հասնում ներքինին: Նա խափանում է մարդու զգայուն մասը, բայց չի դիպչում նրա աստվածային պատկերին: Արդ, զգայուն մասը քայքայվում է, բայց չի անհետանում, որովհետև անհետացումը անցում է դեպի անհություն, մինչդեռ քայքայումն այդ մասի վերադան է դեպի աշխարհի չորս տարրերը (որոնցով կազմված էր նա), այդ մասի ցրվումը: Ուրեմն, այն, ինչ գտնվում է մահկանացու այդ վիճակի մեջ, չի կորչել, նույնիսկ եթե այլևս չի կարող ըմբռնվել զգայքարանների կողմից³⁴:

Ո՞րն է պատճառը այս քայքայման: Մեր բերած օրինակն

ակնհայտորեն ցույց է տալիս դա: Զգայական ըմբռնումը սերտորեն կապված է երկրային թանձը տարրին, մինչդեռ իմացական բնությունը գերիվեր է զգայական շարժումներից և դրանցից բարձր: Երբ զգայարանները փորձության ենթարկեցին բարին զատորոշելու կարողությունը, նրանք խոտորեցին այդ կարողությունը, և բարու նկատմամբ այդ ամբողջական խոտորումը առաջ բերեց դրա հակառակը: Այն ժամանակ է, որ մեր միջից այն մասը, որն այլևս ոչ մի բանի չի ծառայում՝ իր մեջ ընդունած լինելով հակառակ տարրը, քայլայվում է: Եվ ահա դա ցույց է տալիս հետեւյալը. ենթարկենք, որ կավե մի անոթի մեջ չարակամությամբ լցրել են հալած կապար: Կապարն անոթի մեջ լցվելուց հետո սառչում է, և այլևս անհնար է լինում այն հոսեցնել անոթից դուրս: Անոթի տերն իրավունք ունենալով և տիրապետելով կավագործության արվեստին՝ ջարդում է անոթը, որը մի պատյան է ձևացնում կապարի շուրջը, ապա վերականգնում է անոթն ըստ իր նախկին ձևի, որպեսզի նրա մեջ խառնված նյութը դատարկելուց հետո կարողանա օգտագործել այն: Նույն բանն է անում նաև Արվեստագետը, որը ձևավորում է մեր սեփական անոթը. չարը խառնված լինելով մեր զգայական մասին, այսինքն՝ մարմնական տարրին, Արարիչը տարանջատելուց հետո այն նյութը, որը պարունակում էր չարը, հարության շնորհիվ նորից կձևավորի հակառակ տարրից արդեն մաքրված անոթը և, վերանորոգելով նրա տարրերը, կվերադարձնի նրան իր նախնական գեղեցկությունը³⁵:

Մարմին և հոգի

Արդ, հոգու և մարմնի միջև գոյություն ունի մի որոշ նմանություն, համատեղ մասնակցություն այն չարիքներին, որոնք ուղեկցում են սխալին, և մարմնի մահը ինչ-որ

համանմանություն ունի հոգու մահվան հետ: Ինչպես որ մենք մահ անունն ենք տալիս մարմնին, երբ այն բաժանված է լինում զգայական կյանքից, այնպես էլ մահ ենք կոչում հոգու բաժանումը ճշմարիտ կյանքից: Այս պայմաններում, քանի որ ի նկատի ունեցանք միակ և նույն մասնակցությունը չարին թե՛ հոգու և թե՛ մարմնի համար, ինչպես այդ ասվեց վերեւում, և քանի որ մեկը, ինչպես և մյուսը, նպաստում են, որ չարությունը դրսեորի իր ազդուութը, ահա թե ինչ է տեղի ունենում. մահը քայլայման ճանապարհով, որ առաջ է գալիս մեռած մորթիների գործածության պատկերով, չի հասնում, չի դիպչում հոգուն (արդարեւ, այն, ինչ բաղկացություն չէ, ինչպե՞ս կարող է քայլայվել):

Բայց նա՝ հոգին, նույնպես որոշ դարմանումով կարիք ունի ազատվելու այն արատներից, որոնք ծնվում են իր սխալներից: Ներկա կյանքում առաքինությունն է, որ գործածվել է հոգու համար իբրև դեղամիջոց՝ դարմանելու այդ տեսակի վերքերը: Եվ եթե նա մնա անբուժելի, ապա դարմանումը, ի պահ դրված, նրան սպասում է հավիտենական կյանքում:

Մարմնի հիվանդություն

Մարմինը ենթակա է զանազան տեսակի հիվանդությունների: Դրանցից մի քանիսը հեշտ է դարմանել, մյուսները՝ ոչ, իսկ այս վերջինների համար դիմում են հերձումների, խարանումների, դառնահամ դեղամիջոցների՝ վերացնելու համար այն հիվանդությունը, որ հարվածել է մարմնին: Նույն կարգի մի բան է կատարվում նաև անդենականում՝ դատաստանի ժամանակ հոգու հիվանդությունները բուժելու համար: Եթե թեթևաբարու և փոփոխամիտ ենք, ապա դա մի սպառնալիք է խստագույն պատժի,

որպեսզի ցավառիթ մի քավության վախը մեզ ստիպի խույս տալ չարից և դառնալ ավելի խոհեմ: Բայց առավել ողջամիտ մարդկանց հավատը դրա մեջ տեսնում է Աստծու կողմից գործադրող բուժման յուրատեսակ մի եղանակ՝ իր սկզբնական շնորհին վերադարձնելու այն էակին, որին նա ստեղծել է:

Արդարե, նրանք, ովքեր հերձումի կամ խարանումի միջոցով վերացնում են մարմնի վրա գոյացած հակաբնական այտուցներն ու ելունդները, առանց ցավ պատճառելու չեն կարողանում բժշկել իրենց խնամքին հանձնված մարդկանց:

Բայց նրանք հիվանդին վնաս պատճառելու համար չէ, որ կատարում են այդ հերձումը: Նույնն է պարագան նյութական այն բոլոր կոշտացումների համար, որ գոյացել են մեր հոգիների վրա, որոնք մարմնավոր են դարձել տարբեր հիվանդությունների մասնակցելու պատճառով: Դատաստանի ժամանակ դրանք կտրվում և վերացվում են նրա անպատմելի իմաստությամբ և զորությամբ, ով, ինչպես ասում է Ավետարանը, բժիշկն է չարերի. «Առողջներին բժիշկ պետք չէ, այլ՝ հիվանդներին» (Ղուկ. 5, 31, Մատթ. 9, 12, Մարկ. 2, 17):

Հոգին և չարը

Հոգու և չարի միջև հաստատված մեծ նմանության պատճառով ահա թե ինչ է տեղի ունենում. մարմնի մակերեսի վրա գոյացած ելունդի հերձումը սաստիկ ցավ է պատճառում, որովհետեւ, ինչ որ աճել, զարդացել է բնության մեջ ընդդեմ բուն իսկ բնության, մի տեսակ համակրանքով է կապվում գոյացությանը, և առաջ է գալիս օտար տարրի անսպասելի մի խառնուրդ մեր սեփական էության հետ, այնպես որ, հակաբնական տարրի անջատումը իր հե-

տևից բերում է ցավառիթ և սուր մի զգացողություն: Նույնպես, երբ հոգին ուժասպառ լինելով հյուծվում է այն կշտամբանքների մեջ, որ իր վրա է հրավիրում իր գործած մեղքը, ինչպես ասում է մարդկարեն «չարի հետ խորապես միացած լինելու պատճառով» (Սաղմ. 34, 12), այն ժամանակ անխուսափելիորեն ներկայանում է անասելի, անարտահայտելի ցավերի մի ամբողջ բազմություն, որոնք նույնքան աննկարագրելի են, որքան այն բարիքները, որոնց մենք սպասում ենք: Արդարե, ո՞չ մարդկային լեզուն և ո՞չ էլ մարդկային միտքը միջոցներ չունեն դրանք արտահայտելու համար:

Աստված չի հանդուրժում չարին

Ուրեմն, եթե ժամանակի հեռավորությունից քննենք վախճանը, որ իր իմաստությամբ առաջադրում է նա, ով կառավարում է տիեզերքը, առողջ տրամաբանությամբ չենք կարող նեղմտորեն մարդկության ստեղծողին ցույց տալ որպես իր չարիքների պատասխանատուն՝ պնդելով, թե նա կամ անգիտանում է ապագան և կամ, եթե գիտեր, քանի որ այն ստեղծել էր, ապա օտար չէ առաջմղիչ այն ուժին, որ մարդուն տանում է դեպի չարը, այսինքն՝ նա գիտեր ապագան և չի արգելել այն շարժումը, որը նախապատրաստում էր այդ ապագան:

Որ մարդկային ցեղը չեղվելու էր բարուց, դա չէր անգիտանում Տերը, որի զորությունն իշխում է ամեն ինչի վրա, և որը տեսնում է ինչպես գալիք ժամանակները, այնպես էլ անցյալը:

Բայց երբ նա մտովին ներկա էր լինում մարդկային ցեղի մոլորությանը, խորհեց նրան դեպի բարին վերադարձնելու միջոցի մասին: Ո՞րն էր ամենալավը. ամենակին կյանքի չկոչե՞լ մեր բնությունը (քանի որ նախատեսում էր, որ

մարդ արարածը հեռանալու է բարուց), թե՞ ծնունդ տալ նրան, և երբ նա հիվանդանար, զղումի ճանապարհով նրան վերակոչել իր սկզբնական շնորհին:

Աստծուն չարիքների հեղինակ անվանել մարմնական տառապանքների պատճառով, որոնք անխուսափելիորեն առաջ են գալիս մեր բնության անկայունությունից, և կամ բացարձակապես մերժել հավատալ, թե նա մարդու Արարիչն է, որպեսզի նրան չվերագրվի մեր տառապանքների պատասխանատվությունը, դա մտքի ծայրահեղ աղքատության ապացույց է այն մարդկանց մոտ, որոնք հենվում են զգացականության վրա՝ զատորշելու համար բարին չարից: Նրանք չգիտեն, որ ի բնե բարի է միայն այն, ինչ առնչություն չունի զգացականության հետ, և որ վատ է միայն մի բան՝ թշնամանքը ճշմարիտ բարու հանդեպ³⁶:

Դատել ըստ ցավի և ըստ հաճույքի այն, ինչ բարի է, և այն, ինչ բարի չէ, հատուկ է բանականությունից զուրկ բնությանը, այն էակներին, որոնց մեջ տեղ չի կարող գտնել բարու ճշմարիտ ըմբռնումը, որովհետև նրանք գործ չունեն խելքի և մտածողության հետ: Բայց մարդը ձեռակերտն է Աստծու, որը նրան ստեղծել է բարի և նախասահմանել ամենամեծ բարիքներին: Ահա այս է, որ ստուգապես ցույց են տալիս ոչ միայն այն, ինչ որ ասվեց, այլ նաև բազում ուրիշ փաստեր, որոնց վրայից լռությամբ ենք անցնում, որպեսզի չափից դուրս չտարածվենք:

Անլյալ արարածի վերականգնումը

Արդ, երբ մենք Աստծուն անվանեցինք մարդու Արարիչ, չմոռացանք այն կետերը, որ խնամքով բերված են մեր առաջարանում և որոնք վերաբերում են հեթանոսներին: Այնտեղ մենք ապացուցում էինք, որ Աստծու Բանն իր մեջ պարունակում է ստեղծարար ամեն զորություն կամ, ավե-

լի շուտ, ինքն իսկ զորություն է՝ ուղղված դեպի այն ամենը, ինչ բարի է, և իրականացնելով այն ամենը, ինչ նա արարել է, որովհետև կարողություն և ցանկություն զուգադիպում են նրա մեջ: Գոյություն ունեցող ամեն ինչի կյանքը նրա կամքն է և նրա գործը. Նա է, որ մարդուն բերել է դեպի կյանք ըստ իր պատկերի՝ նրան զարդարելուց հետո ամենագեղեցիկ առաձնագնորհումներով:

Արդ, փոփոխությունն անդիտանում է միայն այն, որի ծնունդը ստեղծագործությունից չի բխում, մինչդեռ այն ամենը, ինչ անստեղծ բնությունը դուրս է բերել անէությունից, ապրում է միշտ փոփոխության մեջ՝ իր գոյության սկզբնապատճառն իսկ պարտական լինելով այդ կերպարանափոխությանը³⁷: Արդ, արարածը գործում է ըստ իր բնության, ապա փոփոխությունը տեղի է ունենում անընդհատ դեպի լավը. բայց եթե նա շեղվել է ուղիղ ճանապարհից, ապա քշվում տարվում է դեպի հակառակ վիճակը հարատե մի շարժումով: Այս վերջին պարագան վերաբերում է մարդուն. նրա բնության փոփոխականությունը նրան գայթեցրել էր դեպի հակառակ վիճակը: Մյուս կողմից՝ բարին լրելու արարքը, մի անգամ կատարվելուց հետո, որպես հետեանք երեան է բերում չարի բոլոր ձևերը. կյանքից շեղվելու փաստն առաջացրեց մահը, լույսի բացակայությունն իր հետեւից բերեց խավարը, առաքինության կորստով երեան եկավ չարը, և այսպես է, որ բարու բոլոր ձևերը մեկառմեկ փոխարինվեցին իրենց հակադիր չարիքների մի ամբողջ շարքով: Նա, ում անմտությունը ընկղմել էր իրեն այդ չարիքների, ինչպես նաև նույն տեսակի այլ չարիքների մեջ (որովհետև այն էակը, որի բանականությունը մոլորվել էր, անկարող էր մնալ բանականության մեջ և խելամիտ մի որոշում ընդունել, քանի որ հեռացել էր խելամտությունից), ահա այդ էակը ո՞ւմ կողմից պիտի վերա-

դարձվեր իր սկզբնական վիճակի շնորհին: Ո՞ւմ էր վիճակ-ված ընկած արարածի վերականգնումը, կորսված էակին վերստին կյանքի կոչելու, մոլորված մարդուն ճիշտ ուղղություն ցույց տալու գործը, ո՞ւմ, եթե ոչ արարչագործության բացարձակ Տիրոջը: Արդարեւ, միայն նա, ով ի սկզբանե կյանք էր տվել մարդուն, միայն նա՛ ուներ կարողությունն ու մենաշնորհը վերակենդանացնելու նրան, եթե նույնիսկ նա հանգած էր: Այս է, որ մեզ սովորեցնում է ճշմարտության խորհուրդը՝ ուսուցանելով մեզ, որ Աստված ի սկզբանե ստեղծել է մարդուն և նրան փրկել իր անկումից հետո:



3. ԶՐԻՍՈՍՈՅ

Նրա մահկանացու վիճակը

9. Գոնե մինչև այստեղ ով ուշի ուշով հետևում է մեր մտքերի շղթայական ընթացքին, գուցե համաձայն լինի մեր վարդապետությանը, որովհետեւ ասվածներից ոչ մի բան նրան օտար չի թվա այն գաղափարին, որ պետք է կազմել Աստծու մասին: Բայց սրանից հետո նրա մեջ հակազդեցություն կառաջանա այն փաստերի առկայությամբ, որոնք հանդիսանում են ճշմարտության խորհրդի գլխավոր հաստատումը. օրինակ՝ Քրիստոսի մարդկային ծնունդը, նրա աճը մանկությունից մինչև չափահասություն, սնվելու և խմելու պահանջը, հոգնությունը, քունը, վիշտը և արցունքները, մատնությունը, ամբաստանությունը և դատարանը, խաչը, մահը և գերեզման դրվելը: Այս փաստերը, որ նրան պետք է ընդունել տանք մեր սուրբ կրոնի հետ միաժամանակ, բթացնում են այսպես ասած նեղմիտ մարդկանց մտքերը, այնպես որ նախապես մեր պարզած վարդապետությունները արգելում են նրան ընդունել նաև այն, ինչ դրանց շարունակությունն է կազմում: Արդարեւ, ինչ որ իսկապես արժանի է Աստծուն մեռելներից հարություն առնելու փաստի մեջ, չեն ընդունում նրանք, որովհետեւ մահը ինչ-որ նվաստացուցիչ բան ունի իր մեջ³⁸:

Գալով ինձ՝ ես մտածում եմ, որ մարդ պետք է նախ մի քիչ ազատի իր դատողությունը այն բանից, թե մարմնական ամեն բան կոպիտ է և նվաստ, որպեսզի կարողանա ըմբռնել բարին և այն տարբերել չարից: Իսկ դրա համար նախ պետք է հարց տա իրեն, թե ինչո՞վ են դրանք զատորոշվում իրարից: Կարծում եմ՝ ոչ մի խելացի մտածող չի

վիճարկի, որ գոյություն ունեցող բոլոր բաների մեջ մեկ բան միայն ի բնե ամոթալի է. չարին կապված հիվանդությունը, մինչդեռ ինչ որ օտար է չարին, զերծ է ամեն ամոթից: Արդ, այն, ինչ չի պարունակում իր մեջ ոչ մեկ ամոթալի տարր, ըմբռնվում է որպես մի բան, որ բացարձակապես մաս է կազմում բարուն, և այն, ինչ իսկապես լավ է, չի ընդունում ոչ մեկ խառնուրդ իր հակառակի հետ: Մյուս կողմից՝ ամեն բան, որ մարդկային միտքը ի հայտ է բերում բարու հասկացողության մեջ, պատշաճում է Աստծուն:

Ուրեմն, երկուսից մեկը. թող մեզ ապացուցի, որ ծնունդը, դաստիարակությունը, աճը, զարգացումը դեպի բնական հասունություն, մահվան փորձությունը և հարությունը չարի ձևեր են, կամ, եթե այս բոլորը դուրս է մնում չարից, ապա պետք է միանգամայն ընդունել, որ այն, ինչ օտար է չարին, ամոթալի ոչինչ չունի իր մեջ: Արդ, քանի որ ամոթից և չարից անխառն ամեն բան կատարելապես լավ է, ինչպես չխղճալ այն մարդկանց անմտության վրա, ովքեր պաշտպանում են մի վարդապետություն, որի համաձայն բարին չի պատշաճում Աստծուն³⁹:

Երկու բնությունների միավորում

10. Նոր առարկություն. մարդկային բնությունը մի փոքր բան է, և հեշտ է դրա սահմանը որոշել, մինչդեռ աստվածությունն անսահման է: Ինչպես հյուկեն կարող է պարունակել անսահմանը: Բայց ո՞վ է պնդում, որ անսահմանը պարփակված է սահմանների մեջ, ինչպես մի անոթի: Նույնիսկ մեր սեփական կյանքի կապակցությամբ դա այդպես չէ. մտածող բնությունը բանտարկված չէ մարմնի սահմանների մեջ: Մարմնի ծավալն անշուշտ սահմանափակ է իր առանձին մասերով, բայց հոգին ինքը, շնորհիվ մտածման շարժումների, ազատորեն տարածվում է ամբողջ

ստեղծագործության վրա, բարձրանում է մինչև երկինք, սավառնում ծովի անդունդների վրա, կտրում անցնում երկրի մակերեսը, իր գործունեության մեջ սահում գնում է մինչև ընդերկոյա սահմանները, հաճախ նույնիսկ հասնում է երկնային հրաշալիքների իմացությանը՝ առանց զգալու մարմնի ծանրությունը, որ նա քաշում տանում է իր հետեւից:

Ուրեմն, եթե մարդկային հոգին, թեև խառնված մարմնին բնական օրենքների հետևանքով, կարող է լինել ամեն տեղ, ուր ուզում է, ինչ անհրաժեշտություն է ստիպում աստվածության մասին ասել, թե նա ամեն կողմից պարփակված է մարմնավոր բնությամբ և արգելք է հանդիսանում մեզ, որ մատչելի օրինակներ գտնենք, որպեսզի Աստծու ծրագրի մասին կազմենք այնպիսի մի գաղափար, որ արժանի լինի նրան: Վերցնենք լապտերի օրինակը. տեսնում ենք, որ կրակն ամեն կողմից հարձակվում է իրեն սնուցող նյութի վրա. պարզ տրամաբանությունը նյութին կապված կրակը տարբերում է այն նյութից, որ սնուցում է կրակը, բայց փաստորեն հնարավոր չէ դրանք բաժանել իրարից՝ ցույց տալու համար բոցը ինքնին՝ բաժանված նյութից: Մեկը և մյուսը խառնված են իրար: Դե ինչ. նույն բանը կարելի է ասել մեր նյութի մասին:

Մեր բերած օրինակի մեջ հաշվի չպետք է առնել կրակի կորնչական բնությունը, այլ՝ բերված պատկերի մեջ պետք է նկատի ունենալ միայն այն, ինչ հարմար է: Մենք տեսնում ենք բոցը, որը կապված է այն բանին, ինչը սնուցում է իրեն, առանց սակայն սահմանափակվելու նյութով: Նույնպես երբ պատկերացնում ենք մի միավորում և մի մերձեցում աստվածային բնության և մարդկային բնության միջև, ի՞նչը մեզ արգելում է այդ մերձեցման մեջ պահպանել այն գաղափարը, որ պետք է կազմենք Աստծու մա-

սին այն համոզմամբ, որ աստվածությունը կարելի չէ պարփակել սահմաների մեջ, եթե այն նույնիսկ մարդու մեջ է:

Սարդեղության խորհուրդ

11. Եթե, մյուս կողմից, հարց տաք դուք ձեզ, թե ինչպե՞ս աստվածային բնությունը խառնվում է մարդկային բնությանը, հարկ կլինի նախ փնտրել, թե ի՞նչ բան է հոգու և մարմնի միավորումը: Եթե չգիտեք, թե ի՞նչ ձեռվ է հոգին միանում մարմնին, ապա մի՛ կարծեք, թե մյուս հարցը ձեր խելքի բանը կլինի:

Բայց, առաջին դեպքում, մենք ձեռք բերեցինք այն համոզումը, որ հոգին մարմնից տարբեր բնույթ ունի, քանի որ մարմինը հենց որ առանձնանում է հոգուց, դառնում է անշարժ, մեռած մի բան:

Երկրորդ դեպքում մենք ընդունում ենք նույնպես, որ աստվածային բնությունը տարբերվում է մահկանացու և կորնչական բնությունից այն իմաստով, որ նա ավելի վեհ, ավելի բարձր որակ ունի, բայց մենք չենք կարող հասկանալ, թե ինչպե՞ս է կատարվում Աստծու և մարդու այդ ներքին միավորումը:

Աստված ծնվեց մարդկային բնությամբ. այն հրաշագործությունները, որոնք վկայված են, արգելում են մեզ կասկածի տակ առնել այդ փաստը: Բայց փնտրել, թե ինչպե՞ս է եղել դա, մի ձեռնարկում է, որը վեր է մեր ըմբռնողությունից, և մենք հրաժարվում ենք դրանից: Արդարեւ, մենք այն համոզումն ունենք, որ մարմնավոր և իմանալի ամբողջ ստեղծագործությունը անմարմին և անստեղծ բնության գործն է, բայց մեր հավատը դրա համար կապված չէ ինչուի և ինչպեսի որոնմանը: Կա մի ստեղծագործություն. ահա այն, ինչ ընդունում ենք մենք և, առանց անխորհուրդ հետաքրքրասիրության, մի կողմ ենք թողնում այն հարցը,

թե ինչ ձեռվ է կազմավորվել տիեզերքը, որովհետև դա խորհրդավոր մի հարց է և չի կարող բացատրվել⁴⁰:

Աստծու գորությունը Ջրիստով մեջ

12. Աստված երեացել է մեզ մարմնավոր ձեւի մեջ, եթե դրա ապացույցներն ենք փնտրում, ապա նայենք արդյունքներին, որովհետև Աստծու գոյության մասին (ամբողջականորեն նկատի առնված) ուրիշ ապացույց չենք կարող ունենալ, քան նրա գործունեության իսկ վկայությունը: Երբ մեր հայացքը գցենք տիեզերքի վրա և քննենք աշխարհի տնտեսության տարբեր երեսները, ինչպես նաև մեր կյանքում իրագործված բարիքները աստվածային մի արարություն, կհասկանանք, որ վերեւում կա մի զորություն, որը ստեղծում է և պահպանում այն, ինչ գոյություն ունի: Նույն ձեռվ, երբ հարցը վերաբերում է Աստծուն, որը երեացել է մեզ մարմնավոր ձեռվ, աստվածության այդ հայտնության որպես բավարար ապացույց ենք համարում նրա հրաշագործությունները իրենց բազում արդյունքներով՝ մեր նշած գործերի մեջ տեսնելով այն բոլոր գծերը, որոնք հատկանշում են աստվածային բնությունը:

Աստծուն է պատկանում մարդկանց կյանք պարգևելը, Աստծուն է պատկանում պահպանել այն, ինչ գոյություն ունի իր նախախնամությամբ, Աստծուն է պատկանում սնունդ և խմելու ջուր տալ այն էակներին, որոնք, որպես բնության պարգև, ունեն մարմնավոր կյանք, Աստծուն է պատկանում բարիք անել նրան, ով կարիքի մեջ է, Աստծուն է պատկանում առողջական վիճակի վերաբարձնել նրան, ում հիվանդությունը վատթարացրել էր, Աստծուն է պատկանում նմանապես իշխել ամբողջ արարչագործության վրա՝ թե՛ ցամաքի, թե՛ ծովի, թե՛ օդից բարձր շրջանների վրա, Աստծուն է պատկանում ամեն ինչի բա-

վարարող զորություն ունենալ և, ամեն բանից առաջ, լինել մահից և ապականությունից վեր:

Եթե, ուրեմն, նրան վերաբերող պատմությունը մի կողմ թողներ այս մենաշնորհներից որևէ մեկը կամ նույն կարգի այլ մենաշնորհներ, ապա նրանք, ովքեր օտար են մնում հավատին, իրավունք կունենան գիծ քաշելու մեր կրոնի խորհրդի վրա: Բայց եթե նրա մասին պատմող պատմությունների մեջ վերագտնում ենք այն ամենը, ինչ գաղափար է տալիս Աստծու մասին, այն ժամանակ ի՞նչը կարող է արգելք հանդիսանալ հավատին:

Քրիստոսի ծնունդը և մահը

13. Բայց ասում են, թե ծնունդը և մահը հատուկ են մարմնավոր բնությանը: Ես էլ եմ ասում նույն բանը, բայց այն, ինչ նախորդել է Քրիստոսի ծննդին և հաջորդել նրա մահվանը, ընդհանուր ոչինչ չունի մեր մահկանացու բնության հետ: Արդարեւ, երբ մեր աչքերն ուղղում ենք մարդկային կյանքի երկու բեեռների վրա, իմանում ենք, թե որտեղից ենք սկիզբ առել մենք, և որտեղ է մեր վախճանը:

Մարդ արարածը իր գոյության սկիզբը պարտական է մի տկարության, իսկ իր կյանքն ավարտում է անզորության մեջ: Բայց, երբ հարցը վերաբերում է Քրիստոսին, նրա ծնունդը իր ծագումը պարտական չէ մի տկարության, իսկ նրա մահը չի հանգում անզորության վիճակի: որովհետև հաճույքը չէ, որ առաջ է բերել ծնունդը, և ոչ էլ ապականությունն է հաջորդել մահվանը (Սաղմ. 16, 10):

Այս հրաշքը ձեզ թերահավա՞տ է թողնում: Զեր թերահավատությունն ինձ հաճույք է պատճառում, որովհետև դուք ընդունում եք, որ այս հրաշքները բնության սահմաններն անցնում են հենց այն պատճառներով, որոնք կարծել

են տալիս ձեզ, թե մեր ուսմունքն անցնում է հավատի սահմանները: Որ մենք չենք կարող քարոզել մեր կրոնը՝ հենվելով բնական օրենքների վրա, ահա, իրավամբ, թե ինչը պետք է ապացուցի ձեզ աստվածությունը նրա, ով հայտնվեց մեզ: Արդարեւ, եթե այն, ինչ պատմում են Քրիստոսի մասին, մնար բնության սահմանների մեջ, ապա ո՞ւր կլիներ աստվածայինը: Բայց, եթե պատմությունն անցնում է բնության սահմանները, այն, ինչ տարակույս է առաջացնում, հենց դա է ապացուցում աստվածությունը նրա, ում մենք ավետարանում ենք:

Մարդը ծնվում է երկու անձերի միավորումից և մահվանից հետո ենթարկվում է ապականության: Եթե դուք այս նույն հատկանիշները գտնեիք մեր քարոզած վարդապետության մեջ, ապա բացարձակապես համաձայն կլինեիք մեզ հետ, որ չի կարող Աստված լինել նա, ով, ըստ մեր վկայության, ենթակա կլինի այն պայմաններին, որ հակառակ են մեր բնությանը: Արդ, դուք լսում եք, թե, ընդհակառակը, ասվում է, որ նա իրոք ունեցել է ծնունդ, բայց մաս չի կազմել մեր բնության պայմաններին հենց այն ձեի պատճառով, որով ծնվել է, և որովհետև չի ենթարկվել այն կերպարանափոխությանը, որը հանգում է ապականության: Ուրեմն, բնական տրամաբանությամբ դուք ձեր թերահավատությանը պետք է տայիք հակառակ ուղղություն, այսինքն՝ պետք է մերժեիք մտածել, թե նա սոսկ մարդ էր մյուս մարդկանց նման, որոնք ծնվում են ըստ բնության. որովհետև եթե մարդ չհավատա, թե Քրիստոսը այդ տեսակի մարդ էր, պետք է անպայման դա այն համոզմանը, որ նա Աստված էր: Արդարեւ, նա, ով մեզ հաղորդում է նրա ծննդի պատմությունը, նշում է միաժամանակ, որ նա ծնվել է մի կույսից (Մատթ. 1, Ղուկ. 2): Արդ, եթե մենք հավատում ենք նրա ծննդին այդ պատմության պատճառով, ա-

պա նույն պատճառները մեզ արգելում են կասկածել, որ նա ծնված լինի, ինչպես որ ասվել է:

Նրա մայրը կույս էր, ավելացնում է նա, ով խոսում է այդ ծննդի մասին, իսկ նա, ով հիշատակում է նրա մահը, մահվան հետ միաժամանակ հաստատում է հարությունը: Ուրեմն, եթե ձեզ հաղորդված պատմությունը մղում է ձեզ հավատալ, որ տեղի է ունեցել մահ և ծնունդ, ապա այդ նույն պատմությունը ձեզ ընդունել կտա, որ այդ ծնունդը և այդ մահը զերծ են ամեն տեսակ ապականությունից: Բայց կառարկեն մեզ, թե այս բոլորը չի մնում բնության սահմանների մեջ: Ուրեմն նա նույնպես չի մնում բնության կարգի մեջ, նա, ում ծնունդը ցույց տվեց, թե տեղի է ունեցել գերբնական պայմանների մեջ⁴¹:

Մարդեղության շարժադիրը⁴²

14. Բայց այդ գեպքում հարց են տալիս մեզ, թե ո՞րն է պատճառը, որ այդպես նվաստացրել է աստվածությունը: Ինչպե՞ս հավատալ, որ Աստված՝ այդ Անսահմանը, Անիմանալին, Անբացատրելին, նա, որ գերիվեր է ամեն ըմբռնումից և ամեն մեծությունից, խառնվում է մարդկային բնության աղտեղությանը՝ ստորության հետ իր այդ միախառնումով նվաստացնելով իր գործունեության վեհասքանչ ձևերը:

15. Այս հարցին մենք չենք վարանում տալ այնպիսի մի պատասխան, որ պատշաճ լինի աստվածային վեհությանը: Դուք ուզում եք իմանալ, թե ի՞նչ պատճառով է Աստված ծնվել մարդկության մեջ: Վերացրե՛ք կյանքից այն բարիքները, որոնք գալիս են Աստծուց, և դուք այլևս չեք կարողանա ասել, թե ի՞նչ հատկանիշներով եք ճանաչում աստվածայինը. որովհետեւ մեր ստացած բարիքներն են, որ մեզ ճանաչել են տալիս Բարերարին: Ըստ այն բանի, ինչ պա-

տահում է մեզ, մենք նմանակության հիման վրա կուահում ենք Բարերարի բնությունը: Դե ինչ, եթե սերը մարդկության նկատմամբ մասնահատուկ նշանն է աստվածային բնության, ապա դուք իմանում եք այն պատճառը, որ փնտրում էիք, դուք իմանում եք Աստծու ներկայության պատճառը մարդկության մեջ⁴³:

Այցելված մարդը

Հիվանդանալիս մեր բնությունն ուզում էր ապաքինվել, անկում կրելիս՝ բարձրացվել, մեռնելիս՝ հարություն առնել: Մենք կորցրել էինք բարու մեր ունեցվածքը: Փակված խավարի մեջ՝ հարկավոր էր լույս տալ մեզ, գերեվարված՝ սպասում էինք մի փրկչի, բանտարկված՝ օգնության, ստրկացված՝ ազատագրողի: Այս փաստերը անկարեռ՝ էին միթե, իրավունք չէի՞ն տալիս հուզելու Աստծուն այն աստիճան, որ նա իջներ մինչև մեր մարդկային բնությունը՝ այցելելու համար մեզ⁴⁴, քանի որ մարդկությունը դանվում էր ծայր աստիճան թշվառ և դժբախտ վիճակում:

Աստված չ՞ր կարող փրկել մարդուն պարզ զորությամբ

Բայց կասեն մեզ, թե Աստված կարող էր բարիք անել մարդուն՝ ինքն իսկ զերծ մնալով տկարությունից: Նա, որ ստեղծեց տիեզերքը իր կամքով և անէությունից դուրս բերեց մարդ էակին իր զորությամբ, ինչո՞ւ չօգտագործեց իր գերագույն, իր բացարձակ ազատությունը՝ պոկելու նրան իր թշնամու զորությունից և վերադարձնելու իր սկզբնական վիճակին, եթե հաճելի էր նրան այդ անել: Բայց, ահա թե ինչ. նա գնում է կողմնակի ճանապարհներով, հագնում է մարմնավոր բնություն. իր ծննդով մտնելով կյանքի մեջ՝ անցնում է հաջորդաբար բոլոր հանգրվաններով. այնուհե-

տե ճաշակում է մահը (Երբ. 2, 9) և այդպիսով հասնում իր նպատակին իր սեփական մարմնի հարությամբ։ Հնարավոր չէ՞ր միթե նրա համար, մնալով աստվածային փառքի բարձունքներում, իր մեկ հրամանով փրկել մարդուն և հրաժարվել այդ երկար շրջանաձև պտույտներից։ Ի պատասխան այս կարգի առարկությունների, մենք պարտավոր ենք հաստատել ճշմարտությունը, որպեսզի ոչինչ չկարողանա խարխել հավատը նրանց, ովքեր ուշի ուշով փնտրում են այս խորհրդի ճշգրիտ բացատրությունը։

Ամենից առաջ քննության առեք այն, ինչ ուղիղ հակադրվում է առաքինությանը (սա մի հարց է, որին մենք արդեն տվել ենք որոշ պարզաբանում)։ Ինչպես որ խավարը հակադրվում է լույսին և մահը՝ կյանքին, բարոյական արատը (և դրանից զատ ուրիշ ոչինչ) բացահայտորեն հակադրվում է առաքինությանը։ Այն բազմաթիվ բաներից, որ կարող ենք նկատի ունենալ ստեղծագործության մեջ, ոչինչ բացարձակ հակադրություն չի կազմում լույսին և կյանքին, ոչինչ՝ ո՛չ քարը, ո՛չ փայտը, ո՛չ ջուրը, ո՛չ մարդը, գոյություն ունեցող բաներից բացարձակապես ոչինչ, բացի դրանց տառացիորեն հակադրվող այն հասկացություններից, ինչպիսիք են խավարը և մահը։ Նույն բանը կարող ենք ասել առաքինության համար. ստեղծագործության մեջ ուրիշ ոչինչ չի ըմբռնվում որպես առաքինության հակադիր հասկացություն, բացի արատ հասկացությունից⁴⁵։

Մարդեղությունը չի նվաստացրել աստվածային բնությունը

Եթե մենք մեր ուսմունքի մեջ պնդեինք, թե աստվածային բնությունը ծնունդ է առել արատավոր վիճակում, այդպիսով մեր հակառակորդին առիթ տված կլինեինք

հարձակվելու մեր հավատի վրա, և աստվածային բնության մասին մեր պաշտպանած վարդապետությունը կլիներ անհարիր և անճշմարտանման, որովհետեւ սրբապղծություն կլիներ ասել, թե անձնավորված իմաստությունը, բարությունը, անապականությունը և բոլոր վսեմ գաղափարներն ու անվանումները փոխվել և վերածվել են իրենց հակադիր հասկացություններին։

Ուրեմն, եթե ճշմարիտ առաքինությունը Աստված է, եթե ոչինչ չի հակադրվում առաքինությանը բացի արատից, եթե Աստված ծնունդ է առնում ոչ թե արատի մեջ, այլ՝ մարդկային բնության, և եթե Աստծուն անարժան և նվաստացուցիչ է միայն չարին կապված տկարությունը, քանի որ Աստված չի ծնվել և չէր կարող ծնվել տկարության մեջ իր բնության իսկ պատճառով, ապա ինչո՞ւ ամաչել համաձայնելու համար, որ Աստված, այս՝ շփման մեջ է մտել մարդկային բնության հետ, երբ մարդ լինելու մեջ ոչինչ չենք տեսնում, որ հակադրվի առաքինության ըմբռնմանը։ Արդարեւ, ո՛չ տրամաբանելու, ո՛չ հասկանալու, ո՛չ ճանաչելու կարողությունը, ինչպես նաև նույն կարգի ուրիշ ոչ մեկ կարողություն, որ հասուկ է մարդ էակին, հակադրված չէ առաքինության գաղափարին։

Ի՞նչ է տկարությունը

16. Բայց մեզ կասեն, թե մեր մարմինը ենթակա է փոփոխության, և դա արդեն տկարություն է։ Նա, ով ծնունդ է առել այս մարմնի մեջ, գտնվում է տկարության վիճակի մեջ։ Արդ, աստվածությունը զերծ է տկարությունից։ Եթե ուզում են ապացուցել, որ ի բնե տկարությունից զերծ էակը գալիս է այն բանին, որ բաժանում է տկարության մի վիճակ, ուրեմն Աստծու մասին կազմում են այնպիսի մի գաղափար, որ օտար է նրան։

Այս առարկությանը մենք մի անգամ ևս կհակադրենք նույն փաստարկը։ Տկարությունը բառը գործածվում է երկու իմաստով՝ իսկական իմաստ և անհարազատ իմաստ։ Կամքի հետ առնչություն ունեցող այն շարժումը, որ մարդուն անցում է կատարել տալիս առաքինությունից դեպի արատ, իրապես տկարություն է։ Իսկ, ընդհակառակը, այն ամենը, ինչ Հաջորդաբար ներկայանում է բնության մեջ այն չափով, որ բնությունը հետեւում է իրեն հատուկ մի հաջորդականության, ավելի ճիշտ կլիներ կոչել գործունեության եղանակ, քան տկարության վիճակ։ Այդպես է, օրինակ, ծնունդը, աճը, սուբյեկտի հարակայությունը, երբ սնունդը մտնում է իր մեջ, ապա դուրս գալիս, միավորումը մարմինը կազմող տարրերի և, դրան հակառակ, այդ բաղադրության քայլայումը և տարրերի վերադարձը իրենց բնական միջավայրին։

Հստ մեր կրոնի՝ ինչի՞ հետ է շփման մեջ մտել աստվածությունը. արդյոք տկարությա՞ն հետ, բառիս իսկական իմաստով, այսինքն՝ արատի՞ հետ, թե՞ մեր բնության շարժունակության հետ։ Եթե մեր ուսմունքը պաշտպաներ, թե աստվածությունը ծնունդ է առել այն բանի մեջ, ինչն արգելված է եղել, հարկ կլիներ փախչել այնպիսի անհեթեթ մի վարդապետությունից, որը ոչ մի ողջամիտ գաղափար չէր տա աստվածային բնության մասին։ Բայց մեր վարդապետությունը հաստատում է, որ Աստված շփման մեջ է մտել մեր մարդկային բնության հետ այն դեպքում, երբ մեր բնությունը նրան է պարտական միաժամանակ թե՛ իր սկզբնական ծագումը և թե՛ իր գոյության սկզբնապատճառը։ Եթե այս այսպես է, ապա մեր քարոզած կրոնը ի՞նչ սխալ է թույլ տալիս այն գաղափարի մեջ, որ պետք է ունենալ Աստծու մասին, քանի որ Աստծու մասին մեր ունեցած գաղափարի մեջ տեղ չունի տկարության ոչ մի վիճակ՝

կապված հավատի հետ։ Առավել ևս, մենք չենք ասում բժշկի մասին, որ նա հիվանդանում է, երբ խնամում է հիվանդին. եթե նույնիսկ նա շփման մեջ է մտնում հիվանդության հետ, նա, որ խնամում է հիվանդությունը, զերծ է մնում ախտից։

Ծնունդը, կյանքը բարիքներ են

Եթե ծնունդն ինքնին տկարություն և չարիք չէ, ապա կարելի չէ տկարություն որակել կյանքը։ Տկարությունն է, որ, միանալով զգայական հաճույքին, առաջ է բերում մարդու ծնունդը, և այն մղումը, որ կենդանի էակներին քաշում տանում է գեպի չարը, մեր բնության մեկ հիվանդությունն է։ Աստված ինքը, ըստ մեր կրոնի, զերծ է թե՛ մեկից և թե՛ մյուսից։ Ուրեմն, եթե ծնունդը զերծ է եղել զգայական հաճույքից, և կյանքն էլ՝ արատից, էլ ի՞նչ տկարություն է մնում, որ արված լինի Աստծու կողմից, ինչպես ասում է մեր սուրբ կրոնը։

Մեր հակառակորդը տկարությո՞ւն է կոչում հոգու և մարմնի բաժանումը։ Այդ ժամանակ ճիշտ կլիներ շատ ավելի շուտ սկսել տկարություն անվամբ որակել այդ երկու տարրերի միավորումը. որովհետև եթե տկարություն է այն տարրերի բաժանումը, որոնք մինչ այդ միավորված էին, տկարություն է նաև մինչ այդ բաժանված նույն տարրերի միավորումը։ Արդարեւ, փոփոխություն կա երկու պարագայում էլ՝ թե՛ այն տարրերի միավորման մեջ, որոնք բաժանված էին իրարից, և թե՛ նույն տարրերի տարանջատման մեջ, որոնք կապված էին միմյանց և կազմում մեկ ամբողջություն։

Մահից դեպի կյանք

Անունը, որ տալիս են վերջնական փոփոխությանը, ստուգապես այն անունն է, որը հարմար է կոչել սկզբնական փոփոխություն: Բայց եթե առաջին փոփոխությունը, այսինքն՝ այն, որ մենք կոչում ենք ծնունդ, տկարություն չէ, արամաբանական չի լինի տկարություն համարել երկրորդը, այսինքն՝ այն, որ մենք կոչում ենք մահ, այն, որի մեջ խզված է հոգու և մարմնի միավորումը:

Գլուխ Աստծուն (*Քրիստոսին*)՝ աշա թե ինչ ենք հաստատում մենք. նա անցել է մեր բնության փոփոխության երկու փուլերից, այն փուլից, որը շփման մեջ է դնում հոգին մարմնի հետ, և մյուս փուլը, որ բաժանում է հոգին մարմնից: Նա խառնվել է այս երկու տարրերից յուրաքանչյուրին, որոնք մարդկային բաղկացության զգացական և իմացական մասն են կազմում, և այդ անպատճելի, անբացատրելի զուգախառնությամբ հասել է հետեւյալ արդյունքին՝ մի անդամ իրար միացած տարրերի՝ հոգու և մարմնի այնուհետև հավիտենական միավորմանը:

Քրիստոսի հարությունը⁴⁶

Արդարեւ, մեր բնությունը իր սեփական օրենքների հետեւանքով, նույնիսկ Քրիստոսի անձի մեջ, տարված լինելով դեպի հոգու և մարմնի բաժանումը, Աստված նորից է միացրել բաժանված մասերը՝ «կցելով» դրանք իր աստվածային զորությամբ և անխորտակելի մի միավորման մեջ վերակազմելով այն, ինչ բաժանված է եղել: Եվ ահա այս է հարությունը՝ տարանջատումից հետո իրարից բաժանված տարրերի վերադարձը դեպի անքակտելի մի միավորում, որպեսզի հիշվի առաջին չնորհը, որ կապված էր մարդկային ցեղին, և, որպեսզի մենք կարողանանք վերադառնալ հավիտենական կյանքին, երբ փտության մեջ չքանում վե-

րանում է մեր բնությանը միացած արատը, ինչպես դա տեղի է ունենում հեղուկի պարագայում. երբ այն պարունակող անոթը փշրվի, հեղուկը տարածվում և անհետանում է, և այլևս ոչինչ չկա, որ այն պարունակի:

Դեպի տիեզերական հարություն

Արդ, ինչպես որ մահը առաջին մարդու համար երեան գալով փոխանցվել էր ամբողջ մարդկային բնությանը (Հոռմ. 5, 15: Ա Կորնթ. 15, 21), այնպես էլ հարության սկիզբը, մեկ մարդու չնորհիվ, տարածվում է ամբողջ մարդկության վրա: Նա, ով իր սեփական մարմնին նորից միացրեց իր ստացած հոգին չնորհիվ իր զորության, որը հաղորդել էր թե՛ հոգուն և թե՛ մարմնին իրենց կազմության սկզբից իսկ, ընդհանուր ձևով խառնեց իմացական գոյացությունը զգացական տարրին, որովհետև տրված մղումը մինչև վախճանը հեշտությամբ հետեւեց տրամաբանական մի ընթացքի:

Արդարեւ, այն մարդկային բնության մեջ, որ նա հագել էր, հոգին վերադարձավ մարմնին տարանջատումից հետո: Եվ կարծես ա՛յդ լիներ իր մեկնակետը, միավորումն այն բանի, որը բաժանված էր, զորությամբ տարածվում է հավասարապես ամբողջ մարդկային բնության վրա: Ահա՛, այս է Աստծու ծրագրի խորհուրդը մահվան և մեռելների հարության վերաբերյալ: Աստված չարգելեց, որ մահը բաժանի հոգին մարմնից ըստ բնության անհրաժեշտ կարգի, բայց նա հարությամբ դրանք վերստին միացրեց մեկը մյուսին, որպեսզի հենց ինքը լինի մահվան և կյանքի հանդիպման կետը՝ կասեցնելով իր մեջ մահվան միջոցով առաջացած մարդկային բնության տարրալուծումը և ինքն իսկ դառնալով վերամիավորման սկիզբ բաժանված տարրերի համար⁴⁷:

4. ԱՍՏԾՈՒ ԽՈՐՀՈՒԹՅՈՒՆ

Աստծու վարմունքի անհմանալիությունը

17. Բայց կպնդեն, թե այն առարկությունը, որ արվել է ի հակադրություն մեզ, դեռևս չի ստացել իր լուծումը. ընդհակառակը, ինչ որ ասվեց, նոր ուժ կհաղորդի թերահավատների փաստարկմանը: Արդարե, եթե Աստված ունի այն ամբողջ գորությունը, որն ապացուցվեց մեր ատենախոսությամբ, եթե նրան է տրված խորտակել մահը և ուղի բացել մուտք գործելու դեպի կյանք, ապա ինչո՞ւ չի իրագործում հենց միայն իր կամքով ինչ որ որոշել է, փոխանակ մեր փրկության գործը ի կատար ածելու կողմնակի միջոցով, այսինքն՝ գալով աշխարհ, մեծանալով, ճաշակելով մահը, որպեսզի փրկի մարդուն, մինչդեռ կարող էր առանց այդ ճանապարհով անցնելու ապահովել մեր փրկագործությունը:

Ի պատասխան այսպիսի խոսքերի, բավական է սոսկ դիտել տալ իսելամիտ մարդկանց, որ հիվանդներն իրենք չեն, որ բժիշկներին ծշտում են, թե ինչ բնույթի խնամք պետք է ցույց տրվի իրենց. Նրանք չեն վիճում իրենց բարերարների հետ դարձանանան ձևի մասին՝ հարցնելով, թե ինչո՞ւ իրենց խնամող բժիշկը դիպչում է մարմնի ա՛յդ հիվանդ մասին և հանձնարարում այդպիսի՝ մի դեղ՝ հիվանդությունից ազատելու համար իրենց, մինչդեռ նա պետք է գործածեր մի ուրիշ միջոց: Ընդհակառակը, նրանց համար կարեորը արդյունքն է, և նրանք երախտագիտությամբ են ընդունում մատուցված ծառայությունը:

Իրականում, ինչպես ասում է մարդարեն (Սաղմ. 31, 20), եթե աստվածային բարությունն անսահման է, ապա նրա

օգնությունը ծածուկ է մնում մեզ համար, այն դեռևս որոշակի կերպով չի երևում մեր ներկա կյանքում. որովհետեւ թերահավատների բոլոր առարկությունները կվերանային, եթե մեր ակնկալութան առարկան լիներ մեր աչքերի առջև: Բայց իրականում նա սպասում է գալիք դարերին, որպեսզի հայտնի դառնա այն, ինչ այսօր մենք կարող ենք տեսնել միայն հավատի աչքերով: Քանի որ այս այսպես է, ուրեմն հարկավոր է, հնարավորության սահմանում, դիմել որոշ դատողությունների, որոնք թույլ կտան լուծել ներկա դժվարությունները՝ հաշվի առնելով այն, ինչ նախորդում է:

Կոավաշտության անհետացումը

18. Եվ, սակայն, եթե համոզված ենք, որ Աստված եկել է քնակվելու մեր կյանքում, գուցե անօգուտ է քննադատել նրա ներկայությունը՝ պնդելով, որ այդ ներկայությունը ի հայտ չի եկել որոշ մի իմաստության և գերագույն մի տրամաբանության համաձայն. որովհետեւ այն մտածողների համար, որոնք շատ հակառակ չեն ճշմարտությանը, կա արդեն այդ աստվածային այցելությանը վերաբերող մի փաստ, որը պետք չէ անտեսել. այդ այցելությունը հայտնվեց առանց սպասելու ապագա կյանքին, մեր ներկա՝ գոյության ընթացքում, ուղղում եմ ասել՝ այդ այցելության վկայությունը փաստերն իրենք են հայթայթում:

Արդարե, ո՞վ չգիտե, թե դեերի խորամանկությունը ինչպես էր հասել իր նպատակին երկրի վրա և տեր դարձել մարդկային կյանքին կուռքերի անիմաստ պաշտամունքով, թե աշխարհի բոլոր ժողովուրդների մոտ ինչպիսին էր սովորությունը կուռքերի ձևի տակ մեծարելու դեերին անսունների զոհագործումով և զոհասեղանի վրա հանված զոհերի արյան հեղումով:

Բայց, ինչպես Առաքյալն է ասում (Տիտ. 2, 11), հենց որ հայտնվեց Աստծու չնորհը որպես փրկության աղբյուր բոլոր մարդկանց, չնորհ, որ եկել էր այցելելու մեջ մարդկային բնության կերպարանքով, ամեն ինչ անհետացավ ծխի նման. դադարեցին պատգամախոսների հիմարաբանություններն ու գուշակությունները, վերացան հեթանոսների հանդիսավոր թափորները, ջնջվեցին մորթված հարյուրավոր զվարակների արյան ճապաղիքները, և ժողովուրդների մեծ մասի մոտ ամբողջովին անհետացան զոհասեղանները, տաճարների նախադռները, սրբազն շրջապարսիպները, սրբագործված պատկերների ընդօրինակություններն ու այն ամենը, ինչ ինսամքով շրջապատում էին դեերի պաշտոնյաները՝ խաբելու համար իրենք իրենց, ինչպես և այն մարդկանց, որոնց հանդիպում էին. այնպես որ շատ վայրերում նույնիսկ չի հիշվում, թե այս բաները երբեմ գոյություն ունեցե՞լ են անցյալում։ Դրանց փոխարեն, ամբողջ երկրի վրա⁴⁸, Քրիստոսի անունով երեան եկան եկեղեցիներ ու խորաններ, մեծափառ և անարյուն զոհագործումը Փրկչի, աստվածատուր իմաստությունը, որն առաջորդվում է ավելի շուտ գործերով, քան խոսքերով, և՝ արհամարհանքը կյանքի, և՝ քամահրանքը մահվան։ Այս է, որ բացահայտորեն ցույց տվեցին նրան, ում բռնակալներն ուղղում էին ստիպել, որ ուրանան իրենց հավատը, նրանք, ովքեր անտարբերությամբ էին ընդունում իրենց պարտադրված մարմնական չարչարանքներն ու իրենց դատապարտությունը մահվան, ինչ որ, բնականաբար, այդպիսի հաստատակամությամբ չէին կարող տանել, եթե չունենային այն ստույգ և աներկբայելի ապացույցը, թե Աստված բնակվում է մեր մեջ։

Երուսաղեմի տաճարի կործանումը⁴⁹

Ահա մի փաստ, որ կարող է գրվել հրեաների առաջ որպես բավարար ապացույց երկրի վրա Քրիստոսի գալստյան, որին նրանք մերժում են հավատալ։ Մինչև Քրիստոսի հայտնությունը նրանց մոտ շողջողում էր երուսաղեմի պալատը՝ հեռավոր երկրներում հոչակված այդ տաճարը, հանդիսավոր զոհագործություններ էին տեղի ունենում ամեն տարի ըստ նրանց օրենքի։ Այն ամենը, ինչ օրենքով հաստատվել էր քողարկված ձեւի տակ այն մարդկանց համար, որոնք ընդունակ էին հասկանալու դրանց խորհրդավոր իմաստը, շարունակվեց մինչև այդ պահը առանց հանդիպելու որևէ արգելքի, համաձայն կրոնական ներկա ծեսերի, որոնք գոյություն են ունեցել հենց սկզբից։ Այնուհետև նրանք տեսան նրան, ով սպասվում էր, նրան, ում մարդարեների ձայնը և օրենքը ցույց էր տվել նախապես։ Բայց, փոխանակ հավատալու նրա հայտնությանը, նրանք նախընտրեցին այն, ինչ այնուհետև դարձել էր սնոտի մի երկյուղ միայն, որ նրանք վատ էին մեկնաբանում՝ կառչելով օրենքի տառից, ստրկորեն կապված մնալով ավելի շուտ սովորութին, քան առողջ մտածողությանը։ Ուրեմն նրանք չկարողացան ընդունել այն շնորհը, որ հայտնված էր իրենց, և նրանց պաշտամունքի մեծաշուք արարողությունները գոյատեսեցին միայն պատմությունների մեջ որպես հիշատակ։ Նրանց տաճարի հետքերն անդամ հայտնի չեն այսօր։ Երբեմնի հոյակապ քաղաքից մնում են միայն ավերակներ, և հրեաներն իրենց օրենքի հին հրահանգներից ոչ մեկը չեն պահել։ Նույնիսկ երուսաղեմում արգելված է նրանց մուտք գործել իրենց սրբավայրից ներս վեհապետների հրամանագրով։

Աստծու բնությունը

19. Այսուհանդերձ, ո՞չ հեթանոսները և ո՞չ էլ հրեական վարդապետությունների պաշտպանները չեն ուղղում դրա մեջ տեսնել աստվածային ներկայության ապացույցները։ Հետեւաբար, պատասխանելու համար մեր դեմ ուղղված առարկություններին, լավ կլինի մեր ատենաբանության մեջ մանրամասնորեն բացատրել, թե ինչո՞ւ աստվածային բնությունը միանում է մեր բնությանը՝ ինքն իսկ մտնելով մեր բնության մեջ, փրկելու համար մարդկային ցեղը, փոխանակ հրամաններ տալու, որպեսզի իրականացնի իր ծրագիրը։ Այս պայմաններում ի՞նչ կարող էր լինել մեր մեկնակետը, որը թույլ կտար մեզ արամաբանական հետեւողականությամբ մեր ատենաբանությունը տանել հասցնել իր առաջադրած նպատակին։ Կա՞ ուրիշ մեկնակետ, քան ամփոփումը Աստծու մասին այն ըմբռնումների, որ բարեպաշտությունն է թելադրում մեզ։

Աստծու ստորոգելիները

20. Բոլորը համաձայն են այդ մեկնակետին. այսինքն՝ պետք է հավատալ, որ Աստված ունի ոչ միայն զորություն, այլև՝ արդարություն, բարություն, իմաստություն և այն ամենը, որ մարդուս մտածումը տանում է դեպի վսեմն ու բարձրագույնը։ Ուրեմն այն ծրագրի համար, որի մասին խոսում ենք, հնարավոր չէ, որ այս ստորոգելիներից, որոնք պատշաճում են Աստծուն, ի հայտ գա այս մեկը և ոչ թե մեկ ուրիշը. որովհետև այս ստորոգելիներից բացարձակապես չկա ոչ մեկը, որն ինքն իր մեջ և միայն իրենով համապատասխանի առաքինությանը՝ անկախաբար մյոււսներից։ Այսպես՝ բարությունը ճմարտապես բարի չէ, եթե նրա կողքին տեղ չկա արդարության, իմաստության և զորության համար, որովհետև արդարության կամ իմաստության

կամ զորության բացակայությունը չի կարող լինել բարին։ Նույնպես, եթե զորությունը բաժանված է արդարությունից կամ իմաստությունից, ապա ըմբռնելի չէ, որ մաս կազմի առաքինությանը, որովհետև իր այդ ձեւի մեջ նա վայրենություն է և բռնություն։ Այսպես էլ մյուս ստորոգելիները. եթե իմաստությունը չի ուղեկցում արդարությանը, կամ եթե արդարությունն ըմբռնվի առանց զորության կամ բարության, ապա այդ պայմաններում դրանք իրավագիրեն ավելի ճիշտ կլիներ կոչել «արատ» անունով. որովհետև ինչպես կարելի է բարի բաների թվում համարել այն, ինչ պակասում է բարձրագույն տարրից։

Աստծու բարությունը

Աստծու մասին մեր ունեցած գաղափարների մեջ հարկավոր է, որ այս բոլոր ստորոգելիները միացած լինեն։ Պետք է քննենք նաև, թե մարդուն վերաբերող աստվածային ծրագրին պակասո՞ւմ է արդյոք Աստծու մասին մեր կազմելիք գաղափարներից որևէ մեկը։ Աստծու մեջ մենք փնտրում ենք այն բոլոր նշանները, որ նա ցույց է տալիս իր բարության վերաբերյալ։ Եվ նրա բարության ո՞ր վկայությունը կարող է ավելի ակներև լինել, քան նրա պահանջը, որ թշնամու կողմն անցած դասալիք մարդը վերադառնա, առանց որ մարդկային կամքի հեղհեղուկությունը միանգամից խաթարի բարու մեջ հաստատ և անհողողդ մարդկային բնությունը։ Արդարեւ, նա եկած չէր լինի փրկելու մեզ, ինչպես ասում է Դավիթը (Սաղմ. 106, 4-5: 119, 65-66: 68), եթե նրա բարությունը նրան ներշնչած չլիներ այդպիսի մի ծրագիր։

Բայց այդ ծրագրի բարությունը օգուտ չէր ունենա, եթե իմաստությունը գործի մղած չլիներ սերը մարդկության հանդեպ։ Եվ, արդարեւ, երբ հարցը հիվանդներին է վերա-

բերում, բազմաթիվ են նրանք, ովքեր ցանկանում են տառապղոլ մարդուն ազատված տեսնել իր ցավերից, բայց հիշվանդների նկատմամբ իրենց բարի կամեցողությունը մինչև նրանց ապաքինումը երկարաձգում են միայն նրանք, որոնց գիտությունը կարող է փութաջանությամբ գործել հիվանդներին բժշկելու համար։ Ուրեմն հարկավոր է, որ իմաստությունը սերտորեն կապված լինի բարությանը։

Ինչպես է գործնականում բացահայտվում իմաստության և բարության այդ միավորումը։ Հնարավոր չէ ըմբռնել մտադրության բարությունը ինքն իր մեջ, առանձնակի, որովհետև ի՞նչ ձեռվ մտադրությունը երևան կդար, եթե չլինեին գործերը՝ ցույց տալու համար այն։ Բայց գործերի շաղկապվածությունը և այն կարգը, որի համաձայն կատարվում են դրանք, հստակորեն երևան են բերում աստվածային ծրագրի իմաստությունը։

Եվ քանի որ իմաստությունը, ինչպես ասվեց վերևում, առաքինություն է, պայմանով որ այն զուգակցված լինի արդարությանը, իսկ եթե բաժանված է արդարությունից և մեկուսացած, ապա, ինքնին վերցրած, այլևս բարիք չի լինի, հետևաբար, երբ խոսում ենք մարդուն առնչվող Աստծու ծրագրի մասին, լավ կլինի մեր մտքում միացնել նաև այս երկու ստորոգելիները՝ իմաստությունը և արդարությունը։

Աստծու արդարությունը

21. Ի՞նչ է արդարությունը։ Վերհիշենք մեր ատենաբանության սկզբում հաստատված կետերը՝ ըստ գաղափարների բնական շարունակության։ Մարդը ստեղծվել է աստվածային բնության պատկերով։ Նա պահպանում է աստվածության հետ իր այդ նմանությունը շնորհիվ իր ունեցած առանձնաշնորհումների և իր ազատ կամքի։ Բայց նրա

բնությունը անհրաժեշտորեն փոփոխական է։ Արդարեւ, նրա գոյության սկզբն իսկ պայմանավորված լինելով փոփոխությամբ՝ անկարելի է, որ նա հակամետ չլինի փոփոխության։ որովհետև անցումը անհությունից դեպի գոյություն ինքնին փոփոխություն է։ չությունը վերածվում է էության աստվածային զորության շնորհիվ։ Եվ փոփոխությունը անխուսափելիորեն նկատվում է մարդու մոտ առավել ևս, որ մարդը սոսկ աստվածային բնության ընդօրինակությունն է։ Արդ, եթե ընդօրինակությունը ոչ մի տարբերություն չպարունակի իր մեջ, ապա բացարձակապես կշփոթվի այն բանի հետ, ինչ նա վերաբատադրում է⁵⁰։

Տարբերություն պատկերի և բնօրինակի միջև

Եվ ահա թե ինչ բանի մեջ է կայանում պատկերի և բնօրինակի միջև գոյություն ունեցող տարբերությունը. բնօրինակը իր բնույթով անփոփոխ է, մինչ պատկերի գոյությունը պայմանավորված է փոփոխությամբ (մենք արդեն ցույց տվեցինք դա) և, ենթակա լինելով փոփոխության, չի կարող մնալ մարդ էակի մեջ։

Փոփոխությունը մի շարժում է, որ անընդհատ լքել է տալիս ներկա վիճակը և այն փոփարինում մի այլ վիճակով։ Այս կարգի շարժումը դրսեղորվում է երկու ձեռվ. մի ձեր մեջ նա միշտ ձգտում է դեպի բարին, և այդ դեպքում նրա առաջընթացը դադար չի ճանաչում, քանի որ նրա անցած տարածությունը սահման չունի, իսկ մյուս ձեր մեջ նա ձգտում է դեպի հակառակ վիճակը, որի էությունը գոյություն չունենալու է։ Արդարեւ, բարու հակառակը, ինչպես ասվեց վերևում, հակադրվում է բարուն մոտավորապես այն իմաստով, երբ մենք ասում ենք, թե ինչ որ գոյություն չունի, հակադրվում է այն բանին, ինչ որ գոյություն ունի, այսինքն՝ անգոն՝ գոյին։ Արդ, ձգտման և շարժ-

ման մեջ, որոնք ուղեկցվում են տարբերակմամբ և փոփոխմամբ, անկարելի է, որ բնությունը մնա անփոփոխ ինքն իր մեջ. մեր կամքն ամբողջովին ձգտում է դեպի մի նպատակ, քանզի բարու նրա ցանկությունը բնական կերպով նրան դնում է շարժման մեջ:

Բարու ձերը

Բայց բարին ունի երկու ձեւ. մեկը՝ ճշմարիտ և բնական, մյուսը՝ բոլորովին տարբեր նրանից և գունավորված սոսկ բարու տեսքով: Մեր ներսում հաստատված իմացականությունն է, որ մեզ թույլ է տալիս դատել այդ մասին. նրանով է, որ մենք կա՛մ բախտ ենք ունենում հասնելու ճշմարիտ բարուն և կամ վտանգելու մեզ՝ ինչ-որ խաբուսիկ երեսութիւ պատճառով շեղվելով բարուց և ընկնելով հակառակ վիճակի մեջ, ինչպես այդ պատահեց հեթանոսական առակի շան հետ⁵¹, որը, ջրի մեջ տեսնելով իր երախում բռնած որսի արտացոլանքը, բաց թողեց իսկական որսը. նա բացեց իր երախը՝ կուլ տալու համար իր որսի պատկերը և այդպիսով սաստիկ տանջվեց քաղցից:

Ուրեմն, այնպես պատահեց, որ իմացականությունը ճշմարիտ բարու իր ցանկության մեջ մոլորվելով՝ շեղվեց դեպի գոյություն չունեցող մի բան. վատ խորհրդատուի՝ արատի հնարչի խորամանկությունը համոզեց նրան, որ հենց բարու հակառակն է բարին (արդարեւ, խաբեռությունը չէր հաջողվի, եթե արատի կարթը երեսապատված չլիներ բարու երեսութով իբրև խայծ), և մարդը կամովին ընկապ այդ դժբախտության մեջ, երբ հաճույքը մղել էր նրան ենթարկվելու կյանքի թշնամուն:⁵² Այժմ աշխատեք ուշադիր կերպով զննել ինձ հետ այն բոլոր ստորոգելիները, որոնք պատշաճում են Աստծու մասին մեր կազմած գաղափարներին. բարությունը, արդարությունը, գորությունը, անա-

պականությունը և այն ամենը, ինչ հատկանշում է Գերագույն էակին: Նա բարի է, ուստի խղճում է ընկած մարդուն. և քանի որ իմաստուն է, չի անդիտանում նրան բարձրացնելու միջոցները: Տարբերել այն, ինչ արդար է, նմանապես մաս է կազմում նրա իմաստությանը, որովհետև կարելի չէ ճշմարիտ արդարությունը միախառնել անմտության հետ:

Արդարություն և փրկանք

22. Հաշվի առնելով այս ամենը՝ ի՞նչ բանի մեջ է կայանում արդարությունը: Ոչ մի բոնություն չգործադրել նրա դեմ, ով մեզ կալանքի տակ էր պահում բացարձակ և բռնի մի իշխանությամբ, և գերագույն մի ուժով ձերբազատվելով այդ տիրոջից՝ խարդավանքի և զեղծարարության ոչ մի առիթ չժողնել նրան, ով հաճույքի միջոցով ստրկացրել էր մարդուն: Նրանք, ովքեր փողի համար վաճառել են իրենց սեփական ազատությունը, ստրուկներն են իրենց գնորդների. Նրանք հենց իրենք են դարձել վաճառողները՝ իրենց սեփական անձի, և ո՛չ իրենց, ո՛չ էլ իրենց օգտին միջամտող ուրիշ որևէ մեկին չի թույլատրվում բարձրադադակ պահանջել նրանց ազատությունը, եթե նույնիսկ իրենք իրենց այդ վիճակի մեջ դրած մարդիկ ունեն ազնվական ծագում:

Եթե վաճառված անձի նկատմամբ հոգատարության զգացումից մղված՝ մեկը բռնության դիմի գնորդի դեմ, ապա նա կհամարվի մեղավոր, քանի որ նա բռնակալական միջոցներով ձեռք բերած կլինի նրան, ով օրինավորապես էլ գնված: Դրան հակառակ, եթե մեկը ցանկանա փրկել նրան, ոչ մի օրենք չի հակադրվի այդ բանին: Նույն ձեռով քանի որ մենք կամովին էինք վաճառվել, նա, ով բարեհաճությամբ կվերցնի մեզ ազատության վերադարձնելու հա-

մար, պետք է դիմի ոչ թե փրկության բոնակալական միջոցի, այլ՝ այնպիսի մի միջոցի, որը համապատասխան լինի արդարությանը։ Արդ, այս կարգի մի միջոցի դիմել էր նշանակում թողնել դեին, որ ինքն ընտրի այն փրկագինը, որ ուզում էր ստանալ նրա փոխարեն, ում պահում էր կալանքի տակ⁵³:

Մարդկության փրկագինը

23. Ի՞նչ էր, ուրեմն, այն փրկագինը, որ բնականաբար դեր նախընտրում էր ստանալ։ Շարունակելով մեր դատողությունը՝ կարող ենք գաղափար կազմել նրա ցանկության մասին, եթե ճիշտ է, որ այն կետերը, որոնք ակնհայտ են, մեզ ցույց տան բավարար նշաններ մեր ներկա հետազոտության համար։ Նա, ով, ըստ այս ուսումնասիրության սկզբում ցույց տրված վարդապետության, փակել էր իր աչքերը բարու առաջ, որովհետև նախանձում էր մարդու երջանկությանը և հենց իր ներսում ծնունդ էր տվել արատի խավարածին զորությանը, նա, ով տառապում էր հրվանդագին փառատենչությամբ (որը անկման սկիզբն ու հիմքն էր կազմում և, այսպես ասած, մայրն էր մյուս արատին), ինչի՞ դիմաց պիտի ընդուներ փոխանակել նրան, ում պահում էր իր կալանքի տակ, եթե ոչ այն էակի, որը գերազանցում էր իրեն իր բարձրությամբ ու մեծությամբ։ Այսպիսով նա կկարողանար լիուլի գոհացնել իրեն կուրացնող կիրքը, քանի որ կստանար ավելին, քան տալիս էր։

Աստծու հրաշագործությունը փրկության պատմության մեջ⁵⁴

Բայց բոլոր դարերի պատմության մեջ նա կստահաբար չէր ճանաչում ոչինչ, որ նման լիներ այն բանին, որը

հայտնվում էր իրեն այս դեպքում։ Հղություն, որ արգասիքը չէր զուգավորման, ծնունդ, որ զերծ էր ապականությունից, դիեցում մի կույսի կողմից, անտեսանելի ոլորտներից բարձրացող ձայներ, որոնք վերևից հաստատում էին, թե ինչպիսի հրաշալի բան ուներ իր մեջ այս վիճակը, առանց հատուկ ջանք գործադրելու և առանց որևէ դեղամիջոցի անբուժելի հիվանդությունների բժշկում միանգամից, կամքի մի պարզ շարժումով մեռելների վերադարձ դեպի կյանք, դիվահարների ազատում, դևերին ներշնչած սարսափ, նաև՝ մթնոլորտային երկույթներին հրամայելու իշխանություն (Մատթ. 8, 25-27), ծովի վրա քայլելու կարողություն (Մատթ. 14, 25-26. Մարկ. 6, 48-49. Ղովհ. 6, 49). այս անգամ ալիքները չէին ճեղքվում երկու մասի՝ բաց անելով անդնդի խորքը, որպեսզի թույլ տրվի եկվորներին կտրել անցնել ծովը, ինչպես այդ կատարվեց Մովսեսի հրաշքում (Ելից, 14, 21-22), այլ ջրի մակերեսը պնդանում էր ոտքերի տակ և մի տեսակ դիմացկունություն տալով՝ վեր էր պահում քայլերը ջրի երեսին։ Եվ դեռ պետք է հիշել նրա անտարբերությունը սննդի նկատմամբ այնքան երկար ժամանակ, որքան նա ուզում էր, բացօթյա ճաշերը, որ վայելեցին անապատում հազարավոր մարդիկ։ Երկնքից մանանա չէր թափվում նրանց համար, հողը բերք չէր տալիս՝ գոհացնելու համար նրանց կարիքները, աստվածային զորության առատաձեռնությունն էր, որ լայնորեն բաց էր անում իր խորհրդավոր գանձերը նրանց համար։ Հացը, որպես հողի արտադրանք, իրեն-իրեն հայտնվում էր մատուցողների ճեռքերի մեջ պատրաստ վիճակում և բազմանում այնչափ, մինչև ճաշի մասնակիցները հագենային։ Դա ընտիր մի խրախճանք էր՝ ճոխացած առատ ձկներով։ ծովը չէր, որ նպաստել էր ճաշի կարիքներին, այլ՝ նա, ով ծովում տարածել էր ձկների տեսակները։

Քրիստուր որպես փրկագին

Ինչպե՞ս մեկ առ մեկ թվարկել Ավետարանի բոլոր հրաշքները: Այս զորության առջև թշնամին հասկացավ, որ այդ փոխանակությունը նրան տալիս էր ավելին, քան նա ուներ: Ահա թե ինչու նա Փրկչին ընտրեց որպես փրկագին այն բոլոր բանտարկյալների, որոնք արգելափակված էին մահվան խավար արգելաբանում: Բայց անկարելի էր, որ նա կարողանար դեմ առ դեմ նայել Աստծու տեսիլքին, եթե այդ տեսիլքը ներկայանում էր առանց շղարշի: Նա պետք է նրա մեջ տեսներ մարմնական հագուստը, որ մեղքը դրել էր իր իշխանության տակ: Նաև աստվածությունը թաքնվել էր մարմնական ծածկույթի տակ, որպեսզի թշնամին իր աչքերի առաջ ունենալով այն, ինչ սովորական և ընտանի էր իր համար, չսարսափեր գերագույն զորության մերձեցումից և, տեսնելով այդ զորությունը, որի լույսը հետզետե մեծանում էր հրաշքների միջով, այդ երկույթը համարեր արժանի ավելի ցանկություն ներշնչելու, քան սարսափ առաջացնելու⁵⁵:

Բարություն և արդարություն

Դուք տեսնում եք, թե ինչպես բարությունը միացել է արդարությանը, և թե ինչպես իմաստությունը չի բաժանվել դրանցից: Աստվածության զորությունը, ծածկվելով մարմնով, ուզեց մատչելի դառնալ, որպեսզի մեր փրկության ծրագիրը չխափանվի աստվածային հայտնության սարսափից:

Ահա այս է, որ ապացուցում է միաժամանակ բարությունը, իմաստությունը և արդարությունը: Մեզ փրկելու ցանկությունը բարության վկայությունն է. ստրկացված մարդ արարածի փրկության գործին պայմանագրի ձև տալը ցույց է տալիս նրա արդարությունը. թույլատրել թշնա-

մուն, որ անմատչելին մատչելի դարձնի, գերագույն իմաստության ապացույց է:

Սարդեղությամբ հայտնված զորություն

24. Բայց, եթե ուշադրություն դարձվի մեր ատենաբանության տրամաբանական առաջընթացին, ապա բնական է փնտրել, թե հիշատակված փաստերի մեջ որտե՛ղ է հայտնվում աստվածային կարողությունը, կամ որտե՛ղ է աստվածային զորության անապականությունը: Որպեսզի այս բոլորը լինի կատարելապես հստակ, քննենք ուշի ուշով մարդեղության խորհրդի շարունակությունը, ուր լավագույնս դրսևորվում է աստվածային զորության խառնուրդը մարդկության հանդեպ նրա սիրո հետ:

Աստծու էջը երկիր

Ամենից առաջ այն փաստը, որ ամենազոր բնությունը կարողացել է իջնել մինչև մարդկությունը, մինչև մարդկային խոնարհ վիճակը, մեծագույն ապացույցն է նրա զորության, ավելի մեծ, քան նրա կարեոր և զարմանալի հրաշքները. որովհետև աստվածային զորության համար մի մեծ և վեհասաքանչ գործ կատարելը նրա բնության տրամաբանական հետեանքն է միայն: Եվ բոլորովին էլ արտասովոր բան չի լինի ասել, որ տիեզերքում բովանդակված ամբողջ ստեղծագործությունն ու այն ամենը, ինչ գոյություն ունի տեսանելի աշխարհից դուրս, կազմավորվել է աստվածային զորության շնորհիվ՝ Աստծու կամքն իսկ, ըստ նրա ցանկության, կերպարանափոխված լինելով գոյացության: Բայց որ Աստված իջած լինի մինչև մեր նվաստ վիճակը, ահա թե ինչն է ցույց տալիս նրա կարողության առավելությունը, այն կարողության, որը խոչընդուռ չի ճանաչում նույնիսկ իր բնությանը հակառակ այս պայմաններում:

Վերսահն բարձրացում

Բարձրանալու ձգտումը հատուկ է կրակին, և ոչ ոք չի զարմանա բոցի համար շատ բնական այս երևութի վրա: Բայց երբ տեսնում ենք, որ բոցն ուղղվում է դեպի ցած, ինչպես այդ անում են ծանրաքաշ մարմինները, զարմանալի ենք գտնում այդպիսի մի երևութի: Ինչպե՞ս է, որ բոցը, բոց մնալով հանդերձ, գուրս է գալիս իր բնությունից այն ձեռվ, ինչ ձեռվ շարժվում է, և այդպիսով ստանում դեպի ցած գնացող ուղղություն: Նույն բանը կարելի է ասել աստվածային գորության համար, որը բարձրանում է ամեն բանից վեր. ո՛չ երկնքի անսահմանությունը, ո՛չ աստղերի փայլը, ո՛չ տիեզերքի կարգավորությունը և ո՛չ էլ աշխարհի հարատե կազմավորումը այնքան տեսանելի չեն դարձնում այդ գորությունը, որքան նրա զիջողականությունը մեր մարդկային բնության տկարության նկատմամբ: Եվ դա այն ձեռվ, երբ նրա մեծությունը, որ այժմ դրված է նվաստության վիճակի մեջ, տեսանելի է մնում նույնիսկ այդ նվաստության մեջ ու ցած չի ընկնում իր բարձրությունից, և երբ նրա աստվածությունը, միացած մարդկային բնությանը, դառնում է այսպիսին՝ մնալով հանդերձ այդպիսին:

Խարված թշնամին

Արդեն ասվեց վերևում, որ հակառակորդ գորությունը չէր կարող շփման մեջ մտնել Աստծու հետ, եթե վերջինս ներկայանար առանց խառնուրդի, և ոչ էլ կարող էր դիմանալ նրա հայտնությանը, եթե այդ հայտնությունը տեղի ունենար առանց շղարշի: Ահա թե ինչու Աստված, որպեսզի ավելի հեշտ մի ավար տա նրան, ով ձգտում էր մեզ փոխանակելով առավելություն ձեռք բերել, թաքնվեց մեր բնության ծածկույթի տակ. այնպես որ դեռ որկրամոլ

ձկան նման խուժելով մարդկության խայծի վրա՝ բռնվեց աստվածության կարթից: Այսպիսով կյանքը, որ իրեն օթենվան էր դարձրել մահը, իսկ լույսը, որ եկել էր փայլելու խավարի մեջ, անհետացնում են այն, ինչ հակառվում է լույսին և կյանքին: Արդարեւ, անհնար է, որ խավարը գոյատեսի լույսի ներկայությամբ, և ոչ էլ մահը գոյություն ունենա եռացող կյանքի դիմաց:

Աստված հայտնվում է

Փրկազործության պատմության մեջ

Ուրեմն, հենվելով հիմնական կետերի վրա՝ շարունակենք փրկազործության խորհրդի մասին մեր ատենաբանությունը, որպեսզի ամբողջացնենք դրա արդարացումը ի պատասխան նրանց, որոնք քննադատում են աստվածային ծրագիրը, որովհետև աստվածությունն անձամբ է միջամտել՝ իրականացնելու համար մարդկության փրկությունը: Արդարեւ, աստվածությունն ամեն ինչում պետք է պահպանի այն ստորոգելիները, որոնք պատշաճում են իրեն. չպետք է կազմել աստվածության մասին բարձր գաղափար այսինչ կետի շուրջ՝ բացառելով մեծության մի այլ հատկանիշ, որը նույնպես պատշաճում է Աստծուն:

Բարեպաշտությանը համապատասխան ամեն բարձր գաղափար անվերապահորեն պետք է վերագրվի Աստծուն հավատով, և մեկը տրամաբանորեն պետք է ներդաշնակվի մյուսի հետ:

Արդ, ապացուցվել են արդեն բարությունը, իմաստությունը, արդարությունը, զորությունը, անապականությունը՝ այս բոլոր ստորոգելիները, որոնք ի հայտ են եկել մեզ վերաբերող ծրագրի մեջ: Բարությունը բացահայտվում է կորուսյալին փրկելու կամքի մեջ (Ղուկ. 19, 10). իմաստությունն ու արդարությունը ի հայտ են եկել հենց մեր

փրկության ձևի մեջ. ինչ վերաբերում է զորությանը, Աստվածած այն ցույց է տվել՝ նմանվելով մարդուն և ստանալով մի ձև, որը համարվում էր մեր բնության նվաստությունը. նա այդ զորությունը ցույց է տվել նաև՝ թույլ տալով հավատալ, որ ինքը կարո՞ղ է մարդկանց նման ընկնել մահվան իշխանության տակ. վերջապես, մեկ անգամ մարդդառնալով, նա այդ զորությունը ցույց է տվել՝ անելով այնպես, ինչպես ինքը միայն կարող էր այդ անել, և անել ըստ իր բնության:

Արդ, լույսի առանձնահատկությունն է ցրել խավարը, կյանքի առանձնահատկությունը՝ խորտակել մահը: Եվ քանի որ թույլ տալով մեզ դուրս գալ ուղիղ ճանապարհից՝ սկզբից ևեթ շեղվել ենք կյանքից և գահավիժել մահվան մեջ, անձմարտանման ի՞նչ կա այն բանի մեջ, ինչ մեզ ուսուցանում է կրոնը. մաքրությունը վերանորոգում է նրանց, ում արատավորել է մեզը, կյանքը՝ նրանց, ովքեր մեռած էին. մոլորվածները վերստին դրվում են ուղիղ ճանապարհի վրա, որպեսզի անհետանա արատը, նրանք վերադառնան մոլորությունից, և ինչ որ մեռած էր, վերադարձի կյանքին:

Աստված իր ստեղծագործության մեջ

25. Որ Աստված հագել էր մեր բնությունը, դա մի փաստ է, որ ոչ մի տարօրինակ և անհեթեթ բան չի ներկայացնում այն մարդկանց համար, որոնք շատ նեղ գաղափար չունեն իրականության մասին: Կա՞ մի մարդ, մտքով այնքան տկար, որ նայելով տիեզերքին, չհավատա, թե Աստված ամեն ինչ է. նա հագնում է տիեզերքը, միաժամանակ այն պարունակում է իր մեջ և բնակվում այնտեղ: Արդարե, ինչ որ գոյություն ունի (Ելից, 3, 14), կախված է նրանից, ով գոյություն ունի, և գոյություն ունենալ չի կարող ոչինչ,

որ իր գոյությունն ստացած չլինի նրա գրկում, ով մշտադու է:

Ուրեմն, եթե ամեն ինչ նրա մեջ է, և եթե նա էլ՝ ամեն ինչի մեջ, ապա ինչո՞ւ ամաչել այն կրոնից, որը մեզ ուսուցանում է, թե մի օր Աստված ծնվեց մարդկային վիճակի մեջ, նա, որ նույնիսկ այսօր, ըստ մեր հավատի, գոյություն ունի մարդու մեջ:

Արդարե, եթե մեր մեջ Աստծու ներկայությունն այստեղ նույն ձեւը չի ստանում, ինչ որ այնտեղ, այսուհանդերձ համաձայնվում ենք ընդունել, որ հիմա նույնպես, ինչպես այն ժամանակ, նա գտնվում է մեր մեջ: Այսօր նա խառնված է մեզ այն իմաստով, որ գոյության մեջ է պահում իր ստեղծագործությունը, այն ժամանակ նա խառնված էր մեր էությանը՝ իր շփումով հավիտենականացնելու համար մեր էությունը, նրան մահի ճիրաններից պոկելուց և թշնամութունակալությունից ազատելուց հետո. որովհետև նրա հարությունը մահկանացու մարդկային ցեղի համար դառնում է վերադարձի սկիզբ անմահ կյանքի:

Խարերան ինքն է խարվել

26. Բայց երբ քննում ենք Աստծու տնտեսության ցույց տված արդարությունն ու իմաստությունը, գուցե տարվում ենք մի տեսակ խաբեռություն համարել Աստծու կողմից երեակայված եղանակը մեզ փրկելու համար. հանձնվել մարդու բռնակալին առանց բացահայտելու իր աստվածությունը՝ այն թաքցնելով մարդկային հագուստի տակ, թշնամուց գաղտնի, դա մի տեսակ խարդավանք է և խարեպատիր գործելակերպ, որովհետև խաբերաներին հատուկ է ի դերե հանել մարդկանց սպասումը և անակնկալի բերել նրանց: Սակայն մոտիկից քննելով ճշմարտությունը՝ դրանում, ընդհակառակը, մենք նույնիսկ կտեսնենք աստվա-

ծային արդարության և իմաստության ապացույցը:

Արդարե, արդարի պարտականությունն է յուրաքանչյուրին տալ ըստ նրա արժանիքի, իմաստունի պարտականությունը՝ չխեղաթյուրել արդարությունը, բայց նաև արդարության որոշումներից չբաժանել այն կամեցողությունը, որ նրան ներշնչում է սերը մարդկության նկատմամբ. պետք է, որ նա ճարտարորեն հաշտեցնի դրանք մեկը մյուսի հետ՝ արժանին տալով ըստ արդարության, մինչդեռ բարությունը նրան կապված է պահում այն կամեցողությանը, որ նրան ներշնչում են մարդկային զգացումները: Տեսնենք, թե այս երկու հատկությունները գտնվում են արդյոք կատարված իրողությունների մեջ:

ԴԱՐ ԱՏԱՆՈՒՄ Է ԱՅՆ, ԻՆՉԻՆ ԱՐԺԱՆԻ Է

Խարերան հատուցվեց, ինչին որ արժանի էր՝ ինքը ևս խարբելով իր հերթին. ահա թե ինչ է ցույց տալիս արդարությունը: Այս գործողության առաջադրած նպատակը հաստատում է իր հեղինակի բարությունը: Արդարե, արդարությանը հատուկ է յուրաքանչյուրին տալ այն արդյունքները, որի հիմքերը նախալիք իրենք են դրել և իրենք էլ հաստատել են պատճառները (Գաղատ. 6, 7), ճիշտ ինչպես հողը, որն արտադրում է այն պտուղները, որոնք համապատասխանում են այնտեղ նետված սերմերին: Մյուս կողմից՝ իմաստությանը հատուկ է աչքաթող չանել այն բարելավումը, որ մարդ առաջադրում է:

Թունավորող մարդը և թունավորվածին խնամող բժիշկը երկուան էլ թմրանյութ են խառնում սննդին. բայց առաջինի համար այդ թմրանյութը թույն է, երկրորդի համար՝ հակաթույն, և բուժման համար գործադրված եղանակը ոչնչով չի խեղաթյուրում երկրորդի բարի մտադրությունը: Թեև թե՛ մեկը և թե՛ մյուսը թունավոր նյութ են խառնում

սննդին, սակայն մենք, նկատի ունենալով նրանց առաջադրած նպատակը, կարողանում ենք գովել մեկին, իսկ պախարակել մյուսին: Նույն բանն է տեղի ունենում այս դեպքում. խարեւան, արդարությանը համապատասխան, իր հերթին ստանում է այն, ինչ ցանել է՝ գործելով իր սեփական կամքի համաձայն (որովհետև նա նույնպես խարված է այն Մարդուց⁵⁶, որը ներկայացնում է նրան, ով առաջինը խարել էր մարդուն հաճույքի խայծով). բայց գործելակերպի մտադրությունը նրան տալիս է բոլորովին այլ իմաստ՝ անհունորեն ավելի լավ:

Մարդկության բժշկումը

Առաջինը գործի էր դրել իր խարեւայությունը մարդկային բնությունն ապականելու նպատակով, մյուսը, որ միաժամանակ արդար է, բարի և իմաստուն, փրկելու համար նրան, ով ապականված էր՝ այսպիսով բարություն անելով ոչ միայն կորուսյալ արարածին, այլ նաև մեզ կորսյան մատնողին⁵⁷: Երբ կյանքը և մահը, լույսը և խավարը, անապականությունը և ապականությունը իրար մոտեցած են լինում, այն ժամանակ անհետանում և ոչնչանում է վնասակար տարրը ի բարօրություն նրա, ով ազատված է այդ չարիքներից:

Ուկու քուրան

Երբ ոսկուն խառնված է լինում նվազ թանկարժեք մինյութ, այն մարդիկ, որոնք զբաղվում են այդ գործով, կրակի միջոցով հեռացնում են օտար տարրը, որը պետք է դուրս հանվի: Նրանք այսպիսով առավել թանկարժեք նյութին տալիս են իր նախկին բնական փայլը: Սակայն այս բաժանումը տեղի չի ունենում առանց գժվարության. հարկավոր է լինում ժամանակ, որպեսզի կրակը իր քայքայիչ

ուժով անհետացնի անմաքուր տարրը. և սա մի տեսակ գործողություն է, որին ենթարկում են ուկին՝ հալեցնելով այն, ինչ նա պարունակում էր և խաթարում իր գեղեցկությունը:

Նույն բանն է տեղի ունենում այս դեպքում. մահը, ապականությունը, խավարը և չարի բոլոր արգասիքները կապված լինելով չարի հեղինակին՝ աստվածային զորությունը, մոտենալով, կրակի նման քայլայում է այն, ինչ հակառակ է բնությանը. իսկ այս մաքրագտումը բարիք է, ինչքան էլ դժվարին լինի այդ տարրերի քակտումը: Հակառակորդը ինքն իսկ չի կարող կասկածի տակ առնել արդարությունն ու կիրառված գործողության փրկարար բնույթը, եթե անշուշտ կարողանա հասկանալ կատարված բարիքը:

Հիվանդը և բժիշկը

Այն հիվանդները, որոնց դարմանում են վիրահատությունների և խարանումների միջոցով, ջղայնանում են բժիշկների գեմ վիրահատության պատճառած սուր ցավի ազդեցության տակ: Բայց եթե դարմանումը առողջություն է տալիս նրանց, և եթե այրվածքի պատճառած տառապանքն անհետանում է, ապա երախտագիտություն են հայտնում նրանց: Նույնպես երբ այս երկարատև և կողմնակի միջոցները վերացնեն չարի բնությունը, որ խառնվել մնացել էր այնտեղ, և երբ իրենց սկզբնական վիճակի մեջ վերահաստատված լինեն նրանք, որ այժմ թաղված են արատի մեջ, այն ժամանակ ամբողջ ստեղծագործությունից միաբերան գոհաբանություն կբարձանա դեպի երկինք թե՛ նրանց կողմից, ովքեր պատժված կլինեն այդ մաքրագործման ընթացքում և թե՛ նույնիսկ նրանց կողմից, ովքեր կարիք ունեցած չեն լինի մաքրագործվելու:

Ահա, իմիջիայլոց, այն ուսուցումները, որ մեզ տալիս է աստվածային մարդեղության մեծ խորհուրդը: Խառնվելով մարդկային բնությանը, ստանալով մեր մարդկային վիճակին հատուկ բոլոր հատկությունները (ծնունդ, դաստիարակություն, աճ) և անցնելով մեր կյանքի բոլոր հանգրվաններով մինչև մահ՝ Աստված կատարեց այն ծրագիրը, որի մասին մենք խոսեցինք վերևում: Նա ազատեց մարդուն արատից և բժշկեց նույնիսկ արատի հեղինակին. որովհետեւ անհետացնել հիվանդությունը՝ նշանակում է բժշկել հիվանդին, թեկուզ դա լինի տառապանքների գնով:

Մարդեղության տրամաբանությունը

27. Առողջ տրամաբանությամբ՝ նա, ով բաժանում էր մեր մարդկային վիճակը, պարտավոր էր ստանալ այդ վիճակին բնորոշ բոլոր հատկանիշները՝ անանջատելիորեն միանալու համար մեզ: Արդարե, նրանք, ովքեր հագուստներ են լվանում դրանք մաքրելու համար, չեն բավարարվում վերացնելով արատների մի մասը միայն և թողնելով մյուսները: Նրանք արատներից մաքրում են ամբողջ հյուսվածքը մեկ ծայրից մյուսը, որպեսզի լվանալուց հետո ամբողջ հագուստն ունենա նույն գեղեցկությունը և փայլի նույն փայլով: Մարդկային կյանքը նույնպես թե՛ իր սկզբին, թե՛ վախճանին և թե՛ սկզբի ու վախճանի միջև ընկած ամբողջ ժամանակամիջոցում արատավորված է եղել մեղքով: Այն Զորությունը, որը մաքրում է այն, բնականաբար պիտի մաքրեր ամբողջ կյանքը, իր բոլոր մասերով, և չբավարարվեր մաքրելով մասերից միայն մեկը և թողնելով մյուսը առանց դարմանումի:

Ահա թե ինչու մեր կյանքը, որը զարգանում է երկու ծայրերի միջև (ուզում եմ ասել՝ իր սկզբի և վախճանի միջև), այնտեղ գտնում է մեր բնությունը վերականգնող Զո-

բությունը, որը շփման մեջ է մտել սկզբի հետ և այնտեղից տարածվել մինչև վախճանը՝ զբաղեցնելով միջանկյալ ամբողջ տարածությունը:

Արդ, քանի որ մարդկային գոյության մեջ մտնելու մեկ ձև կա միայն, ուրեմն որտեղից պիտի գար նա, ով հաստատվելու էր մեր կյանքում: «Երկնքից», – ասում է գուցե նա, ով մարդկային ծննդի ձևը մերժում է որպես նվաստացուցիչ և անփառունակ ձև:

Բայց մարդկությունը երկնքում չէր գտնվում, և գերերկրային կյանքում⁵⁸ արատի հիվանդությունը ոչ մի ձևով տեղ չէր գտել: Արդ, նա, ով խառնվում էր մարդուն, ուզում էր, որ այդ միավորումը կատարելապես պատշաճեր իր վերջնական նպատակին:

Այնտեղ՝ մարդկային կյանքի բնագավառից դուրս, ուր գոյություն չուներ չարը, մարդն ինչպե՞ս կարող էր այդ ոլորտից իջնել ցած՝ միախառնվելու համար Աստծու հետ: Ավելի ճիշտ կլիներ, անշուշտ, ասել ոչ թե մարդը, այլ՝ մարդու դիմանկարը, մարդու պատկերը: Եվ ինչպե՞ս մեր բնությունը վերականգնված կլիներ, եթե երկրային հիվանդ արարածը ընտրված լիներ երկնային ոլորտների բնակիչների միջից՝ խառնվելու համար Աստծու հետ: Հիվանդը չի կարող բժշկվել, եթե նրա մարմնի ցավոտ մասը ճշգրիտ կերպով չէ բուժված:⁵⁹

Աստված ցավի կենտրոնում

Հիվանդ մասը լինելով երկրի վրա՝ եթե աստվածային գորությունը, իր սեփական արժանավորության մտահոգությունից մղված, կապված չլիներ այդ հիվանդ մասին, ապա նրա հոգածությունը, կլանված լինելով այն բանով, ինչ մեզնից դուրս է գտնվում, անօգուտ կլիներ մարդու համար:

Անարժանությունը նույնը կլիներ Աստծու համար՝ ենթագրելով, որ սրբազդություն չէ անարժան համարել այլ բան, քան արատը: Եվ, սակայն, նեղմիտ մարդու համար, որի աչքին աստվածային մեծությունը չի կարող ընդունելի համարել մեր մարդկային վիճակին բնորոշ հատկությունները բաժանել, անպատվությունը նույնն է՝ Աստված երկնային մարմին հագած լինի թե երկրային մարմին: Արդարեւ, ստեղծագործությունը ամբողջական է, գտնվում է նույն մակարդակի վրա, ավելի ցած, քան Ամենաբարձրյալը, որն անմատչելի է իր բնության իսկ գերազանցությամբ: Ստեղծագործությունը մնում է նրանից ցած, արարածների հետ նույն շարքի վրա. որովհետև ինչ որ անմատչելի է գոյաբանորեն, մատչելի չէ թե՛ մեկին և թե՛ մյուսին: Նա իր անդրանցականությամբ գերիշխում է գոյություն ունեցող ամեն ինչի վրա⁶⁰:

Երկիր և երկինք

Երկիրն ավելի հեռու չէ աստվածային մեծությունից, քան երկինքը, և երկինքն էլ ավելի մոտ չէ նրան: Այս տեսակետից այն էակները, որոնք բնակվում են երկնքում կամ երկրի վրա, ոչնչով չեն տարբերվում իրարից: Հնարավոր չէ ասել, որ ոմանք դիպչում են կամ հասանելի են աստվածային բնությանը, իսկ մյուսներն առանձնացված են, այլապես մենք կենթագրեինք, որ տիեզերքի գերագույն զորությունը հավասարապես չի տարածվում ամեն տեղ, այլ նրա ներկայությունը առավելագույն չափով զգալի է այստեղ, մինչ մի ուրիշ տեղ՝ անբավարար:

Չափի և աստիճանի այս տարբերության տրամաբանական հետևանքը կլիներ այն, որ աստվածային բնությունը կհայտնվեր որպես բաղադրյալ մի բան և չէր ներդաշնակվի ինքն իր հետ, եթե ենթագրվեր, որ նա հեռու է մեզանից

իր իսկ բնությամբ, բայց մոտիկ՝ մի այլ արարածի և այդ ի-
մաստով էլ հեշտ է ըմբռնվում:

Երբ խոսքը վերաբերում է աստվածային մեծությանը,
ճշմարիտ վարդապետությունը, համեմատություն կատա-
րելու համար, նկատի չի առնում վերև և ներքեւ, բարձ-
րը և ցածը: Հիրավի, ամեն բան մնում է հավասար հեռա-
վորության վրա այն զորությունից ներքեւ, որը ղեկավա-
րում է տիեզերքը: Եթե երկրային արարածը իր բնությամբ
անարժան է թվում աստվածության հետ այս սերտ միութ-
յանը, ապա հնարավոր չէ գտնել մի ուրիշ արարած, որ ար-
ժանի լինի դրան: Եթե ամեն ինչ հավասարապես հեռու է
մնում այդ մեծությունից, ապա մի բան միայն պատշաճում
է Աստծու արժանավորությանը՝ օգնել կարիքի մեջ գտնվող
արարածին: Ուրեմն, ընդունելով, որ բժշկող Զորությունը
հայտնվել է այնտեղ, որտեղ հիվանդությունն էր, մեր հա-
վատը ինչո՞վ է խեղաթյուրում այն գաղափարը, որ պետք
է կազմել Աստծու մասին:



5. ՀԱԿԱՌԱԿՈՐԴՆԵՐԻ ԱՌԱՐԿՈՒԹՅՈՒՆՆԵՐԸ

Աստված ինչպես կարող է մարդանալ⁶¹

28. Բայց մեր հակառակորդները ծաղրի են ենթարկում
մեր մարդկային բնությունը, նրանք անընդհատ այպահնում
են այն ձեւը, որով առաջ է գալիս ծնունդը, և հենց դրանով
էլ կարծում են ծիծաղելի դարձնել կրոնը, ասես Աստծու
համար անարժան լիներ որդեգրել նման մի ճանապարհ՝
աշխարհ գալու և բաժանելու մարդկային կյանքը: Այս
նյութի մասին մենք արդեն խոսել ենք նախորդ գլուխնե-
րում⁶² ասելով, որ իր էությամբ միայն չարն է նվաստա-
ցուցիչ և այն ամենը, որ նմանություն ունի արատի հետ:
Բայց բնության կարգը, որ Աստծու կամային գործունեութ-
յամբ և աստվածային մի օրենքով է կանոնակարգված, չի
կարող մեղադրվել որպես վատ. բնության դեմ ուղղված մե-
ղադրանքը կարող է հարվածել Արարչին, եթե նրան վերա-
բերող բաներից մեկն ու մեկը մեղադրվի որպես նվաստա-
ցուցիչ և անարժան:

Ուրեմն, եթե աստվածությունը մերժում է միայն արա-
տը, և եթե մարդկային բնությունը արատավոր չէ, եթե,
մյուս կողմից, կրոնը մեզ ասում է, որ Աստված ծնվեց մար-
դու մեջ և ոչ արատի, և վերջապես, եթե մարդու համար
կյանքի կոչվելու մեկ ձև կա միայն, այսինքն՝ այն ձեւը, ո-
րով գոյության մեջ է մտնում սերված էակը, ապա կյանքի
մեջ մտնելու ուրիշ ի՞նչ ձև են հրամանագրում նրանք
Աստծու համար: Նրանք տրամաբանական և ընդունելի են
գտնում, որ արատի հիվանդությամբ տկարացած մարդկա-
յին բնությունը այցելվի աստվածային զորության կողմից:

Բայց այդ այցելության ձևը դժգոհ է թողնում նրանց: Նրանք անգիտանում են, որ մարմնի կառուցվածքն իր բոլոր մասերով նույն կարեորությունն ունի, և որ կյանքի կազմավորմանը նպաստող ոչ մի բան այնտեղ չի կարող մեղադրվել որպես արհամարհելի և պակասավոր:

Մարդու օրգանիզմում ամեն ինչ նախասահմանված է մեկ և նույն նպատակի համար՝ պահպանել մարդկային էակի գոյությունը: Մյուս օրգանները պահպանում են ներկա կյանքը՝ յուրաքանչյուրն ապահովելով տարբեր գործողությունների իր բաժինը: Դրանց միջոցով է, որ արտահայտվում է ըմբռնելու, իմանալու և գործելու ունակությունը: Ծննդական օրգանները սահմանված են ապահովելու հաջորդող սերունդների ծնունդը, դրանց շնորհիվ է, որ ստեղծագործության մեջ տեղի է ունենում անընդմեջ մի հաջորդականություն:

Այս պայմաններում, եթե օգտակարության տեսակետից մոտենանք, կարեոր համարվող օրգանների մեջ կա՞ այնպիսի մի օրգան, որին ծննդական օրգանները զիջեն առաջին տեղը: Տրամաբանորեն դրանցից ո՞ր մեկը առավելություն է ներկայացնում այս վերջինների համեմատությամբ: Ո՞չ աչքը, ո՞չ ականջը, ո՞չ լեզուն և ո՞չ էլ զգայարաններին կապված ուրիշ ոչ մեկ օրգան չեն ապահովում մեր տեսակի անընդմեջ շարունակականությունը, որովհետև սրանք վերաբերում են միայն ներկա կյանքի վայելքին: Մյուսներն են, որ ապահովում են մարդկային բնության անմահությունը, այնպես որ մահը իզուր է աշխատում անընդհատ գործել մեր դեմ. որոշ իմաստով դա անօգուտ է և ապարդյուն, քանի որ բնությունն ամեն անդամ դատարկությունը լրացնում է նոր ծնունդներով: Ուրեմն, ի՞նչ է պարունակում մեր կրոնը, որ անարժան լինի Աստծուն, եթե Աստված մարդկային կյանքին խառնվելու համար ընտրել է այն ճա-

նապարհները, որ գործածում է բնությունը՝ հաղթահարելու համար մահը:

Ինչո՞ւ Փրկիչն այդքան ուշ է եկել

29. Այս հարցից անցնելով մի ուրիշ հարցի՝ մեր հակառակորդները փորձում են դարձյալ հարձակվել մեր վարդապետության վրա: Եթե այն, ինչ տեղի է ունեցել, լավ էր և արժանի Աստծուն, ապա ինչո՞ւ նա հապաղեցրեց իր բարերարությունը⁶³: Այն ժամանակ, երբ դեռ արատը իր սկզբնական շրջանում էր գտնվում, ինչո՞ւ միանգամից, կտրուկ կերպով չկասեցրեց նրա հետագա զարգացումը:

Այս առարկությանը մեր պատասխանը կլինի շատ կարծ. ի բնե բարեգործ էակի իմաստությունն ու կանխատեսությունն էր, որ հապաղեցրեց բարերարությունը: Արդարե, ֆիզիկական հիվանդությունների ժամանակ, երբ ապականված մի հեղանյութ տարածվում է մարմնի անցքերի մեջ, այնքան ժամանակ, երբ դեռ հակառակ տարրը ի հայտ չի եկել մարմնի մակերեսի վրա, բժիշկները չեն դարձանում մարմինը մածուցիկ դեղամիջոցների օգնությամբ: Նրանք սպասում են, որ ներսում թաքնված ախտը դուրս գա, և այն ժամանակ միայն, երբ հիվանդությունը պարզվում է, կատարում են համապատասխան դարմանումը: Ճիշտ այդպես էլ, երբ մեղքի հիվանդությունը հարվածեց մարդկային բնությանը, տիեզերքի բժիշկը սպասեց, որ չարության և արատի ոչ մեկ ձև թաքնված չմնա:

Ահա թե ինչու կայենի նախանձից և նրա եղբոր սպանությունից անմիջապես հետո չէ, որ նա կատարում է դարմանումը: Արդարե, նրանք ովքեր կործանվեցին նոյի ժամանակ, այդ պահին դեռևս չէին դրսեղբել իրենց արատը. Սոդոմի աղետաբեր հիվանդությունը տակավին ի հայտ չէր եկել, չէր հայտնվել ո՞չ եգիպտացիների կոիվը

Աստծու դեմ, ո՞չ ասորեստանցիների ամբարտավանությունը, ո՞չ հրեաների կողմից գործադրված ոճիրը Աստծու սրբերի դեմ (Հմմտ. Մատթ. 23, 35), ո՞չ Հերովդեսի հրամանով տեղի ունեցած մանուկների եղեռնական կոտորածը (Հմմտ. Մատթ. 2, 16-18) և ո՞չ էլ մյուս բոլոր չարագործությունները, որոնց հիշողությունը գոյատևում է, ինչպես նաև պատմությանն անծանոթ այն բոլոր ոճիրները, որոնք կատարվել են իրարահաջորդ սերունդների մեջ, երբ չարի արմատն իր տարբեր ընձյուղներն էր արձակում՝ ըստ մարդու այլասերված հակումների:

Ուրեմն, երբ արատն իր լրումին հասավ, և այլևս չմնաց ոչ մի չարություն, ոչ մի հոռի բան, որ հանդգնած չլինեին գործել մարդիկ, ահա այն ժամանակ Աստված սկսեց դարմանել հիվանդությունը ոչ թե իր սկզբնավորման շրջանում, այլ իր զարգացման լրումին, որպեսզի դարմանումը կարողանար տարածվել ամբողջ մարդկային տկարության վրա:

Սեղի տևականությունը

30. Գուցե կարծում են հերքել մեր վարդապետությունը՝ փորձելով արժեքավորել այն միտքը, թե նույնիսկ դարմանումից հետո էլ մարդկային կյանքը դեռ ապականված է մնում գործված հանցանքների և մեղքերի պատճառով։ Այդ դեպքում թող բարի լինեն առաջնորդվել դեպի ճշմարտությունը հետեւյալ ծանոթ օրինակով։ Երբ օձը մահացու հարված է ստանում իր գլխին, նրա մարմնի օղակները գլխի հետ միաժամանակ չեն անդամալուծվում ջլատվելով։ Նրա գլուխն արգեն մեռած է, բայց պոչը, կենսական մի սկզբունքի պատճառով, որը հատուկ է նրան, դեռ մնում է կենդանի՝ պահելով իր մեջ կյանքի շարժումը։ Նույն բանը կարելի է ասել արատի համար. տեսնում ենք, թե մահացու

հարված ստանալուց հետո նա իր մնացորդներով ինչպես է տակավին խռովում մարդկային կյանքը։

Մասնակի փրկություն մարդկանց

Սակայն այս կետի շուրջ նույնպես մի կողմ թողնելով իրենց քննադատությունները կրոնի դեմ՝ մեր հակառակորդները մեջտեղ են նետում մի նոր մեղադրանք՝ այն, թե ինչո՞ւ հավատը չի տարածվում ամբողջ մարդկության վրա։ Ինչո՞ւ, – ասում են նրանք, – Ավետարանի շնորհը չի տարածվել բոլոր մարդկանց վրա։ Ինչո՞ւ ումանք հարել են նոր վարդապետությանը, մինչդեռ մարդկության կարեսոր մասը զուրկ է մնացել դրանից։ Կա՛մ Աստված չի ուզեցել իր բարիքները լայնորեն բաշխել բոլորին, կա՛մ էլ նա բացարձակապես չի ունեցել այդ կարողությունը։ Այս երկու պատճառներից ո՛չ մեկը և ո՞չ էլ մյուսը մեղադրանքից զերծ չի կարող լինել, որովհետև Աստծուն վայել չէ բարին չկամենալը, առավել ևս այն չկարողանալ կատարելը։ Ուրեմն, – ասում են նրանք, – եթե հավատը բարիք է, ապա ինչո՞ւ Ավետարանի շնորհը չի տարածվել բոլորի վրա։

Արդարեւ, եթե մեր վարդապետությունը հաստատեր, թե աստվածային բնությունը հավատը հենց այնպես, պատահական կերպով է բաշխում մարդկանց՝ ումանք կոչված լինելով այն ստանալու, իսկ մյուսները դուրս մնալով հրավերից, իրավացի կլիներ նման մի մեղադրանք ուղղել կրոնի դեմ։ Բայց եթե աստվածային կոչն ուղղված է հավասարապես բոլորին առանց դիրքի, տարիքի և ցեղի խտրության (որովհետև եթե իրենց քարոզության հենց սկզբից մեր կրոնի վարդապետության պաշտոնյաները կարողացան աստվածային մի ներշնչման շնորհիվ խոսել բոլոր ժողովուրդների լեզուներով (Հմմտ. Գործք, 2, 8-11), ապա դա նրա համար էր, որ ոչ ոք դուրս չմնար այդ ուսմունքի բարիք-

ներից), ինչպես կարելի է տրամաբանորեն մեղադրել Աստ-
ծուն, որ իր վարդապետությունը չի պարտադրել բոլորին:

Նա, ով ամեն ինչ ազատորեն տնօրինելու իշխանություն
ունի, մինչև ծայրագույն աստիճանի հասցնելով իր հար-
դանքը մարդու նկատմամբ՝ թույլ է տվել, որ մենք ևս ու-
նենանք մեր սեփական բնագավառը, որի միակ տերը յու-
րաքանչյուրն ինքը պիտի լինի: Կամքն է՝ ստրկություն
չճանաչող այս կարողությունն է, որ ազատ է և հիմնված
մեր բանականության անկախության վրա⁶⁴: Ուրեմն ավե-
լի արդար կլիներ նման մի մեղադրանք բարդել նրանց
վրա, ովքեր հավատի չեն եկել, և ոչ թե նրա վրա, ով մարդ-
կանց հրավիրել է հավանություն տալ դրան:

Նույնիսկ սկզբի օրերին, երբ Պետրոս առաքյալը քարո-
ղեց մեր կրոնի վարդապետությունը Հրեաների մի մեծ
բազմության առջև, և երբ երեք հազար հոգի միաժամանակ
ընդունեցին հավատը (Գործք, 2, 41), անհավատները, որոնք
թվով անհամեմատ ավելի շատ էին, քան դարձի եկածները,
չմեղադրեցին առաքյալին, որ իրենց չի համոզել: Տրամա-
բանական չէր լինի նույնպես, որ նա, ով կամովին մերմել
էր մոտենալ հավատին, մեղադրեր մեկ ուրիշին, փոխանակ
մեղադրելու ինքն իրեն իր դժբախտ վիճակի համար:

Հավատը պետք է ազատ լինի

31. Նույնիսկ այս կարգի փաստարկների դիմաց մեր հա-
կառակորդները չեն պապանձվում և դիմում են ընդդիմա-
խոսությունների և բանսարկությունների: Նրանք ասում
են, որ Աստված, եթե ուզենար, կարող էր բռնի ուժով ըմ-
բռստներին բերել այն բանին, որ ընդունեն Բարի լուրը:
Այդ դեպքում ո՞ւր կմնար ազատ կամքը, ո՞ւր կմնար առա-
քինությունը և ուղիղ վերաբերմունք հանդես բերող աստ-
վածության փառքը: Անկենդան կամ բանականությունից

զուրկ էակները միայն առաջնորդվում են ուրիշի կամքի
համաձայն: Պատասխանատու և մտածող մարդկային
բնությունը, ընդհակառակը, եթե արհամարհի ազատութ-
յունը, հենց նույն բոպեին կորցնում է մտածելու առանձ-
նաշնորհը: Ինչպես նա կկարողանա գործածել իր բանա-
կանությունը, եթե ըստ իր կամքի ընտրելու կարողությունը
կախված լինի մեկ ուրիշից:

Արդ, եթե կամքը չմիջամտի, ապա անհրաժեշտաբար
անհետանում է առաքինությունը՝ խափանվելով կամքի
անգործությունից: Իսկ առանց առաքինության կյանքն
այլևս արժեք չի ներկայացնի, բարի վարքի համբավը վե-
րանում է, մեղքը գործվում է առանց վտանգի, և այլևս
ոչնչով չի տարբերվում ապրելու այս կամ այն ձեւը: Ո՞վ
կկարողանար այլևս տրամաբանորեն մեղադրել այլասեր-
վածին կամ գովարանել առաքինի մարդուն: Յուրաքանչ-
յուր ոք կկարողանար համարձակ պատասխանել. «Ոչինչ
կախված չէ մեր կամքից, բարձրագույն մի զորություն է ա-
ռաջնորդում մարդկանց կամքերը՝ հարմարվելու վեհա-
պետների որոշմանը»: Եթե հավատը ծնունդ չի առել բոլոր
հոգիների մեջ, հանցանքը չի վերաբերում աստվածային
բարերարությանը, այլ՝ այն մարդկանց տրամադրվածութ-
յանը, որոնք ունկնդրում էին քարոզությունը⁶⁵:

Քրիստոսի մահվան անհրաժեշտությունը

32. Որո՞նք են հակառակորդների մյուս առարկություն-
ները: Ըստ նրանց, Գերագույն բնությունը ոչ մի ձևով
չպետք է ընդհառաջ գնար մահվան փորձությանը. առանց
այդ փորձությանը ենթարկվելու նա անկարող էր իր ծրա-
գիրը հեշտությամբ իրականցնել իր ունեցած լիակատար
իշխանությամբ: Ընդունենք նույնիսկ, որ, ինչոր խորհր-
դավոր պատճառով, այդպես եղավ. բայց Աստված առն-

վազն չպետք է ընդուներ այդպիսի ամոթալի մահվան նախատինքը: Կա՞ ավելի անարգ մահ, քան մահը իսաչի վրա:

Ի՞նչ պատասխանել սրան: Ծնունդը անխուսափելի է դարձնում մահը: Նա, ով մի անգամ որոշել էր բաժանել մարդկային գոյավիճակը, պետք է անցներ այն բոլոր վիճակներով, որոնք հատկանշում են մեր բնությունը: Արդ, մարդկային կյանքը գտնվում է երկու սահմանների միջև. եթե մարդ սահմաններից մեկն անցնելուց հետո չի դիպչել մյուսին, ապա նրա գոյությունը կմնա անսավարտ, քանի որ նա ճանաչած չի լինի մեկն այն երկու վիճակներից, որոնք հատկանշում են մեր բնությունը:

Աստվածային խորհրդի ճշգրիտ ճանաչումը գուցե թույլ կտար ավելի հաստատամտորեն ասել, որ ծնունդը չէ մահվան պատճառը, այլ, ընդհակառակը, մահվան պատճառով է, որ Աստված ընդունեց ծնվել: Ապրելու պահանջը չէ, որ նրան բերեց այն բանին, որ հանձն առնի ծնունդը, այլ՝ մեզ մահվանից կյանքի կոչելու նրա ծրագիրը: Հարկավոր էր մեր ամբողջ բնությունը վերադրձնել մահվանից դեպի կյանք: Ուստի Աստված կոացավ մեր դիակի վրա, որպեսզի իր ձեռքը մեկնի⁶⁶, այսպես ասած, այն էակին, որ նետված էր այնտեղ անկենդան: Նա մոտեցավ մահվանն այն աստիճան, որ շփվեց մեր մեռելոտու հետ և իր սեփական մարմնի միջոցով մարդկային բնությանը շնորհեց հարության սկիզբը՝ իր գորությամբ հարություն տալով մարդուն:

Մարդը, որի մեջ Աստված մարմնավորվել էր, մարդը, որն իր հարությամբ բարձրացել էր աստվածության հետ, իրականում առաջացել էր սոսկ մեր կավից: Արդ, մեր մարմնի մեջ զգայարանների միայն մեկի գործունեությունը իր ազդեցությունն է տարածում ամբողջ օրգանիզմում, որը կապված է այդ անդամի հետ: Նույնն է պարագան մարդկային ամբողջ բնության համար, որը կազմում է,

այսպես ասած, մեկ կենդանի էակ. անդամներից մեկի հարությունը տարածվում է բոլորի վրա և մասից հաղորդվում ամբողջին մարդկային բնության կապակցվածության և միության շնորհիվ⁶⁷: Անծամբառանման ի՞նչ ունի իր մեջ այս ուսմունքի խորհուրդը. Նա, ով կանգնած է, կռանում է նրա վրա, ով ընկած է անշարժ, որպեսզի բարձրացնի նրան իր անկումից:

Խաչի խորհուրդը

Խաչը պարունակում է արդյոք առավել խոր մի ուսուցում: Այս է, որ գիտեն գուցե նրանք, ովքեր օժտված են թաքուն իմաստներ բացահայտելու ունակությամբ: Համենայն դեպս, ահա այն ուսուցումը, որ ավանդաբար հասել է մեզ.

Ավետարանում ամեն ինչ ասվել և տեղի է ունեցել ամենավսեմ և ամենաաստվածային իմաստով: Ավելին, նրա մեջ ամեն ինչ բացարձակապես բացահայտում է աստվածայինի և մարդկայինի խառնուրդի հետեւյալ հատկանիշը. խոսքերն ու գործերը ծավալվում են մարդկային ձեռվ, բայց դրանց թաքուն իմաստը հայտնում է Աստծու ներկայությունը: Այս պայմաններում տրամաբանական կլիներ, այս մասնավոր կետի շուրջ ևս, նկատի չունենալ երկու տարրերից միայն մեկը՝ անտեսելով մյուսը, այլ ուշի ուշով որոնել աստվածային տարրը իր մարդկային կողմով հենց մահվան մեջ այն ձեռվ, որով այն տեղի է ունեցել:

Խաչի տիեզերական ծավալը

Արդ, աստվածությանը հատուկ է տարածվել ամեն ինչի վրա, տարածվել գոյություն ունեցող բոլոր մասերի վրա: Արդարեւ, ոչինչ չի կարող գոյություն ունենալ նրա ծոցից դուրս, ով գերագույն է-ն է⁶⁸՝ աստվածային բնությունը

լինելով այն, ինչ գերազանցապես գո է, սկիզբն ամեն ինչի, որ գոյություն ունի: Աշխարհի մշտնջենափորությունը մեզ ստիպում է ընդունել Աստծու տիեզերական ներկայությունը: Խաչը, որ իր ձևով չորսի է բաժանվում, մեզ սովորեցնում է հաշվել չորս երկարություն՝ սկսած կենտրոնից, որին գալիս հանգում է ամբողջը: Ասում եմ, այո՛, մեզ սովորեցնում է, որ նա, ով երկարեց դրա վրա այն պահին, երբ կատարվում էր փրկագործության ծրագիրը, նույն աստվածային բնությունն է իր մահվան մեջ, որ իրեն կապում և հարմարեցնում է համայն տիեզերքը, իր վրա է բերում կենտրոնացնում բազմազան էակներին նույն համանվագի ներդաշնակության մեջ⁶⁹:

Արդարեւ, ինչ որ մարդկային միտքը հղանում է աշխարհում, դա լինի վերեւում թե ներքեւում, մատչելի թե անմատչելի, պարփակված է մնում մարդկային մտքի սահմանների մեջ: Պատկերացնենք երկնային էակներին, նրանց, որ գտնվում են երկրի տակ, կամ նրանց, որ գտնվում են տիեզերքի երկու ծայրերում. ամենուրեք նախ աստվածությունն է ներկայանում մեր մտքին, միայն նրան ենք հանդիպում տիեզերքի բոլոր մասերում, և նա է գոյության մեջ պահում դրանք:

Ի՞նչ անուն տանք այս բնությանը. աստվածությո՞ւն, բանականությո՞ւն, գորությո՞ւն, իմաստությո՞ւն կամ մի ուրիշ վսեմ անո՞ւն, որ կարողանա ավելի հստակորեն բնորոշել գերագույն էակին: Մեր վարդապետությունն ամենեկին չի վիճարկի որևէ անվանում կամ լեզվական որևէ ձև: Ուրեմն, քանի որ ամբողջ ստեղծագործությունը գալիս հանգում է այս էակին, նրա շուրջն է պտտվում և նրա մեջ է գտնում իր միասնությունը (վերև, նրա շնորհիվ, սերտորեն միացած լինելով ներքեին, իսկ երկու կողմերն էլ՝ իրար միջև), ոչ միայն լսողությունն է հասու լինում աստվա-

ծության ճանաչմանը, այլ տեսողությունն էլ ուսուցանում է բարձրագույն գաղափարներ: Այս կետից է, որ մեկնեց մեծն Պողոս առաքյալը, երբ Եփեսոսի ժողովրդին սովորեցնում էր քրիստոնեական վարդապետության նախատարերքը և իր ուսուցումով թույլ էր տալիս նրանց ճանաչել, թե ի՞նչ է ներկայացնում խորությունը, բարձրությունը, լայնությունը և երկարությունը (Եփես. 3, 18):

Նա խաչի յուրաքանչյուր թեր ներկայացնում է առանձին մի բառով. բարձրություն է կոչում վերեկի մասը, խորություն՝ ներքեկի մասը, լայնություն՝ երկարություն՝ կողմնական թերերը: Եվ, ըստ իս, նա էլ ավելի հստակ է դարձնում այս միտքը, երբ դիմում է փիլիպեցիներին և ասում. «Հիսուս Քրիստոսի անունով ամեն ծունկ պիտի խոնարհվի երկնքում, երկրի վրա և երկրի տակ» (Փիլ. 2, 10): Այստեղ, այս միակ խոսքի մեջ նա հասկանում է կենտրոնական ուղին՝ «երկրի վրա» բառերով ցույց տալով այն ամբողջ տարածությունը, որը գտնվում է երկնքի բնակիչների և նրանց միջև, որ երկրի տակ են⁷⁰:

Ահա այն խորհուրդը, որ խաչը ուսուցանում է մեզ: Գալով այն եղելություններին, որոնք Ավետարանում հաջորդում են խաչելությանը, դրանք այնքան բնական կերպով շղթայված են միմյանց, որ, անհավատների իսկ խոստովանությամբ, այստեղ վիրապօրական ոչինչ չկա Աստծու մասին կազմվելիք գաղափարի համար: Տերը չի մնացել մահվան մեջ, այն վերքը, որ գեղարդը բացել էր նրա մարմնի վրա (Հովհ. 19, 34), արգելք չհանդիսացավ, որ նա գոյություն ունենա: Հարությունից հետո նա ազատորեն երևաց իր աշակերտներին. Հենց որ նա ցանկանում էր, գալիս էր նրանց մոտ՝ անտեսանելի մնալով հանդերձ. գալիս կանգնում էր նրանց մեջտեղում՝ առանց կարիք ունենալու անցնելու դռների միջից (Հովհ. 20, 19). նա նրանց քաջա-

լերեց՝ վչելով նրանց վրա Սուրբ Հոգին (Հովհ. 20, 22). Հայտնեց նրանց, որ իրենց հետ է (Մատթ. 28, 20), և որ այսուհետև նրանց ոչինչ չի բաժանի իրենից. նրանց աչքերը տեսան, թե նա ինչպես է բարձրանում երկինք (Գործք, 1, 9), մինչդեռ, ըստ մեր հավատի, նա ամեն տեղ է: Այս բոլոր եղելությունները, ինչպես և այլ եղելություններ, որ մեզ հիշատակում է պատմությունը, կարիք չունեն դատողության՝ բացահայտելու համար նրա աստվածային բնությունն ու նրա վսեմ, գերազանց զորությունը:

Կարծում եմ՝ անօգուտ կլինի այստեղ մեկ առ մեկ թվարկել դրանք, որովհետև պատմությունն ինքնին հայտնում է դրանց գերբնական բնույթը:



6. ԽՈՐՀՈՎԱԿԱՆ ԿՅԱՆՔԸ

Բայց քանի որ աստվածային տնօրինությունները, որոնք վերաբերում են ջրով մաքրագործմանը, իրենք ևս մաս են կազմում մեր պարզած հոգեւոր ուսուցումներին (մարդիկ կամենան դրանք կոչել մկրտություն, հոգեւոր լուսավորություն թե վերածնություն, մենք չենք վիճի անվան շուրջ), լավ կլինի դարձյալ մի քանի խոսք ասել այդ մասին:⁷¹

Մկրտություն

Նոր ծննդի ջուրը

33. Արդարեւ, մեր հակառակորդները հաճախ մեզնից լսում են այս կարգի խոսքեր. «Մահկանացու էակի մահից դեպի կյանք անցման մեջ տրամաբանական էր (քանի որ առաջին ծնունդն առաջնորդում էր մի գոյության), որ գոյություն ունենար մի ուրիշ ծնունդ. այն չպետք է սկսվեր ապականությամբ և ապականությամբ էլ ավարտվեր, այլ ծնվելուց հետո ծնված էակին տաներ անմահ մի գոյության: Ինչպես որ մահկանացու ծննդով կյանք մտած էակը անհրաժեշտորեն մահկանացու է մնում, այնպես էլ ապականությունից զերծ այդ ծննդով ծնված էակը պիտի հաղթեր մահվանից առաջացած ապականությանը»: Ուրեմն, երբ նրանք լսում են այս խոսքերը և սրանց նման այլ խոսքեր, և երբ սկսում ենք նրանց ծանոթություններ տալ մկրտության ձևի մասին՝ ասելով, որ առ Աստված ուղղված աղոթքը, երկնային շնորհի հայցումը⁷², ջուրը և հավատը այն միջոցներն են, որոնցով կատարվում է վերածնության խոր-

հուրդը, նրանք մնում են թերահավատ, տեսնում են միայն արտաքինը և, ըստ նրանց, կատարված գործողությունը իբր չի ներդաշնակվում աստվածային խոստման հետ։ «Ինչպե՞ս, — ասում են նրանք, — աղոթքը և աստվածային զորությանն ուղղված այն աղերսը, որ անում են ջրի վրա, կարող են կյանքի աղբյուր դառնալ իրազեկների համար»։

Ինչպես է ջուրը վերածնում

Թերահավատներին (եթե, սակայն, նրանք ցույց չեն տալիս ծայրահեղ մի դիմադրություն) պարզ մի պատասխան բավական է, որպեսզի նրանց բերենք այն բանին, որ ընդունեն մեր վարդապետությունը։ Մեր հերթին մենք ևս մի հարց ուղղենք նրանց. քանի որ մարմնական ծննդի եղանակը շատ հստակ է բոլորի համար, ինչպե՞ս է լինում, որ այն սերմը, որից դուրս է գալու կենդանի էակը, դառնում է մարդ։ Վստահաբար այս կետի շուրջ չկա ոչ մի տեսություն, որ տրամաբանորեն կարողանա տալ բավարար մի բացատրություն։ Արդարեւ, եթե դրանք բաղդատենք իրար հետ, ի՞նչ ընդհանուր բան կա մարդ հասկացության և այն հատկության միջև, որ մենք նկատում ենք այդ սերմի մեջ։ Մարդը բանականությամբ և մտավոր կարողությամբ օժտված էակ է՝ ընդունակ մտածելու և ճանաչելու։ Մերմն ինքը, որպես ակնհայտ հատկություն, ունի խոնավությունը, և մեր միտքը թույլ չի տալիս մեզ դրա մեջ բացահայտել ավելի ոչ մի բան, քան այն, որ արթնացնում է զգայությունը։

Այն հարցին, թե՝ «Ինչպե՞ս կարելի է հավատալ, որ մարդը կազմված լինի այդ սերմից», անկասկած մեզ կտան մի պատասխան, հենց այն պատասխանը, որ մենք ևս կտանք, եթե մեզ հարց ուղղեն ջրի միջոցով կատարված վերածնության մասին։ Արդարեւ, առաջին դեպքում ամեն մարդ,

որին հարց են տալիս, պատրաստ է ասելու. «Աստվածային զորության ազգեցությամբ է, որ սերմը դառնում է մարդ. առանց այդ զորության սերմը կլիներ անօգուտ և անզոր»։ Ուրեմն, եթե այս դեպքում նյութը չէ, որ առաջացնում է մարդուն, եթե աստվածային զորությունն է, որ մարդկային բնության է վերածում այն, ինչ որ մենք տեսնում ենք, ապա մարդ դատողությունից բացարձակապես զուրկ մի արարածի ապացույցը տված կլինի, եթե առաջին դեպքում ընդունի, որ Աստծու մեջ կա չափազանց մեծ մի զորություն, իսկ երկրորդ դեպքում երեակայի, թե Աստված ուժ չունի իրագործելու իր ծրագիրը։

«Ի՞նչ ընդհանուր բան կա, — ասում են նրանք, — ջրի և կյանքի միջև»։ «Իսկ ի՞նչ ընդհանուր բան կա, — կպատասխանենք մենք, — խոնավ տարրի, ինչպիսին սերմն է, և Աստծու պատկերի միջև»։

Բայց այս դեպքում զարմանալի ոչինչ չկա, որ խոնավ տարրը Աստծու կամքով կերպարանափոխվում է՝ դառնալու համար իր աստիճանով ամենաբարձր կենդանի էակը։ Դե ինչ, նույնն է նաև ներկա պարագայում։ մենք ասում են հաստատում ենք, որ արտասովոր ոչինչ չկա, եթե աստվածային զորության ներկայությունը անապականության վիճակի է վերածում ապականացու բնության մեջ ծնունդ առած էակին։

Աստված կանչվում է աղորքի մեջ

34. Բայց նրանք ապացույց են որոնում համոզվելու համար, թե Աստված ներկա է լինում, երբ նրան կանչում են աղոթքի մեջ՝ սրբագործելու համար ծեսը։ Նա, ով ոգևորությամբ ձեռնամուխ է լինում այդ որոնմանը, թող վերատին կարդա այն, ինչ նախապես քննարկել ենք։ Արդարեւ, հաստատելով իսկապես աստվածային բնույթն այն զո-

բության, որը մարմնապես հայտնվեց մեզ, արդեն հանդես ենք եկել ի պաշտպանություն ներկա հարցի:

Մենք արդեն ցույց ենք տվել աստվածությունը նրա, ով մեզ երևացել է մարմնապես⁷³ և հայտնել իր աստվածային բնությունն այն հրաշքներով, որ նա կատարել է իր կյանքի ընթացքում. և դա միանգամայն ապացուցում է, որ նա ներկա էր լինում ամեն անգամ, երբ կանչվում էր: Արդարեւ, ամեն բան ունի իր յուրահատկությունը, որ ճանաչելի է դարձնում նրա բնությունը. աստվածային բնությանը հատուկ է ճշմարտությունը: Արդ, Աստված խոստացավ լինել միշտ նրանց կողքին, ովքեր կանչելու էին իրեն (Մատթ. 7, 7: Հովկ. 14, 13: 15, 7 և 16, 23), լինել իր հավատացյալների մեջ (Մատթ. 18, 20: 28, 20), մնալ բոլորի հետ և հարաբերության մեջ լինել յուրաքանչյուրի հետ (Հովկ. 14, 23): Կարիք ունե՞նք աստվածային զորության մի ուրիշ ապացույցի: Հրաշքներն արդեն հավատ են տվել մեզ դրա աստվածային բնույթի մասին: Մենք գիտենք, որ աստվածությանը հատուկ է զերծ լինել ամեն ստությունից: Եվ հիմնվելով նրա խոստման ճշմարտացիության վրա՝ կասկածի տակ չենք դնի ներկայությունն այն բանի, որ խոստացվել է մեզ:

Սրբազործող աղոթքի ազդեցությունը

Աղոթքով Աստված կանչվում է նախքան աստվածային շնորհի բաշխումը, և դա լրացույցիչ մի ապացույց է, որ այն գործողությունը, որ կատարման ընթացքի մեջ է, Աստծու միջոցով հասնում է իր կատարյալ ավարտին: Արդարեւ, երբ մարդու սերնդագործումը կատարվում է բնական ճանապարհով, աստվածային զորության ազդեցությամբ է, որ (ինչպես այդ մասին ասացինք վերևում) ծնողների նախաձեռնությունը, եթե նույնիսկ նրանք Աստծուն չեն հայցում

աղոթքի մեջ, հանգում է այն բանին, որ ձևավորում է սերվող էակը, մինչդեռ առանց այդ զորության նրանց ջանքը կլիներ զուր և անօգուտ: Եթե այդպես է, որքա՛ն ավելի ամբողջական կլինի այդ ցանկալի ազդեցությունը ծննդագործության իր հոգեկոր ձևի մեջ: Մի՞թե Աստված չէր խոստացել ներկա լինել, մի՞թե կատարվող գործողության մեջ նա չի դրել (հենց դա է, որին մենք հավատում ենք) այն կարողությունը, այն ուժը, որը բխում է նրա անձից, երբ մեր կամքը ձգտում է դեպի ցանկալի առարկան: Ասում եմ, որքա՛ն ավելի ամբողջական կլինի այդ ազդեցությունը, եթե աղոթքի օգնությունն ավելանա դրան, ինչպես հարկն է:

Նրանք, ովքեր աղոթում են Աստծուն, որ արևը ծագեցնի իրենց վրա, այդպես անելով, ոչնչով չեն ազդի մի երկույթի վրա, որ առանց այդ էլ տեղի կունենար: Նույնպես այն մարդիկ, որոնք համոզված են, որ Աստծու շնորհն օգնում է ըստ այն ճշմարիտ խոստման, որ տրվել է, այն մարդիկ, որ վերածնվել են մկրտության խորհրդով, որը բաշխվել է իրենց, այդպիսով կա՛մ ավելացնում են տրված շնորհը, կա՛մ չեն խեղաթյուրում այն շնորհը, որ գոյություն ունի. որովհետև շնորհը ներկա է բոլոր պարագաներում, մենք հավատում ենք դրան, քանի որ նա, ով տվել է այդ խոստումը, Աստված է, և նրա հրաշքները առկա են՝ վկայելու համար նրա աստվածությունը. այնպես որ ամեն ինչ մեզ արդելում է կասկածի տակ առնել Աստծու ներկայությունը:

Եռակի թաթախում մկրտության ավագանում⁷⁴

35. Երեխայի ջրի մեջ մտնելը և երեք անգամ նրա թաթախումը իր մեջ պարունակում է մի ուրիշ խորհուրդ: Մեր փրկության համար կիրառված այս միջոցը իր զորությունը պարտական է ոչ այնքան քրիստոնեական պարզ վարդապետությանը, որքան նրա իսկ գործերին, ով ընդունեց բա-

ժանել մարդկային վիճակը։ Նա կյանքին տվեց իր ամբողջ ամրությունն ու ուժը. իր զգեցած և իր հետ աստվածացրած մարմնով նա փրկեց միաժամանակ այն ամենը, ինչ նման էր մարմնականին և ուներ այն նույն բնությունը, ինչ որ իր փրկված մարմինը։ Այս պայմաններում անհրաժեշտ էր երևակայել մի գործելակերպ, երբ առաջնորդվողի կատարած գործերը մերձավորություն և նմանություն են ունենում նրա գործերի հետ, ով առաջնորդում է։ Ուստի այժմ պետք է վերլուծել մեր կյանքի առաջնորդի առանձնահատկությունները, որպեսզի, ինչպես Առաքյալն է առում (Եբր. 2, 10), նրանք, որ հետեւում են նրան, ընդօրինակեն մեր փրկության հեղինակին⁷⁵։

Ռազմական վարժությունների մեջ փորձառու մարդիկ նորակոչիկներին պատրաստում են զորավարժությունների։ Նրանք նայում են նրանց, թե ինչպես են շարժվում, որպեսզի սովորեցնեն զինվորական քայլվածքի կոռույթավոր շարժումը։ Նա, ով չի հետեւում ցույց տրված օրինակին, չի տիրապետի այդ վարժությանը։ Այդպես էլ նրանք, ովքեր ոգեսրված են նմանօրինակ մի եռանդով բարի գործ կատարելու համար, պարտավոր են անպայման հետեւ և ճշգրտորեն ընդօրինակել նրան, ով մեզ առաջնորդում է դեպի մեր փրկությունը՝ գործադրելով այն օրինակը, որ նա տալիս է մեզ։ Անհնար է հասնել նույն նպատակին առանց հետեւելու միևնույն ճանապարհին։

Բանտից դեպի ազատություն

Նրանք, ովքեր մոլորված թափառում են լաբիրինթոսում, չեն իմանում ինչպես դուրս գալ այնտեղից։ Բայց եթե հանդիպեն մեկին, որը քաջ ծանոթ է այդ բավիղին, կհետեւն նրան, որպեսզի այս ու այն կողմ շրջելով՝ հասնեն այդ կառույցի մանվածապատ, նենդ և ծամածուռ դարձ-

վածքների մինչև ծայրը։ Նրանք ի վիճակի չէին լինի այն-տեղից գուրս գալու, եթե քայլ առ քայլ չհետեւեին իրենց առաջնորդին։ Մտածեցե՛ք ուրեմն, կյանքի լաբիրինթոսը նույնպես մարդու համար կլինի անելանելի, եթե նա չըռնի այն նույն ճանապարհը, որը շրջապարսպից դուրս առաջ-նորդեց նրան, ով մտել էր այնտեղ։

Երրորդ օրը

Լաբիրինթոսը խորհրդանշում է ինձ համար մահվան անելանելի բանար, որտեղ արգելափակվել էր դժբախտ մարդկային ցեղը։ Ասացե՛ք, ի՞նչ կատարվեց մեր փրկության հեղինակի հետ։ Երեք օր մնաց մահվան մեջ, հետո վերադարձավ դեպի կյանք։ Հարկավոր է, ուրեմն, որ մենք էլ մեզ համար գտնենք համանման ինչ-որ բան։ Ի՞նչը մեզ թույլ կտա ամբողջովին ընդօրինակել այն, ինչ տեղի ունեցավ նրա համար։

Մեռնելուց հետո ամեն մարդ գտնում է իր բնական հանգստարանը. դա այն հողն է, որտեղ նա թաղվում է։ Արդ, գոյություն ունի մի սերտ նմանություն հողի և ջրի միջև, երկու տարրեր,⁷⁶ որոնք օժտված են ծանրությամբ և միտվում են դեպի ցած։ Միայն այս երկուսն են, որ կան ու մնում են մեկը մյուսի մեջ և կլանվում մեկը մյուսով։ Քանի որ մեր կյանքի Առաջնորդը, մահանալով, իջավ հողի մեջ համաձայն մարդկային ընդհանուր վիճակի, հենց այն տարրի մեջ, որը խորհրդանշականորեն մոտենում է դրան, մենք ընդօրինակում ենք նրա մահը։

Եվ ինչպես նա՝ վերևից եկած Մարդը (Հովհ. 3, 31: Ակորնթ. 15, 47), ընդունել էր դիակի վիճակը և դրվել հողի մեջ, ապա երրորդ օրը վերադրձել կյանքին, այնպես էլ նա, ով նրա հետ բաժանում է մարմնական վիճակը, կարո՛ղ է ձեռք բերել նույն երջանիկ արդյունքը (ուզում եմ ասել՝

կյանքը), և այն բանից հետո, երբ հողի փոխարեն ջուր են թափում նրա վրա և երեք անգամ նրան ընկղմում այդ տարրի մեջ, կարո՞ղ է նույնպես ընդօրինակել երրորդ օրը ձեռք բերված հարության շնորհը⁷⁷:

Վերևում արդեն ասել ենք⁷⁸, որ մահը մուտք է գործել մարդկային բնության մեջ աստվածային կանխատեսությամբ. այն պահին, երբ հոգին և մարմինը բաժանվում են իրարից, արատը դուրս գալով կչքանա, ապա հարությունը կվերակազմի մարդուն, որը կվերագտնի ինքն իրեն անեղծ, կրքերից ազատ, մաքուր և զերծ արատի ամեն խառնուրդից: Այն ծրագիրը, որ մեռնելիս առաջադրում էր մեր փրկության հեղինակն ու առաջնորդը, և որը վերաբերում էր իրեն, իրականացավ կատարյալ ձեռվ. այն կատարվեց լիովին՝ ըստ այն նպատակի, որ իրն էր⁷⁹:

Այն տարրերը, որոնք միավորված էին, արդարև բաժանվում են մահվամբ, ապա նորից մոտենում իրար, այնպես որ մարդկային բնությունը միավորված մասերի, այսինքն՝ հոգու և մարմնի տարրալուծումով մաքրագործված լինելով՝ բաժանված այդ տարրերի վերադարձը դեպի կյանք այլևս չի պարունակում այն խառնուրդը, որ խաթարում էր դրանք: Դրան հակառակ, նրանց համար, որոնք հետևում են մեր փրկության առաջնորդին, ներկա վիճակը թույլ չի տալիս ամբողջապես ընդօրինակել նրան, այդ վիճակն այժմ թույլատրում է նրան ընդօրինակել ուժերի ներած չափով՝ մնացածը վերապահելով գալիք ժամանակին⁸⁰:

Ի՞նչ բանի մեջ է կայանում ուրեմն այդ ընդօրինակումը. անհետացնել մեր բնությանը խառնված արատը՝ խորհրդանշականորեն թաղվելով ջրի մեջ: Հարցն այնքան չի վերաբերում ամբողջական անհետացմանը, որքան չարի հետ խզումին: Երկու պատճառներ նպաստում են արատի ոչնչացմանը. մեղավորի ապաշավը և մահվան ընդօրինա-

կումը: Մրանցով է, որ մարդը ինչոր ձևով ձերբագատվում է չարի հետ միավորումից: Ապաշավը նրան ատել, հեռացնել է տալիս արատը, իսկ մահը ոչնչացնում է չարը⁸¹:

Ընդօրինակել Քրիստոսին

Նա, ով ուզում է ընդօրինակել Քրիստոսին, պետք է կարողանա գնալ մինչև ամբողջական մահը և ոչ թե բավարարվի միայն ընդօրինակելով նրան, որպեսզի վիճակը լինի նույնը, և չարը ամբողջապես վերանա մեր բնությունից՝ ըստ Առաքյալի խոսքի (Հոռմ. 6, 10), այնպես որ մենք մեղնդմիշտ մեռած կլինենք մեղքի համար: Բայց, ինչպես ասվեց, մենք գերագույն Զորությանն ընդօրինակում ենք սոսկ մեր խղճուկ բնության սահմանների մեջ: Երեք անգամ ջուր թափելով մեզ վրա և դուրս գալով ջրից՝ մենք խորհրդանշում ենք այն թաղումը, որը մեզ փրկեց, և այն հարությունը, որը տեղի ունեցավ երեք օրում: Եթե ջուրը մեր տրամադրության տակ է գտնվում, և եթե մենք ազատ ենք սուզվելու դրա մեջ և դուրս գալու այնտեղից, ապա տիեզերքի Տերը իշխանություն ուներ սուզվելու մահվան մեջ (ինչպես մենք՝ ջրի մեջ) և վերադառնալու այն երանությանը, որ իրն է⁸²:

Ուստի, եթե ուշադրություն դարձնենք խորհրդանշականությանը, հաշվի առնենք տրամադրելի զորության աստիճանը մեկ և մյուս կողմից, ապա ոչ մի տարբերություն չենք գտնի դրանում. Փրկիչը և մարդը, յուրաքանչյուրն իր կողմից, կատարում են այն, ինչ իրենց կարողության սահմանում է՝ ըստ յուրաքանչյուրի վիճակի չափի: Եթե մարդու համար, կամենալու դեպքում, հնարավոր է առանց վտանգի շիման մեջ մտնել ջրի հետ, ապա գերագույն Զորության համար շատ ավելի դյուրին է մտնել մահվան մեջ և չեթնարկվել իրեն տկարացնող որևէ փոփոխության:

Այդ իսկ պատճառով ջուրը նախերգանքն է հարության շնորհի. նա սովորեցնում է մեզ, որ հավասարապես դյուրին է մեզ համար մկրտվել ջրով և դուրս ելնել մահվանից: Կյանքի իրադարձությունների մեջ որոշ բաներ ավելի վճռական են, քան շատ ուրիշներ և անհրաժեշտ հաջողության հասնելու համար: Բայց եթե համեմատելու լինենք մեկնակետը վախճանի հետ, ապա սկսված գործը ձեռք բերված արդյունքի հետ բաղդատած՝ կթվա աննշան: Ինչպես կարող ենք, օրինակի համար, հավասար աստիճանի վրա դնել մարդը և այն սերմը, որը սահմանված է կազմելու նրան: Սակայն և այնպես առանց մեկին գոյություն չէր ունենա մյուսը: Այդպես էլ հարության անչափ մեծ առանձնաշնորհը, հակառակ իր գերակայությանը, այստեղից է քաղում իր ծագումը և պատճառները. նման մի արդյունք չի կարող առաջ գալ առանց այս նախնական պատրաստության:

Սկրտության անհրաժեշտությունը

Կրկնում եմ և հաստատում. մարդը չի կարող հարություն առնել առանց մկրտությամբ վերածնված լինելու: Այս բանն ասելով՝ ես նկատի չունեմ մարդ արարածի վերակազմությունն ու վերանորոգությունը: Ինչ էլ որ լինի, մարդկային բնությունը գնալու է դեպի այնտեղ իր սեփական օրենքների մղումով, ըստ նախագծված իր կառուցվածքի, մկրտության շնորհն ընդունած լինի թե դուրս մնացած այդ խորհրդից: Ես այստեղ ուզում եմ խոսել այն վերանորոգության մասին, որ տանում է դեպի երանական, դեպի աստվածային այն վիճակը, որը ջնջում վերացնում է ամեն տառապանք:

Յուրաքանչյուր ոք, որ հարությամբ գոյության վերադառնալու առանձնաշնորհն է ստանում, նույն գոյության, նույն կյանքին չի վերադառնում: Մեծ անջրպես կա ար-

դեն մաքրագործված մարդկանց և այն մարդկանց միջև, որոնք տակավին կարիք ունեն մաքրագործվելու: Նրանք, ովքեր ներդաշնակել են իրենց կյանքը մկրտության մաքրագործումով, գնում են դեպի այն գոյությունը, որ իրենց խորունկ էությունն է կազմում: Արդ, մաքրագործմանը սերտորեն միացած է կրքերի բացակայությունը, իսկ կրքերի բացակայության մեջ է կայանում երանությունն անվիճելիորեն: Գալով այն մարդկանց, որոնց մեջ կրքերը հնացել արմատավորվել են, և որոնք այդ արատը ջնջելու համար չեն դիմել ոչ մի միջոցի՝ ո՛չ մկրտության ջրի, ո՛չ աստվածային զորությանն ուղղված աղերսի, ո՛չ զղման, որը կարող էր ուղիղ ճանապարհի դարձնել նրանց, ~ այդպիսիք իրենք ևս պիտի արժանանան այն տեղին, որը համապատասխանում է նրանց կյանքի ընթացքին:

Մաքրագործման օրենքը

Արդ, եթե ոսկին անարատ կամ մաքուր չէ, նրան հարմար տեղը զտող վարպետի քուրան է, որպեսզի այդ մեղավորներին խառնված արատը, երկար դարերից հետո, վերադառնա Աստծուն զտված, մաքուր և անեղծ⁸³: Քանի որ կրակը և ջուրը մաքրագտելու հատկություն ունեն, նրանք, ովքեր արատը մաքրել են մկրտության ջրով, կարիք չունեն մաքրագործման մյուս ձեին. մյուսները, ընդհակառակը, որոնք չեն ենթարկվել այդ մաքրագործմանը, անհրաժեշտութեն պետք է մաքրվեն կրակով:

36. Արդարեւ, ընդհանրական տրամաբանությունը և Սուրբ Գրքերի ուսուցումը ցուց են տալիս, որ աստվածային դասին մաս չենք կարող կազմել առանց ամբողջապես լվացվելու արատի կեղտերից: Այս պայմանը ըստ ինքյան թեե շատ փոքր է, սակայն մեծ բարիքների սկիզբը և հիմքն է դառնում: Ասում եմ փոքր՝ նկատի ունենալով այն դյու-

բությունը, որով ձեռք է բերվում այդ երջանիկ արդյունքը: Ի՞նչ դժվարություն կա հավատալու համար, որ Աստված ամեն տեղ է, որ լինելով ամեն ինչում՝ նա նաև մոտ է բոլոր նրանց, ովքեր հայցում են նրա կենդանարար գորությունը, և որ լինելով ներկա՝ նա գործում է ըստ իր բարի կամքի:

Արդ, Աստծու գործունեությանը հատուկ է ի կատար ածել փրկությունը նրանց, ովքեր դրա կարիքն ունեն: Այդ փրկությունն իրագործվում է ջրի մեջ կատարվող մաքրագործումով: Նա, ով մաքրագործվել է, կմասնակցի մաքրության վիճակին, իսկ ճշմարիտ մաքրությունը Աստված է: Տեսնո՞ւմ եք, թե այս բանն ինչքան պարզ է և հեշտությամբ իրագործելի: Հավատ և ջուր, առաջինը թողնված է մեր կամքի կարողությանը, մյուսը հասարակաց սնունդ է: Սակայն առաջ եկած բարիքը չափազանց կարևոր է. դրանով մենք մտնում ենք Աստծու ընտանիքի մեջ⁸⁴:

Հաղորդություն

Քրիստոսի մարմինը և արյունը սրբացնում են⁸⁵

37. Տրված լինելով, որ մարդ արարածը երկակի է՝ կազմված հոգու և մարմնի խառնուրդից, փրկության ճանապարհի վրա գտնվող մարդիկ մեկով և մյուսով անհրաժեշտորեն շփման մեջ պետք է մտնեն մեր փրկության Առաջնորդի հետ, որը նրանց տանում է դեպի կյանք: Հավատով խառնված լինելով նրան՝ հոգին նրա մեջ գտնում է իր փրկության մեկնակետը: Արդարեւ, միավորումը կյանքի հետ՝ ենթադրում է մասնակցել կյանքին. բայց մարմինն ինքը ուրիշ կերպ է վայելում Փրկչին և խառնվում նրան: Այն մարդիկ, որոնց նենդությամբ թույն են խմեցրել, այդ մահարեր թույնի ազդեցությունը չեզոքացնում են մի այլ

թմրանյութով, բայց հարկավոր է, որ հակաթույնը, ինչպես ինքը՝ թույնը, թափանցի մարդու կենսական օրգանների մեջ, որպեսզի թմրանյութի ազդեցությունը, այդ օրգաններից անցնելով, տարածվի ամբողջ մարմնի մեջ: Այսպես է նաև մեզ համար. մենք ճաշակել ենք մեր բնությունը քայքայող մի բան և անհրաժեշտորեն կարիք ունենք մի ուրիշ բանի, որը հավաքի մեր բնության իրարից բաժանված տարրերը: Այդ գեղամիջոցը, թափանցելով մեր մեջ, իր հակառակ ազդեցությամբ կվանի արդեն մեր մարմնի մեջ մուտք գործած չարաղետ թույնի ազդեցությունը⁸⁶:

Դեղամիջոց մահվան դեմ

Ի՞նչ է այդ գեղամիջոցը: Ոչ այլ ինչ, եթե ոչ այս փառապանծ մարմինը, որ ցույց տվեց իրեն, թե ավելի հզոր է, քան մահը, և դարձավ մեզ համար կյանքի աղբյուր: Ինչպես որ, ըստ Առաքյալի խոսքի, մի փոքր թթվամոր ամբողջ զանդվածը խմորում է (Ա Կորնթ. 5, 6), այնպես էլ Աստծու կողմից անմահությանը բարձրացած մարմինը, մտնելով մեր մարմնի մեջ, ամբողջապես այն փոխում և վերածում է իր սեփական էությանը: Երբ մահարեր մի թմրանյութ խառնվում է առողջ մարմնին, ամեն ինչ, որ ենթարկվում է այդ խառնուրդին, կաթվածահար է լինում: Նույնպես, երբ անմահ մարմինը մտնում է այն մարմնի մեջ, որն ընդունում է այն, կերպարանփոխում և իր սեփական բնությանն է վերածում ամբողջ օրգանիզմը:

Որևէ բան մարմնի մեջ թափանցելու համար պետք է անհրաժեշտորեն անցնի սննդի և ըմպելու միջոցով, որպեսզի խառնվի կենսական օրգաններին: Հստ բնական միջոցի, մարմինը պետք է ստանա կենսարեր զորություն: Արդ, այն մարմինը, որի մեջ Աստված մարդացավ, միակն է, որ ստացել է այդ շնորհը. և մեր մարմինը, ինչպես ցույց տվեցինք

այդ, չի կարող անմահություն ձեռք բերել, եթե իր սերտ միությունը Անմահի հետ իրեն մասնակցել չտա անապահանությանը⁸⁷: Հարկավոր է, ուրեմն, քննել, թե ինչպես խորհրդական այս միակ մարմինը ամբողջ մեր երկրագնդի վրա չդադարելով հանդերձ բաժանվել տասնյակ ու տասնյակ հավատացյալների միջև, կարողացել է ամբողջապես տրվել յուրաքանչյուրին նրանց ստացած միակ մասնիկի մեջ՝ ինքն իսկ մնալով հանդերձ ամբողջական⁸⁸:

Որպեսզի մեր հավատը կարողանա աչքի առաջ ունենալ մեր վարդապետության սերտ կապակցվածությունը և ոչ մի անորոշություն չզգա մեր խորհրդածությանը հանձնված նյութի առջև, հարկավոր է, որ մի պահ կանգ առնենք այն օրենքների վրա, որոնք ղեկավարում են մարմինը: Հիրավի, ո՞վ չգիտե դա: Մեր ֆիզիկական բնությունը, ինքն իր մեջ վերցրած, իր գոյությունը չի հիմնում մի գոյացության վրա, որ հատուկ լինի իրեն: Նա կանգուն է մնում և գոյատեսում շնորհիվ այն ուժի, որը հորդում է իր մեջ՝ չդադարող մի շարժումով դեպի իրեն ձգելով այն, ինչ պակասում է իրեն, և արտաքսելով այն, ինչ անօգուտ է:

Վեցնենք, օրինակի համար, հեղուկով լի կաշվից մի տիկ: Եթե նրա պարունակությունը, դուրս հոսելով, գնար տակից, նա չէր պահի իր ուռած ձեր, եթե միայն մի ուրիշ հեղուկ վերևից չլցվեր այստեղ՝ լրացնելու համար դատարկվածը:

Երբ նայում ենք տիկի ծավալուն պարագծին, այդպիսով անդրադառնում ենք, որ նա իրականում մեր աչքի առաջ գտնվող առարկայի անբաժան մասը չի կազմում. հեղուկի հոսքն է, որ տիկի ներսից ձևափորում է նրա բոլորշի ծավալը: Մեր մարմնի կառուցվածքը նույնպես սեփական ոչ մի միջոց չունի կանգուն մնալու. նրա մեջ մտցված ուժն է, որ ապահովում է նրա մշտակայությունը:

Սուլք Հաղորդության սնունդը

Այդ ուժը սնունդն է. այդպես են կոչում այն: Այդ սնունդը նույնը չէ բոլոր մարմինների համար, որոնք սնվում են: Յուրաքանչյուրն ունի իրեն հարմար սնունդը, որը սահմանված է նրա՝ կողմից, ով կազմավորել է բնությունը: Որոշ կենդանիներ սնվում են արմատներով, որ դուրս են հանում հողից, ուրիշներն ապրում են խոտաբույսերով, մի քանիսն էլ՝ մսով: Մարդն ինքը սնվում է գլխավորապես հացով: Եվ որպեսզի խոնավ տարրը մնա ու պահպանվի մեր մեջ, մենք խմում ենք ոչ միայն մաքուր ջուր, այլև՝ ջրախառն գինի, որը մեզ տալիս է ներքին ջերմություն: Այս տարրերի առկայությամբ է, որ նկատի է առնվում, թե զորութենապես ինչ ծավալ ունի մեր մարմինը: Արդարեւ, մտնելով մեր մեջ՝ այս տարրերը դառնում են իմ արյունն ու մարմինը՝ շնորհիվ փոխարկելու այն կարողության, որով սնունդն ստանում է մարմնի ձև:

Այս կետերը ծշտելուց և հաստատելուց հետո, այժմ անցնենք մեզ զբաղեցնող նյութին: Մենք աշխատում ենք իմանալ, թե ինչպես Քրիստոսի միակ մարմինը կարողանում է կենդանություն պարգևել հավատացյալ բոլոր մարդկանց և բաժանվել առանց նվազելու: Գուցե մոտենում ենք այս երևույթի ծմբարտանման բացատրությանը: Ընդունենք հետևյալ կետերը. ամեն մարմին իր գոյությունն ստանում է սննդից, իսկ այդ սնունդը կազմված է պինդ ուտելիքից և ըմպելուց: Արդ, Աստծու Բանը (Խոսքը), որը միաժամանակ Աստված է և Բան, ինչպես այդ հաստատեցինք սկզբից, խառնվել է մարդկային բնությանը. խառնվելով մեր մարմնին՝ նա մեր մարդկային վիճակի համար չի երևակայել լինելության մի նոր կերպ, այլ մեր մարմնին տվել է գոյատելելու կարելիություններ նրան հարմար սովորական միջոցներով: Նա կանգուն էր պահում

մեր մարմնի գոյացությունը պինդ ուտելիքի և ըմպելու օգնությամբ: Եվ այդ պինդ ուտելիքը հացն էր:

Աստծու հացը

Այս պայմաններում (մենք այս բանն արդեն ասել ենք բազում անգամներ), երբ տեսնում ենք հացը, նրա մեջ որոշ իմաստով տեսնում ենք մարդկային մարմինը, քանի որ մարմնի կողմից յուրացված հացը հենց ինքը մարմին է դառնում: Այստեղ այն մարմինը, որի մեջ Աստված մարդացել էր (քանի որ հացով էր սնվում), որոշ իմաստով նման էր հացի. սնունդը փոխակերպվել էր՝ ստանալու համար մարմնական բնություն:

Արդարեւ, նրա փառապանծ մարմնի մեջ մենք հաստատեցինք այն հատկությունը, որ ընդհանուր է բոլոր մարդկանց համար. այդ մարմինը ինքը ևս կանգուն էր մնում հացի օգնությամբ: Բայց այդ մարմինը հենց այն պատճառով, որ իր մեջ չէր բնակվում Աստծու Բանը, մասնակցեց աստվածային բարձրագույն պատվին: Ուստի, մենք այժմ իրավունք ունենք հաստատելու, որ Աստծու խոսքով սրբագրութված հացը փոխակերպվում է՝ դառնալու համար Բան Աստծու մարմինը⁸⁹:

Արդարեւ, այս մարմինը (զորություն պարունակող հացը) սրբագործվել է իր մեջ բնակվող Բանի առկայությամբ: Այն փոփոխությունը, որն աստվածային զորության է բարձրացրել այդ մարմնի մեջ փոխանակված հացը, այստեղ դարձյալ առաջ է բերում համազոր մի արդյունք: Առաջին գեպքում Բանի շնորհը սրբագործում էր մարմինը, որը հացից էր ստանում իր գոյացությունը և որոշ իմաստով ինքն իսկ հաց էր: Նույնպես այստեղ հացը, ըստ Առաքյալի խոսքի (Ա. Տիմ. 4, 5), սրբագործվում է Աստծու խոսքով և աղոթքով, բայց նա այլևս որպես սնո՞ւնդ չի

դառնում Բանի մարմինը. նա իսկույն փոխակերպվում է նրա մարմնին Բանի զորությամբ, ինչպես հաստատում է հետևյալ խոսքը. «Սա է իմ մարմինը» (Մարկ. 14, 22: Մատթ. 26, 26: Ղուկ. 22, 19):

Գիճին և ջուրը՝ Քրիստոսի արյուն

Բայց ամեն մարմին սնվում է նաև խոնավ մի տարրով, որովհետև առանց այս երկուսի գործակցության երկրային ինչ բան, որ կա մեր մեջ, կենդանություն չէր ունենա: Մենք մեր մարմնի պինդ մասը կանգուն ենք պահում հաստատուն և պինդ սննդի միջոցով, իսկ խոնավ մասին տալիս ենք նույն բնույթի լրացուցիչ սնունդ: Այս սնունդը մեր մեջ մտնելուց հետո, փոխակերպելու այն կարողության միջոցով, որը գտնվում է մեր մեջ, փոխվում է արյան, մասնավանդ եթե գինու շնորհիվ այն կարող է վերածվել ջերմության:

Արդ, Քրիստոսի փառապանծ մարմինը, որի մեջ բնակվում է Աստված, նմանապես գոյատելու համար, ընդունել է այս տարրը, և Աստված, որ հայտնվել է մեզ, խառնվել է մեր կորստական բնությանը, որպեսզի աստվածացնի մարդկությանը՝ բաժանել տալով նրան աստվածությունը: Ահա թե ինչու, շնորհաբաշխության ծրագրի մեջ, նա տրվում է որպես սերմ բոլոր հավատացյալներին: Գինուց և հացից բաղկացած այս խորհրդական մարմնի մեջ նա խառնվում է նրանց մարմնին՝ թույլ տալու համար մարդուն, որ անմահ մարմնի հետ միավորվելու շնորհիվ մասնակցի անապականությանը:

Ահա թե ինչ է տալիս նա մեզ՝ սրբագործման կարողությամբ արտաքին երկույթները (հացը և գինին) կերպարանափոխելով այս անմահ մարմնին:

Հավատը

38. Մեր սույն ուսումնասիրության մեջ, կարծում եմ, քրիստոնեական խորհրդին վերաբերող ուրիշ ոչ մի հարց չի պակասում, բացի հավատի հարցից: Մենք այն համառոտակի պիտի ներկայացնենք մեր ներկա աշխատության մեջ: Նրանք, ովքեր փնտրում են ավելի ամբողջական մի ուսումնասիրություն, կարող են այն գտնել մեր մյուս աշխատությունների մեջ⁹⁰, որտեղ մենք արդեն մանրամասնորեն բացատրել ենք քրիստոնեական վարդապետությունը մեր կարողության սահմանի մեջ ամենայն բարեխղճությամբ, և որտեղ, հակառակորդների հետ մեր հակաճառության ժամանակ, քննության ենք առել առաջարկված հարցերը:

Այստեղ մեզ թվում է, թե բավական է դիմել Ավետարանին և տեսնել, թե նա ի՞նչ է ասում. «Ով Աստծուց է ծնված, գիտե, թե ում որդին է ինքը և ինչ է իր բնությունը» (Հովհ. 1, 13: 3, 6-7): Արդարեւ, միայն այս ձեռվ ծնվածն իշխանություն ունի ընտրելու այն, ինչ ուզում է, և լինելու այն, ինչ ընտրում է:

39. Մյուս ծնունդների մեջ մարդիկ իրենց գոյությունը պարտական են իրենց ծնողների մղումին: Հոգևոր ծնունդը կախված է ծնվողի կամքից: Այս վերջին պարագայում վտանգ կա սխալվելու իր սեփական օգտի վերաբերմամբ, քանի որ ընտրությունն ազատ է: Ուստի, լավ է, որ (և ես հաստատում եմ դա), ով պատասխանատու է իր սեփական ծննդին, սկսի մտածել՝ գիտենալու համար, թե ինչպիսի՝ հայր անհրաժեշտ է ունենալ իր համար, թե ումի՛ց ավելի լավ է ստանալ իր բնությունը, որովհետեւ, ինչպես ասացինք, այս ձեւի ծննդի մեջ մարդ ազատորեն ընտրում է իրեն ծնունդ տվողներին:

Արդ, ինչ որ գոյություն ունի, բաժանվում է երկուսի՝ ստեղծված տարր և անստեղծ տարր: Անստեղծն իր մեջ ու-

նի կայունություն և անփոփոխություն, մինչդեռ ստեղծվածը ենթակա է խաթարման և փոփոխման⁹¹: Քանի որ այս այսպես է, ապա նա, ով մտածելով է կատարում իր համար շահավետ ընտրություն, ո՞ւմ որդին կնախընտրեր լինել. ա՞յն բնության որդին, որը ենթակա է փոփոխության, թե՝ մյուսի որդին, որն ունի անփոփոխ բնություն, կայուն է բարու մեջ և միշտ նման է ինքն իրեն:

Ավետարանը մեզ ծանոթացնում է այն երեք անձերին և երեք անուններին, որոնցով կատարվում է ծնունդը հավատացյալների մոտ: Ով ծնվել է Երրորդության անունով, ծնվել է նմանապես Հորից, Որդուց և Սուրբ Հոգուց, քանզի Ավետարանն ասում է Հոգու մասին, թե՝ «Հոգուց ծնված հոգի է» (Հովհ. 3, 6), Պողոսը ծնում է Քրիստոսի անունով (Ա. Կորնթ. 4, 5) և «Հայրը բոլորի Հայրն է» (Եփես. 4, 6): Ուրեմն, թող այստեղ ունկնդրի մտածողությունը զգուշություն հանդես բերի և չնախընտրի լինել հարափոփոխ, հարաշարժ բնության դուստրը, երբ որ նա կարող է իր գոյության աղբյուրը գտնել հաստատուն և անփոփոխ բնության մեջ:

Կատարված գործողության արդյունքը կախում ունի այն անձի ներքին տրամադրություններից, ով մերձենում է սուրբ խորհրդին: Եթե նա ընդունում է Սուրբ Երրորդության անստեղծ հատկությունը, ապա մուտք է գործում հաստատուն և անփոփոխ կյանքի մեջ, բայց եթե սխալ գաղափար է կազմում Երրորդության մասին և նրա մեջ տեսնում է ստեղծված բնությունը, ապա նա վերածնվում է փոփոխական գոյության մեջ՝ նշավակ եղծումի, որովհետև ծնված ամեն էակ անհրաժեշտորեն բաժանում է իր ծնողների բնությունը⁹²:

Դե ինչ, ո՞րն է ավելի շահավետ, մտնել անփոփո՞խ կյանքի մեջ, թե՝ նորից տարուբերվել անհաստատ և փոփո-

խական մի գոյության ալիքների վրա։ Ամեն մարդու համար, որ փոքրիչատե կարողություն ունի ընտրություն կատարելու, անհամեմատ ավելի արժեք ունի կայունությունը, քան անկայունությունը, կատարելությունը, քան անկատարությունը, այն, ինչ զերծ է կարիքից, քան այն, ինչ կարիքների մեջ է։ Եվ նա, ով աստիճանաբար բարձրանում է, արժանավորությամբ ու պատվով ստորագաս է նրանից, ով կարիք չունի առաջ գնալու և անփոփոխ է մնում կատարելության մեջ։

Ողջամիտ մարդը, հետևաբար, ամեն դեպքում պետք է ընտրի երկուսից մեկը. կա՛մ պիտի հավատա, որ Սուրբ Երրորդությունն Անստեղծն է, և իր հոգևոր ծննդի մեջ նրան համարի որպես իր սեփական կյանքի աղբյուր, և կա՛մ, եթե Որդուն և Սուրբ Հոգուն դիտի իբրև օտարներ Աստծու ընությանը, այն Աստծուն, որն առաջինն է, որը ծշմարիտ է և բարի (ուղում եմ ասել՝ Հոր բնությանը), ապա չպետք է ընդունի այդպիսի դիրքորոշում իր ծննդի պահին, որպեսզի անդիտակցաբար չբաժանի անկատար բնությունը, այն բնությունը, որը կարիք ունի կատարելագործվելու։ Եվ դա նրան կվերադարձնի իր բնական միջավայրին՝ հեռացնելով նրա հավատն անստեղծ կյանքից։

Ենթարկվել այն բանին, ինչը ստեղծված է, նշանակում է իր փրկության հույսը գիտակցաբար դնել դրա վրա և ոչ թե աստվածության վրա։ Արդարեւ, ստեղծագործության մեջ ամեն բան սերտորեն իրար է կապված, որովհետև ամեն բան հավասարապես անէությունից անցնում է դեպի էություն։ Եվ ինչպես որ մարմնի կառուցվածքի մեջ բոլոր անդամներն իրար միջև ունեն սերտ նմանություն, դա վերաբերի վերին անդամներին թե ստորին անդամներին, նույնպես ստեղծված բնությունը մի ամբողջություն է կազմում ստեղծագործության մակարդակի վրա։ Մեր մեջ

վերին տարրի և ստորին տարրի միջև գոյություն ունեցող տարբերությունը ոչ մի բաժանում չի առաջացնում ներքին միասնության մեջ։ Այն բաները, որոնք ըմբռնվում են որպես գոյությունից զուրկ բաներ, կարող են տարբերվել այլ կետերի մեջ, այս կետի մեջ գոյություն չունի բնության ոչ մեկ տարբերություն։

Ուրեմն, եթե մարդ արարածը ստեղծված է, և եթե նա կարծում է, թե Սուրբ Հոգին և Աստծու միածին Որդին նմանապես արարածներ են, ապա իզուր կլիներ հուսալ մի փոփոխություն, որ նրան տաներ բարձրագույն մի կյանքի, մինչդեռ նա վերադառնում է ինքն իրեն։ Սա մեզ հիշեցնում է Նիկոդեմոսի^{*} ունեցած գաղափարը. իմանալով Տիրոջից, որ պետք է վերևից ծնվել, նրա դատողությունը նրան ետ էր տանում դեպի մայրական գիրկը (Հովհ. 3, 4): Փոխանակ ուղղվելու դեպի անստեղծ բնությունը, նա վերադառնում է այն ծննդին, որն ունի սկիզբ և գերություն, նա գնում է ետ դեպի այն ծնունդը, որը գալիս է ներքելից, և ոչ թե այն ծնունդը, որը վերևից է գալիս։ Արդ, Ավետարանն ասում է, որ այն մարդկանց ծնունդը, որոնք փրկվել են, գալիս է վերևից (Հովհ. 3, 3):

Ներքին դարձի անհրաժեշտությունը

40. Բայց եթե քրիստոնեական ուսուցումը կանգ է առնում մինչև հիմա ասվածի վրա, դա անբավարար է։ Իմ կարծիքով, պետք է նկատի ունենալ դրա շարունակությունը, որ անտեսում են շատերն այն մարդկանցից, որոնք գալիս են փնտրելու մկրտության շնորհը։ Նրանք մոլորվում են խաբելով իրենք իրենց, նրանք երկութափես են միայն վերածնվում և ոչ թե իրականում, որովհետև մեր կյանքի կերպարանափոխությունը, որ կատարվում է վերածնությամբ, չի կարող վերածնություն լինել, եթե ոչինչ չի փոխ-

վում մեր կյանքում։ Նա, ով նույնն է մնում, ինչպե՞ս կարելի է երևակայել, թե ուրիշ է դարձել, եթե նրա հատկանշական գծերից ոչ մեկը չի փոխվել։ Ծնունդը չնորհի մեջ՝ պետք է վերանորոգի և կերպարանափոխի մեր բնությունը, դա բացարձակ իրողություն է բոլորի համար⁹³։

Մարդկային բնությունը, որպես այդպիսին, մկրտությունից չի կրում ոչ մի փոփոխություն. ո՛չ բանականությունը, ո՛չ խելքը, ո՛չ իմացությունը և մարդկային բնությանը հատուկ հատկություններից ոչ մեկը չի կերպարանափոխվում։ Արդարեւ, կերպարանափոխությունը վտանգ կներկայացներ վատ հետևանք ունենալու իմաստով, եթե այդ բնական հատկություններից որևէ մեկը ենթարկեր փոփոխության։ Ուրեմն, եթե վերևից եկած ծնունդը մարդու վերանորոգությունն է, և եթե այդ հատկությունները փոփոխություն չեն ընդունում, ապա պետք է քննել, թե ո՛րն է այն կերպարանափոխությունը, որով տեղի է ունենում վերածնության չնորհը։

Ինքնըստինքյան հասկանալի է, որ երբ անհետանում են մեր բնության վատ տարրերը, առաջ է դալիս մեզ բարելավող փոփոխությունը։ Հստ մարդարեի խոսքի (Եսայի 1, 16), երբ մկրտության ջուրը ողողում է մեզ, նա մաքրում է մեր կամքի ցանկությունները և ջնջում հոգու արատները, և այն ժամանակ է, որ մենք դառնում ենք ավելի լավ, և կերպարանափոխությունը տեղի է ունենում դեպի լավ։ Բայց եթե ջուրը տրվում է միայն մարմնին, առանց որ հոգին լվացվի այն արատներից, որ առաջացնում են կրքերը, և եթե այդ խորհրդին հաջորդող կյանքը տարբեր չլինի այն կյանքից, որը նախորդել է դրան, ապա ես առանց տատամսելու, ուղղակի կասեմ հետևյալը, եթե նույնիսկ իմ խոսքը լինի համարձակ։ «Ճուրը այդ պարագայում ջո՛ւր է միայն։ Կատարված գործողության մեջ Սուրբ Հոգին չի

հայտնվի ոչ մի տեղ, եթե մարդը չի բավարարվում ոչ միայն նախատելով Աստծու պատկերը իր մեջ⁹⁴, այլև զայրույթի պահին ամոթալի պոռթկումով կամ ընչաքաղցության կրքով, մտքի անպարկեցտ բորբոքումով, գոռողության մոլուցքով, նախանձով, արհամարհանքով համառորեն շարունակում է պահել անարդարորեն ձեռք բերած վաստակը և պոռնկությամբ տիրացած կնոջը ծառայեցնում է իր հաճույքներին»։

Երբ այս արատները և սրանց նմանները նորից ի հայտ գան այն մարդու կյանքում, որը մկրտված է, ի՞նչն է փոփոխած լինում. ես դա չեմ տեսնում, քանի որ աչքի առաջ եմ ունենում նույն մարդուն, ինչպիսին նա առաջ էր։ Անարդարության զոհը, զրպարտության զոհը, իր ունեցվածքից կողոպտված մարդը, ինչ վերաբերում է ինձ, ոչ մի փոփոխություն չեն տեսնում նրա մեջ, ում լվացել է մկրտության ջուրը։ Նրանք չեն լսել նրանից այն խոսքը, որ ասել էր Զակքեոսը^{*}. «Եթե որևէ մեկին զրկել եմ որևէ բանով, քառապատիկ կհատուցեմ» (Ղուկ. 19, 8)։ Ինչ որ նրանք ասում էին նրա մասին մկրտությունից առաջ, կրկնում են այսօր. նրանք հորջորջում են նրան նույն անուններով՝ ընչաքաղց, անկուշտ, ուրիշի ունեցվածքին ցանկացող, ուրիշ մարդկանց դժբախտացնելով կերած հղփացած։ Ով շարունակում է մնալ նույն վիճակի մեջ՝ ամեն տեղ գնալ ասելով, թե մկրտությունը կերպարանափոխել է իրեն և դարձրել ավելի լավ, պետք է լավ լսի Պողոս առաքյալի ասած հետևյալ խոսքը. «Եթե որևէ մեկը իրեն մի մեծ մարդու տեղ է գնում, և սակայն ոչինչ է, նա ինքն իրեն է խաբում» (Թաղատ. 6, 3), որովհետև ինչ որ դուք չեք դարձել, դուք այդ չեք։

Վերածնված մարդկանց մասին Ավետարանն ասում է. «Ովքեր նրան ընդունեցին, նրանց իշխանություն տվեց լի-

նելու Աստծու որդիներ» (Հովհ. 1, 12): Երեխան ճիշտ նույն ազգից է լինում, ինչ որ նրա հայրը: Եթե դուք ընդունել եք Աստծուն, և եթե դուք դարձել եք Աստծու որդիներ, ապա հե՞նց ձեր մեջ ցույց տվեք նրան, ով ձեզ ծնել է: Այն նշանները, որոնք մեզ ճանաչել են տալիս Աստծուն, պետք է մեզ ցույց տան Աստծու հետ ունեցած ազգակցությունն այն մարդու, ով դարձել է Աստծու որդի: «Նա բաց է անում իր ձեռքը և հաճույքով հագեցնում բոլորին» (Սաղմ. 145, 16), «Ներում է անիրավությունը» (Միք. 7, 18), «Ափսոսում է [մարդկանց] չարիքների համար». «Տերը բարի է բոլորի հանդեպ» (Սաղմ. 145, 9), «Նա չի զայրանում ամեն օր» (Սաղմ. 7, 12). «Ճշմարիտ է Տերը, և նրա մեջ անարդարություն չկա» (Սաղմ. 92, 16): Եվ սրանց նման բոլոր նշանները, որ մեզ սովորեցնում է Սուրբ Գիրքը այս կամ այն տեղ: Եթե դու կրում ես այս նշանները, ապա իրոք դարձել ես Աստծու որդի:

Իսկ, ընդհակառակը, եթե շարունակես ցույց տալ արատի նշաններ, ապա իզուր ես կրկնում, որ դու եկել ես վերկից. մարդարեի ձայնը քեզ կասի. «Դու մարդո՛ւ որդի ես» (Սաղմ. 4, 3-4) և ոչ թե Բարձրյալի (Սաղմ. 82, 6-7): «Դու սիրում ես ունայնությունը, փնտրում ես սուտը, դու չգիտես, թե ինչ ձեռվ է մարդը փառավորվում» (Սաղմ. 4, 4). դու չգիտես, թե նա չի կարող փառավորվել, եթե աստվածապաշտ չէ:

Արդարների երանությունը

Անհրաժեշտ ենք համարում այս ուսուցումներին ավելացնել այն, ինչ մեզ մնում է ասելու. և ամենից առաջ այն, որ Աստծու խոստումների մեջ ընծայված բարիքներն այն մարդկանց, որոնց կյանքը բարի եղած կլինի, այնպիսին են, որ մարդկային լեզուն չի կարող նույնիսկ ուրվագծել: Ար-

դարեւ, ինչպե՞ս կարող ենք նկարագրել «այն, ինչ որ աչքը չի տեսել, ինչ որ ականջը չի լսել և ինչ որ չի բարձրացել մինչև մարդու սիրտը» (Ա Կորնթ. 2, 9):

Մեղավորների վերջնական ճակատագիրը

Մեղավորների ցավալի կյանքը նմանապես չի կարող համեմատվել այս աշխարհում մարդուս զգայարանները տանջող ոչ մի բանի հետ: Անդենականի պատիմներին եթե նույնիսկ տանք այն բոլոր անունները, որոնք ծանոթ են մեզ այս աշխարհում, դարձյալ տարբերությունը մնում է մեծ: «Կրակ» բառը լսելիս (Եսայի, 66, 24: Մարկ. 9, 48: Մատթ. 3, 10: Ղուկ. 3, 9) դուք սովորել եք մտաբերել բոլորովին այլ բան, քան այս աշխարհում եղած կրակը, որովհետեւ այնտեղի կրակն ունի այնպիսի մի հատկություն, որից զուրկ է այստեղի կրակը: Մեկը չի հանգում, մինչդեռ մարդուս փորձառությունը հայտնաբերել է միջոցներ հանգցնելու մյուսը, և տարբերությունը մեծ է հանգող կրակի և այն կրակի միջև, որն անշիջանելի է: Ուրեմն, անդենականի կրակը բոլորովին ուրիշ է, քան այս աշխարհի կրակը:

Եվ եթե լսում ենք «որդ» բառը (Եսայի, 66, 24, Մարկ. 9, 48), ապա անվանումների նմանությունը չպետք է նույնապես մտածել տա այն փոքր կենդանու մասին, որը սողում է գետնի վրա: Արդարեւ, այստեղ ավելանում է «հավիտենականի» որակումը, որը մեզ մտաբերել պետք է տա տարբեր բնություն ունեցող մի բան, քան այն սողունը, որ մեզ ծանոթ է: Այս բանները, որ մեզ սպասում են մյուս աշխարհում, ըստ Աստծու արդար դատաստանի, կյանքում յուրաքանչյուրիս ազատ ընտրության արդյունքներն են: Խելամիտ մարդկի պետք է նայեն ոչ թե ներկային, այլ՝ ապագային, կարճատեւ և անցողիկ այս կյանքում պետք է դնեն ան-

պատմելի երանության հիմքերը, ազատ ընտրությամբ իրենց կյանքն ուղղեն դեպի բարին, զգուշանան չարություն անելուց ինչպես այսօր՝ իրենց կյանքի ընթացքում, այնպես էլ հետագայում՝ մշտնջենական վարձահատուցման ժամանակ:



ՎԵՐՋՆԱԿԱՆ ՆՊԱՏԱԿ⁹⁵

Հավելյալ ծանոթություն

Հետագա տողերը պակասում են ձեռագրերի մեծ մասի մեջ: Դրանք գտնվում են Բրիտանական թանգարանում պահպաժ «Քրիստոնեական ճառ» վերնագրով ձեռագրի վերջում: Փարիզյան հրատարակություններում ընդգրկված են այդ տողերը: Դրանց հանդիպում ենք նաև Մինյի «Հունական հայրաբանություն» աշխատության մեջ: Հատվածի սկզբնական մասը անհասկանալի է: Հնարավոր է, որ բաց են թողնված առաջին բառերը: Նախադասության սկիզբը կարելի է վերականգնել մոտավորապես այսպես.

[Մեր հավատը այն հատկանիշներով, որոնք բնութագրում են] Քրիստոսին, կամենում է նկատի առնել երկու բնություն, բայց դավանում է դրանց գոյացական միավորումը և այդ տեսանկյունից էլ ցույց է տալիս, թե որքան մեծ էին այն բարեպաշտությունն ու գթասիրությունը, որով Աստված մեր նկատմամբ իր ունեցած սիրո մեջ բարեհաճեց ընդունել, որ մեր բնությունը միանա իր բնությանը և նրա հետ դառնա մեկ: Գոհություն Աստծուն իր անպատմելի բարության համար:

Բայց կարծում եմ արդեն բավական է: Այսուհանդերձ, քանի որ Սեվերիոսը բառերից այն կողմ չի անցնում և աստվածասիրությունը տեսնում է միայն խոսքերի և հնչյունների մեջ, հակառակ Առաքյալի այն խոսքին, թե՝ «Աստծու թագավորությունը ոչ թե խոսքերի մեջ է, այլ՝ զորության և ծամարտության մեջ», և քանի որ Սեվերիոսի համար լավագույն աստվածաբանը նա է, ով լավ է մարզ-

ված Արիստոտելի ստորոգությունների և Հեթանոսական փիլիսոփայության այլ խրթնաբանությունների մեջ, ստիպված ենք, երբ որ ժամանակը դա, բառ առ բառ լուսաբանել Սեփերիսին ուղղված մեր պատասխանի մեջ գործածված եզրերի նշանակությունը՝ հետևելով մեր Եկեղեցու վարդապետների կողմից տրված իմաստին: Այսպիսով ընթերցողները, կարդալով նրանց աշխատությունները, առաջին իսկ հայացքից կկարողանան ըմբռնել դրանց իմաստը, և գործածված եզրերի նշանակությունը չիմանալը ամենևին չի խանգարի նրանց հասկանալ այն գաղափարների իմաստը, որ պարունակում են այդ աշխատությունները:



ԾԱՆՈԹԱԳՐՈՒԹՅՈՒՆՆԵՐ

- 1 Բառացի՝ հունական աշխարհում:
- 2 Անոնեականներ՝ Եվնոմիոսի հետևորդներ, որոնք դավանում են խստակրոն արիոսականությունը (Աստված մեկ է և անպտուղ: Որդին չի կարող ննան լինել նրան):
 - Մանիքեականները հետևում են երկարմատյան աղանդին (Երկու սկիզբ՝ մեկը լավ, մյուսը՝ վատ. պատմության ընթացքում մանիքեականները անվերջանալի պայքար են մղել քրիստոնեական ծշմարիտ վարդապետության դեմ):
 - Մարկիոնը, Վալենտիանոսը, Վասիլիկեսը դավանում են գնոստիկականությունը (Երկվություն բարի և անհասանելի Աստծու և մի շարք բխումների միջև, որոնք հանգում են աշխարհին և օյութին, որը վատ է՝ զստ նրանց սահմանանան):
- 3 Սաբելականություն - Սաբելիոսի (Գ դար) ուսմունքը, որը հաստատում է, թե աստվածային երեք անձերը հստակորեն չեն տարբերակված իրարից:
- 4 Գրիգոր Նյուսացին հնարավոր է համարում բազմաստվածյանին բերել այն բանին, որ նա ընդունի միակ Աստծուն:
- 5 Ամբողջ հարցը հետևյալի մեջ է. Երեք աստվածային անձեր, բայց մեկ բնություն «առանց շփոթելու անձերը, առանց բաժանելու գոյացությունը»:
- 6 Խոսք՝ հունարեն Logos, լատիներեն Verbum: Գրիգոր Նյուսացին մեկնում է խոսք հասկացությունից, որը գործածական էր հունական փիլիսոփայության մեջ՝ ցույց տալու համար միջին մի եզր Աստծու և աշխարհի միջև: Նա միաժամանակ աշխատում է ընդունելի դարձնել Բանի (խոսքի) մասնակցությունը հենց Աստծու խորհրդին և արարչագործության մեջ նրա միավորող դերին՝ ընդունելով հանդերձ պատկերի և բառերի սահմանները:
- 7 Այսինքն՝ բաժնեկից է Աստծու անբաժանելի միությանը, նույնը և Յոր բնությունը: Որպես այրափիսին նա կյանք է, գորություն է, ինչ որ ցույց է տալիս արարչագործության մեջ:
- 8 Նյուսացու պաշտպանած և կրկնած հիմնական դրույթը, որը

- խգում է իր կապը ամեն տեսակի մանիքեականության, ամեն տեսակի երկակիության, ինչպես նաև պլատոնական իդեալիզմի հետ, որը մեղանչական է համարում մարմինը և նյութը:
- 9 Քարաբերություն, որ գոյություն ունի Բանի և Հոգու միջև՝ Յոր համեմատությամբ:
- 10 Հրեաներն օգտագործում են շրջասություններ՝ ցույց տալու համար միակ Աստծուն. ինչպես՝ Իմաստություն, Տեր և այլն, որպեսզի չանվանեն անանվանելուն: Նրանք տարբերություն չեն դնում Տիրոջ և Աստծու միջև:
- 11 Սուբյեկտը այն է, որով հաստատում են ինչ-որ բան: Հոգեբանության մեջ նա տարբերվում է այն առարկայից, որ ճանաչում է, և այն ունակությունից, որը թույլ է տալիս նրան ճանաչել:
- 12 «Հոգի» բառը հունարենում, ինչպես և եբրայերենում, սկզբնապես նշանակել է «շունչ», «քամի», մասնավորապես «կյանքի շունչ»: Ակնարկություն արարչագործությանը (Ծննդ. 2, 7): Հովհաննես Ավետարանիչը մեկնում է այդ նույն պատկերից՝ բացատրելու համար Հոգու դերը (Հովհ. 3, 8):
- 13 «Տնտեսություն» բարի վերաբերյալ տե՛ս ՆԲՀ :
- 14 Նկատելի է Նյուսացու ոչ այնքան հակածառական, որքան առաքելական մտահոգությունը:
- 15 Սա հունական աստվածաբանության, կապադովկիացիների և Հովհաննես Ոսկեբերանի նախասիրած թեման է, այսինքն՝ արարչագործությունը և մարդը աստվածային սիրո արդյունքն են:
- 16 Աստված ստեղծում է, որպեսզի մարդուն մասնակից դարձնի իր անչափելի հարստություններին: Աստված բաշխված է ինքն իր մեջ և իրենից դրւու: Այս իմաստով մենք հեռու ենք Աֆրետ որ Վինյիի «աստվածային Մենակյացից»:
- 17 Պլատոնից հետո (Տիմէ 45) Նյուսացին մտածում է, որ աչքը պարունակում է լուսավոր տարրեր, որոնք նրան ընդունակ են դարձնում դեպի իրեն ձգել դրսից եկող լույսը:
- 18 Մարդու խորունկ ցանկությունն իրենից չի բխում, այլ դա նրա մեջ դրված է Աստծու կողմից:
- 19 Մեկնելով այն մտքից, որ Արարիչն ու մարդը ունեն նույն բնությունը, Նյուսացին հանգում է պատկերի և նմանության աստվածաշնչական թեմային, որը առանցքն է կազմում հունական ամ-

- բողջ մարդաբանության: Տես «Մարդու ստեղծման մասին» աշխատությունը, որի ամփոփումն է տրված այստեղ:
- 20 Նյուսացին հավատարիմ մնալով Աստվածաշնչին՝ չարի ծագումը չի փնտրում Աստծու մեջ: Սյուս կողմից նա հաստատում է, որ մարդն աստեղծված է ազատ և ընդունակ է ընտրելու, ինչը նրան թույլ է տալիս շեղվել բարուց և ընտրել չարը: Եվ սա բացառում է ամեն տեսակի դետերմինիզմ:
- 21 Չարի այս ընթրումը վերագրում են Որոգինեսին, որն իր հերթին այն վերցրել է Պլատոնից:
- 22 Հոգևորն ի հայտ է գալիս որպես մի բան, որ միաժամանակ թե՛ բարձր է և թե՛ ցածր՝ զգացականի համեմատությամբ: Բայց զգայարաններն այն «նշանաձողերն» են, որոնք թույլ են տալիս, որ տեսանելին խորապես թափանցի Անտեսանելիի մեջ:
- 23 Բառացի՝ «դավակցություն» ամեն ինչի: Ստոյիկյան եզր: Զգացական աշխարհի լինելությունը, «որպես իր անհուն շարժման արդյունք, դուրս է բերում ոգեղեն չգիտեն ինչպիսի մի բան, որ օրենք է, կարգ, կշռույթ, երաժշտություն»: Urs von Balthasar <Présence et pensée>, p. 20.
- 24 «Խաւանուրդ», բայց այնպիսի մի կարգի մեջ, երբ նյութը և զգայականը ոգեղենի մեջ են գտնում իրենց իմաստը, իրենց ավարտը և իրենց փոխակերպությունը, երբ ոգեղենն ինքն իր արմատներն է խորամխում նյութականության և ժամանակի մեջ: Առանց այդ ոգեղեն բացվածքի «կույրերի նման պատերի երկայնքով խարխափում ենք դեպի դուռը»: Ոգեղենն է բացում դուռը:
- 25 Որոգինեսի համաձայն, իրեշտակները նախազահում են 4 տարրերին՝ հող, ջուր, օտ և կրակ, որոնք կազմում են տիեզերքը: Մարդ արարածի ծնունդը չի իրագործվում առանց այդ տարրերի:
- 26 Ծննդոց գրքի նման Նյուսացին ևս անկում կրած և նախանձուտ իրեշտակների գոյությամբ է բացատրում մարդու փորձության և անկման գլխավոր պատճառը: Նա անելությունից ենթյան է անցնում Աստծու կամքով: Ուստի, փոփոխությունը նրա կառուցվածքի մեջ է: Նրա բնությունը ևս կոչված է մշտնշենապես փոփոխվելու դեպի լավը կամ վատը, ինչ որ կազմում է նրա ուժականությունը և ոյուրագայթությունը:
- 27 Նյուսացու նախասիրած թեման:

- 28 Թվացածին հակառակ, Նյուսացին չի իդեալականացնում առաջին մարդուն: Լինելության և պատմության նակարդակի վրա «առաջին մարդը ավելի մարդ չէր, քան վերջինը»:
- 29 Անկումը առաջ է գալիս լուցիֆերյան (Սատանայի) հրապուրանքից և ոչ թե նյութի ու զգայականի մեջ խրվելուց, ինչպես մտածում էին հույն փիլիսոփաները: Աստվածաշունչը հեղինակին հեռացնում է պլատոնյան փիլիսոփայությունից:
- 30 Աստվածաշունչն արդեն պատասխանել էր այս առարկությանը, որը տարածված էր արևելյան միջավայրում, ընդունում էր վաստ սկզբնապատճառ և մեղավոր էր համարում Աստծուն ու նրա գործը. մեղքը առաջ է գալիս ազատ մարդու պատասխանատվությունից, որը մոլորության մեջ է ընկնում Փորձիչ կողմից: Մանիքեականները որդեգրել էին այս դրույթները (տե՛ս հմր. 2 ծանոթագրությունը):
- 31 Ի հակադրություն հունական փիլիսոփայության և մանիքեականության, որոնք չարը համարում էին սկզբնապատճառ՝ կապված նյութին, կամ նրան վերագրում էին մշտնշենակից մի գոյություն, Գրիգոր Նյուսացին հաստատում է, որ չարն ինքնին գոյություն չունի, նա բարու բացակայությունն է միայն: Չարը գոյություն ունի միայն մարդու մեջ և մարդով:
- 32 Նյուսացու վարդապետությունը մոտենում է Իրինեոսի պատկերացմանը, երբ Աստծու ծրագիրը հաղթում է մեղքի և մահվան դժբախտություններին և մարդկությանը տանում իր վախճանին և երկնային երանությանը:
- 33 «Կաշվի զգեստները» խորհրդանշում են անցողիկ, անցումային մի վիճակ, որից նորընծանները մերկանում են՝ վերագրուելու համար սկզբնական մաքրության վիճակը (Կարդինալ Դանիելու, «Պլատոնականություն և միստիկական աստվածաբանություն» (Փրանս.), էջ 30):
- 34 Մեղքը կարող է աղոտացնել, ծածկել մեր մեջ Աստծու պատկերը, բայց չի կարող այն պոկել մեր միջից: Այդ պատկերը մնում է թաքնված: Աստծու շնորհը թույլ է տալիս նորից այն երևան բերել:
- 35 Այս պատկերը կատարելապես անաղարտ է պահում միությունը մարդու մեջ և նրա առաջընթաց կերպարանափոխությունը մաքրագործումների միջոցով մինչև նրա ավարտուն գեղեցկությունը:

- 36 Նյուսացին վերադառնում է իր ամենակարևոր տեսակետին. չարը, մեղքը պետք է փնտրել մարդու կամքի և ազատության մեջ:
- 37 Տե՛ս հմր. 26 ծանոթագրությունը:
- 38 Մենք այստեղ դարձյալ գտնում ենք հունական աշխարհի, Ցելսուսի, Պորֆիրիի հիմնական առարկությունը քրիստոնեության դեմ՝ մարդեղության պայմաններ, ֆիզիկական կյանքի, տառապանքի, մահվան նվաստություն և այլն:
- 39 Այլ խոսքով՝ լինելությանը ենթակա մարդկային վիճակը չարիք չէ, այլ բարիք: Ժամանակն Աստծու կողմից տրված շնորհ է: Այստեղ Նյուսացին միանում է պատմության Իրինեոսյան ընթանանը:
- 40 Նյուսացու դիտավորությունն է եղել հավատի մի ձեռնարկ հորինել և ոչ թե աստվածաբանական մի տեսություն առաջադրել կամ վիճարկելի հարցեր շարադրել:
- 41 Քրիստոսի մարդկային կյանքի և գործունեության բարձրակետը նրա հարությունն է: Դա այն հիմնաքարն է, որը վեր է պահում Աստծու ամբողջ տնտեսությունը: «Առանց բացառելու մարդեղությունը, ոչ էլ Տիրոջ կյանքը ամբողջությամբ վերցրած, որն անհրաժեշտ է հեղաշրջելու համար մարդկային կյանքը, հարությունը ցույց է տալիս այն ճիշտ կետը», ուր մեղքի արմատները պոկված են, մահը՝ պարտված, և կյանքը հաղթանակում է վերջնականապես:
- 42 Շատ զարմանալի է, որ Քրիստոնեականում միայն մեղքով է պատճառաբանված մարդեղությունը:
- 43 Տե՛ս հմր. 15:
- 44 «Այցելությունը» արտահայտում է Փրկչի գալուստը, մասնավորապես Ղուկաս ավետարանչի մոտ (Ղուկ. 1:68-78, 7:16-19, 44. Գործը, 15:14):
- 45 Այստեղ կրկին երևում է հունական աստվածաբանության հիմնական դրույթը, որը հիմնովին տարբերվում է ամեն ձևի դուալիզմից և մանիքեականությունից: Կրաքազգործությունը, նյութը, մարմինը ի բնե բարի են: Չարը «մարդու սրտի» մեջ է:
- 46 Տե՛ս հմր. 41:
- 47 Նյուսացին մի ուրիշ տեղ գրում է. «Բանը, մարմնավորվելով, խանվեց մարդուն և իր մեջ առավ ամբողջ մեր բնությունը, որ-

- պեսզի մարդկայինը հավերժանա Աստծու հետ այդ խառնուրդով: Մեր բնության խմորը ամբողջապես սրբացվեց Քրիստոսով՝ ստեղծագործության երախայրիքով»:
- 48 Խոսքը վերաբերում է Նյուևացուն ծանոթ այն երկրին, որը սահմանափակվում է Սիցերկրականյան աշխարհով: Ավետարանի արագ տարածումը միշտ էլ ապշեցրել է հեթանոս մարդկանց: Նյուևացին նրանց անընդհատ պահել է իր ուշադրության կենտրոնում:
- 49 Բնագիրն ակնարկում է տաճարի հրդեհը, երբ Երուսաղեմը գրավվում է հռոմեական բանակի կողմից, և վերջ է դրվում հրեական պաշտամունքին և Աղրիանոս կայսեր հրամանգրին 134 թվականին:
- 50 Հեղինակն այստեղ ամփոփում է նախապես վերևում հաստաված նախադրյալները (հնր. 26 ծանոթագրությունը):
- 51 Խոսքը Եղովանու «Ծունը և իր օրաբաժնը» առակի մասին է: Ֆրանսիացի առակագիր Լա Ֆոնտենը, ներշնչվելով դրանից, գրել է իր «Ծունը, որը բաց է բողնում իր որսը՝ խարվելով նրա ստվերից» համանման առակը:
- 52 Երկու լրացուցիչ հաստատում. մարդը խարվեց, որովհետև փորձիչը ձկնորսի նման նրանից թաքցրեց արատի կարք՝ որոգայթը, իբրև խայծ: Այս դեպքում նա Դևի զոհ է: Բայց միևնույն ժամանակ նա պատասխանատու մի զոհ է, որովհետև օժտված է ազատ կամքով:
- 53 Հասկանալու համար Նյուևացու մտածելակերպի գարգացումը՝ մի կողմից պետք է մտքում պատրաստ ունենալ մեղավոր մարդու գերության աստվածաշնչական պատկերը, ինչպես նաև Պողոս առաքյալի վարդապետությունը, ըստ որի ընկած մարդը Ենթակա է Դևի իշխանությանը, իսկ մյուս կողմից՝ Տիրոջ խոսքը, որտեղ ինքն իր մասին ասում է, թե «Վիրկագին» է մեղավորի համար (Մարկ. 10, 45): Որոգինեսը, որին հետևում է մեր հեղինակը, կառուցել է վիրկագին կամ վիրկության մի տեսություն, որով մարդը ձևականորեն դառնում է Դևի սեփականությունը: Փրկագործությունը ներկայացված է որպես մի տեսակ առևտրական գործառնություն Քրիստոսի և Դևի միջև: Քրիստոս իր կյանքն է տալիս մարդկության փոխարեն, որին սատանան պահում է իր բանտարկյալ:
- «Դևին վճարված իրավունք» հասկացությունը գոյություն ունի լատիների՝ Ամբրոսիոսի, Օգոստինոսի, Լևոն Ա-ի մոտ: Յուլյների մոտ Աթանասը դա չի ընդունում: Գրիգոր Նազյանցացին նույնպես դա մերժում է՝ ասելով, որ վիրկագին տրվեց ոչ թե սատանային, այլ՝ Աստծուն (Տես «Փրկության խորհուրդը» (Փրանս.), Պլոն իրատ. Փարիզ, 1954, էջ 112-115: Տես նաև սույն աշխատությունը, գլ. 26):
- 54 Կա միաժամանակ աստվածային զորության փառահեղ մի ներխուժում վիրկության պատմության մեջ, որը երկարածզվում և ավարտվում է Քրիստոսի հրաշներով, որտեղ Աստված ինքն է հաստատում իր բարեհած ներկայությունը: Սա հնագույն քրիստոնեականի դասական մի թեմա է:
- 55 Սա մարդեղության հնագույն, բայց վիճարկելի ներկայացումն է որպես խորամանկ մի միջոցառում դևին հաղթելու համար:
- 56 Այսինքն՝ Քրիստոսից իր մարդկային բնության մեջ:
- 57 Այստեղ Նյուևացին բաժանում է Որոգինեսի գաղափարը Սատանայի դարձի վերաբերյալ, գաղափար որին, վերջերս կրկին անդրադարձավ Պապինին:
- 58 Հեղինակն ակնարկում է հրեշտակների կամ ոգիների աշխարհը, որ հները երևակայում են, թե գտնվում է Աստծու և Երկրի միջև:
- 59 Որտեղ ցանք է գտնվում, պետք է, որ Աստված այնտեղ լինի: Նյուևացին մի այլ տեղ ասում է. «ևս մեր մեղանչական բնությունն ստացավ՝ կատարյալ դարձնելու համար այն, ինչ անկատար էր, և առողջացնելու համար այն, ինչ խաթարված էր»:
- 60 Նյուևացու համար տարբերությունը գտնվում է ոչ թե մարդու և Երկնային աշխարհի միջև, այլ՝ ստեղծվածի և Անստեղծի միջև: Բոլոր ստեղծվածները, ներառյալ հրեշտակներն ու Երկնային ոգիները, գտնվում են արարածների նույն կարգի մեջ:
- 61 Սա հույն փիլիսոփաների, ինչպես նաև Ցելսի և Պորֆիյուրի հիմնական առարկությունն է, որը առաջ է գալիս արմատական մի դուալիզմից, ըստ որի մեղանչական է համարվում նյութը, մարմինը, սեռականությունը, ժամանակը մանիքեականության, ինչպես և պլատոնականության մեջ: Սա իր հետքերն է թողել քրիստոնեական ոգեկան կյանքի մեջ:
- 62 Տես վերևում գլ. 5 և 6:
- 63 Առարկություն այն բանի դեմ, որ կոչել են «պլատոնական պահ-

- պանողականություն», այսինքն՝ բամտի նման ինքն իր վրա փակված ժամանակի շրջանաձև հասկացություն, ի տարերություն ժամանակի «գծային»՝ տևողական հասկացության, որն ընդգրկում է դարեր և ունի զարգացում և վախճան: Տես Յ. Դը Լյուբակ, Կաթոլիկություն, (Փրանս.), էջ 185-190:
- 64 Նյուևացին անդրադառնում է մի թեմայի, որ նրան թվում է հիմնական, և որի վրա նա տարածվելու է 31-րդ գլխում:
- 65 Հունարեն բնագրի վիճակն այնպիսին է, որ ներկայացնում է որոշ անկապակցություն և պահանջում մեկնաբանություն: Մենք հետևել ենք գերմանացի թարգմանիչ Յայդի 1874 թվականի առաջին թարգմանությամբ:
- 66 Յեղինակն ի մտի ունի հարության վերաբերյալ տարբեր պատմություններ, որոնք միացնում է իրար. (Եղիսեն և սունացի կնոջ որդին (Գ Թագ. 4:34), Քրիստոս ինքը իշխանավորի (Յայրոսի) աղջկա հետ (Մատթ. 9, 25, համեմատ. 12, 23):
- 67 Այն հիմնական սկզբունքը, որին Նյուևացին անդրադարձել է այլուր, ինչպես իր ճառերից մեկի մեջ, ուր ասում է. «Քանի որ Քրիստոսը բոլորի մեջ է, նա իր իսկ անձի մեջ է ընդունում բոլոր նրանց, ովքեր հաղորդությամբ միացել են իր մարմնին, այնպես որ բազմաթիվ անդամները լինում են մեկ մարմնին: Նա բոլորին միացնելով իրեն ու այդպես մեզ հետ դաշնալով մեկ՝ իրն է դարձնում ամեն ինչ, որ մերն է»:
- 68 Յամենտ. Վերևում գլուխ 25:
- 69 Յեղինակը երկար կանգ չի առնում խաչի վրա, որպես կախաղանի, այլ, ըստ հնագույն ավանդության, նրա մեջ տեսնում է կենաց ծառը կամ տիեզերական այն խորհրդանշանը, որի մասին արդեն պարզաբանել էր Սուրբ Իրինեոսը՝ նշելով. «Խաչվեց Աստվածորդին այդ չորս թերի վրա, նա, որի խաչածն դրոշնը տիեզերօն արդեն կրում էր իր վրա: Նա անցնում է անսահման տարածությունը և ամեն կողմ ցրված մարդկանց հրավիրում ճանաչելու իր Յորը»: Առաքելական քաղոզություն, 34: Եկեղեցն Յայրերը հավատի մեջ, էջ 43:
- Այս թեման մեկնաբանված է անանուն մի ճառի մեջ. «Անսահման, ինչպես երկնակամարը, իմ ծառն իշխում է երկրից մինչև երկինք: Նա տիեզերքի հենայունն է, ամեն ինչի խարիսխը, երկրի ատաղձը, աշխարհի հանգույցը, որը հավաքում, հանախմբում է բոլոր մարդկանց: Նրա ճակատը դիպչում է երկնքի

բարձունքին, իսկ մեջտեղում նրա տիտանական թևերը թափահարում են օդի շերտերը: Նա ամեն ինչ է, ամեն ոք է և ամենուր»: Զատկի խորհուրդը (Փրանս.) էջ 76:

70 Քրիստոսի վիրկական մարդեղությամբ ամբողջ ստեղծագործությունը հաշտվեց Աստծու հետ: Ընդունելով մեր մարմնավոր վիճակը՝ Քրիստոսը միացավ ամբողջ մարդկությանը և այդ կենսական միությամբ նրա ամբողջ մարմնին հաղորդեց շնորհ, հարություն և աստվածացում՝ «այսպիսով բոլոր մարդկանց և նրանց միջոցով ամբողջ ստեղծագործությունը միացնելով իրեն»:

71 Զատեռը է աչքարող ամել, որ Նյուևացին նախնական մի քրիստոնեական է գրում նրանց համար, ովքեր, անորոշության մեջ լինելով, հարց են տալիս իրենք իրենց քրիստոնեական հավատի և այն արտահայտող ծեսերի մասին: Ակրնական երեք խորհուրդները՝ մկրտությունը, դրոշնը, հաղորդությունը, նրա մտքում հաջորդաբար նշում են հոգևոր կյանքի երեք էական հանգրվանները՝ մինչև միաստիկական կյանքի բարձունքը: Ժ. Դամիելու, Պլատոնականություն (Փրանս.), էջ 28:

Խորհրդական աստվածաբանությունը կապվում է վիրկական մարդեղությանը, երբ ամբողջ ստեղծագործությունը հաշտցվում է Աստծու հետ:

72 Յնագույն աստվածաբանության համար ջրի վրա կատարվող աղերսը կամ էպիկլեսիան * (ինչպես հացի և գինու վրա կատարվող աղոթքը) ունի սրբագրություն արժեք և նյութին հաղորդում է իր սրբարար զորությունը: Տերտուղիանոսն արդեն ծանոթ էր այդ աղերսին: «Յոգին, - զորում է նա, - կանգ է առնում ջրի վրա, որ սրբագրություն է իր ներկայությամբ, և այդպես, սրբագրործված լինելով, իր հերթին այն տոգորվում է սրբագրութելու կարողությամբ»: Տերտուղիանոս, Մկրտության մասին, 4:

Սուրբ Զատկի նախատոնակին նվիրված արարողության մեջ պահպանվել է այս սրբագրությունը: Աստվածային զորության միջամտությունը բացառում է այս խորհրդին առնչվող մոգական ամեն գաղափար:

* Էպիկլեսիա (հունարեն՝ *ερικλεσίς*) նշանակում է աղերսամք, խմելքածք: Սա արևելյան եկեղեցական արարողություններին մաս կազմող մի աղոթք էր, որը կատարվում էր սուրբ Յաղորդությանը:

յան կարգին նվիրված խոսքերից ամմիջապես հետո և որով աղա-
շանը էր ուղղվում Սուլր Յոգուն, որ իշներ խորանի վրա և հացն ու
գինին փոխարկեր Փրկչի մարմնին և արյանը (Ծնթ. թարգմ.):

- 73 Մարդեղությունը բանալին է ամբողջ ապացուցման: Այն օդակ է ծառայում ստեղծագործության մեջ Աստծու Բանի (խոսքի) մի-
ջոցով աստվածային զրության հայտնության և փրկության
գործի միջև: Յամաշակություն և շարունակականություն կա
ստեղծագործությունից դեպի Մարդեղություն և Մարդեղությու-
նից դեպի շնորհների խորհրդական ազդեցություն, ուր ամենու-
րեք հայտնվում է Աստծու բարերար զրությունը:
- 74 Յնադարում քրիստոնեությանն ընծայվող մերկ երեխան երեք
անգամ թաթախվում էր ջրի մեջ հանուն Յոր, Որդու և Սուլր Յո-
գու: Նախապես Սուլր Երրորդության գաղափարի հետ կապ-
ված այս ծեսը հետագայում շեղվում և ստանում է քրիստոսա-
բանական բացատրություններ՝ արտահայտելու համար Քրիս-
տոսի մահը և հարությունը, որն այդ ծեսին տալիս է առանձնա-
հատուկ կշիռ և նշանակություն:
- 75 Երկու համեմատություններ բացատրում են, թե ինչ բանի մեջ է
կայանում Քրիստոսին ընդորինակելը. առաջին՝ ռազմական
վարժությունը, որը գինվորներին սովորեցնում է գինվորական
քայլվածքը զորավարի ետևից, և երկորդ՝ այն առաջնորդին, ո-
րը մեզ օգնում է դուրս գալու լաբիրինթոսից:
- 76 Յովուների մոտ ստեղծագործությունը կազմող չորս տարրերից
ջուրը և հողը, ըստ Արիստոտելի, անբաժանելիորեն միացած են
իրար: Նյոււացին այստեղ մի ակնարկ է նետում զարգացած հա-
սարակության վրա:
- 77 Պողոս առաքյալի քննության առած նյութի (Յուն. 6, 5) մի քիչ
խրթին բացատրությունը, որը նախապես շարադրված է Կյուրեղ
Երուսաղեմացու կողմից, և որի մասին Նյոււացին մի այլ տեղ
արտահայտվում է ավելի պարզ կերպով՝ նշելով. «Երբ
մկրտչում ենք, մենք ընդորինակում ենք մեր Փրկչին, մեր Տիրո-
ջը և մեր Առաջնորդին. մենք չենք թաղվում հողի մեջ, այլ
մտնում ենք հողին մերձավոր տարրի՝ ջրի մեջ, մենք ընկոմվում
ենք այնտեղ, ինչպես Տերը՝ հողի մեջ: Այդպես անելով երեք ան-
գամ մենք հայտնում ենք երեք օրից հետո տեղի ունեցած հա-
րության շնորհը»: Մկրտություն, էջ 158:

78 Յննտ. գլ. 8: Նյոււացին այստեղ հեռանում է Որոգինեսից և
ներշնչվում Օլիմպիացի Մեթոդիոսից, որը մարմնի մասին ունի
ավելի ռեալիստական և մահվան մասին ավելի կառուցղական
գաղափար: Նա մահը համարում է անցում դեպի վերանոր-
գում: Կավե անոթի համեմատությունը գալիս է Մեթոդիոսից:

Ազատ կամքն է պղծում մարմնին և ոչ թե հակառակը, ինչ-
պես այդ ուզում էր ներկայացնել իշխող պլատոնականությունը:
Յննտ. գլ. 8: Ինչ էլ որ լինի, մարմնի և հոգու միությունը վերա-
կազմվում է հարության մեջ:

79 Մարդու կյանքի վերջնական վիճակն է, որը ծննդից գնում է դե-
պի մահ մարդկային բնության փոփոխությունների և թուլութ-
յունների միջով: Քրիստոսի հարությունն սկզբնավորում է Աստ-
ծու զրության հետ վերջնական, անքակտելի միավորումն այն
բանի, որ մի ժամանակ խզված և բաժանված էր եղել: Յարութ-
յունն է (և ոչ թե մահը) վախճանը:

80 Մկրտության շնորհը մեզ չի տալիս Քրիստոսի կատարյալ մե-
ծությունը, ուա մի սերմ է, որ զարգանում է աստիճանական հա-
սունացումն՝ ենթակա այլ և այլ փորձությունների, կրթերի և
շարունակական մաքրագործման:

81 Յովիան Ուսկերերանն այս բանը բացատրում է ավելի պարզ
կերպով՝ նշելով. «Խսաչը և գերեզմանը ինչ որ եղան Քրիստոսի
համար, նույնն է մկրտությունը մեզ համար, բայց ոչ նույն տե-
սանկյունից. նա մեռավ և թաղվեց մարմնով, մենք նույն բանը ե-
ղանք մեղքի վերաբերմամբ»:

82 Փրկարար մահվան ուժականությունը, ինչպիսին է մկրտությու-
նը, որը մեկ և մյուս կողմից հաղթականորեն մեզ տանում է դե-
պի կյանք. մկրտության ավազանը, ըստ քրիստոնեական հնա-
դարում տարածված մի ըմբռնան, միաժամանակ թե՛ գերեզ-
ման է և թե՛ մայր: «Մեր ծնունդը զուգադիպում է մեր մահվան»,
- ասում է Կյուրեղ Երուսաղեմացին:

83 Այստեղ Նյոււացին, Որոգինեսին հետևելով, նկատի ունի կրա-
կով մաքրագործման անհրաժեշտությունը մահվանից հետո բո-
լորի համար, որը դեռևս քավարանին վերաբերող մեր վարդա-
պետությունը չէ:

84 Նյոււացին մի այլ տեղ բացատրում է, որ մկրտված մարդու մեջ
կատարված փոփոխությունը հսկայական է լինում: Այդ մասին
նա նշում է. «Մահկանացու վիճակից նա դառնում է անմահ,

կորնչական վիճակից՝ անկորնչական, անցավորից՝ հավիտենական և մեկ բառով ամեն ինչ ասելու համար՝ մարդուց նա դառնում է Աստված»: Երանություններ, 7:

85 Նյուևացին Յաղորդության խորհրդին մոտենում է մի քիչ շփոթեցուցիչ ձևով: Դա բխում է իր մերողից, այն է՝ ընդունելի դարձնել քրիստոնեական խորհրդով: Նա Արիստոտելից փոխ է առում նրա սննդառության տեսությունը ցույց տալու համար Քրիստոսի մարմնի և արյան խորհրդական ազդեցությունը՝ իր մտքի առաջ ունենալով այն մարդկանց, որոնք ծանոթ էին հունական փիլիսոփայությանը:

86 Թույնի և հակարույնի պատկերը, որ Յառնակը* արհամարհանքով որակում է որպես «դեղագործական բացատրություն», ուսուցանում է մեզ, որ մարդու անկունը մարդկության մեջ մտցրել է մահվան սերմը: Ստանձնելով մարդկային նույն բնությունը՝ Քրիստոս մարդկության մեջ մտցրեց կյանքի սերմը և ուժը, որը հաղորդ է մահվան և հաստատում նրա վերամիավորման, նրա անապականության սկիզբը: Իգնատիոս Անտիռքացին հաղորդությունը կոչում էր «անապականության դեղամիջոց»: Եփեսացիներ, 20, 2:

* Յառնակ, (1851-1930) - Գերմանացի լուուրական աստվածաբան: Եղել է դասախոս, ապա Բեռլինի գիտությունների ակադեմիայի անդամ: Երիտասարդ հասակում եղել է ռացիոնալիստական դպրոցի ղեկավար (Ծն. թարգմ.):

87 Ինչպես որ հացը սնեց Քրիստոսին և ապրեցրեց նրան, այնպես էլ խորհրդական հացը մեզ տալիս է անմահության սնունդ, որը ոչ միայն ապրեցնում է մեզ, այլև հաղթել է տալիս մահվան շնորհիվ անապականության խոստումի:

88 Նյուևացին ավելի ճառում է, քան բացատրում, թե ինչպես բաժանված հացը մնում է անբողջական: Նա առաջադրում է հարցը առանց պատասխան տալու դրան:

89 Յաղորդության խորհրդով երկարածգում է մարդեղությունը: Նյուևացին այս մասին ավելի հստակ է արտահայտվում այլուր. «Քանի որ Քրիստոս բոլորի մեջ է, նա իր իսկ անձի մեջ ընդունում է բոլոր նրանց, որ միացած են իրեն իր մարմնի հաղորդությամբ: Նա բոլորին դարձնում է անդամներ իր սեփական

մարմնի, այնպիս որ բոլոր անդամները լինեն միայն մեկ մարմին: Այսպիս մեզ միացնելով իրեն և ինքն էլ միացած լինելով մեզ և ամեն ինչում դաշնալով մեզ հետ մեկ՝ նա իրն է անում ամեն ինչ, որ մերն է: Արդ, մեր բոլոր գործերի ամփոփումը մեր հնագանդությունն է Աստծուն, որը միաբանություն է հաստատում ամբողջ ստեղծագործության մեջ: Այն ժամանակ ամեն ծունկ խոնարհվում է երկնքում, երկրի վրա ու դժոխքում, և ամեն լեզու խոստովանում է, որ Յիսոս Քրիստոս մեր Տերն է: Այսպիսով, ամբողջ ստեղծագործությունը դաշնում է մեկ մարմնին, բոլորը պատվաստվում են մեկը մյուսի վրա, և Քրիստոս իրեն է բերում այդ մարմնի հնագանդությունը Յոր հանդեպ» (հատված՝ քաղված նրա քարոզից):

90 Նյուևացին հավանաբար ակնարկում է իր «Ընդդեմ Եվնոմիոսի»* հակածառությանը և «Որդու և Սուրբ Յոգու աստվածության մասին» վերնագիրը կրող ճառին:

*Եվնոմիոս (320-392) –Արիոսական եպիսկոպոս: Ուսուցանում էր, որ Բանն անբողջապես ստորդաս է Յորը: Նրա ազդեցությունն այնքան էր տարածվել, որ նրա սխալ ուսմունքի դեմ ստիպված եղան հանդես գալ Գրիգոր Նազիանզացին, Գրիգոր Նյուևացին և Եկեղեցու մյուս Յայրերը: Եվնոմիոսի կրօսու հակածառությունները պատճառ դարձան, որ նա աքսորվի բյուզանդական կայսերական իշխանության կողմից:

91 Նյուևացուն շատ ծանոթ թեմա, որի վրա նա ավելի հանգամանորեն կանգ է առել վերևում (տես գլ. 6):

92 Նյուևացին ակնարկում է բոլոր նրանց (Արիոս, Եվնոմիոս), ովքեր մերժում էին նախ՝ Քրիստոսի, ապա՝ Սուրբ Յոգու աստվածությունը:

* Նիկողեմոս - Վարիսեցի իշխանավոր, որ ապրում էր Քրիստոսի ժամանակ: Մի գիշեր ծածուկ նա գնում է Յիսուսի մոտ՝ տեսակցելու նրա հետ: Այդ տեսակցությունը նրան մղում է դառնալու նրա աշակերտը և հետագայում ստանձնելու նրա պաշտպանությունը ժողովարանում: Յիսուսի մահից հետո նա Յովսեմի Արիմաթացու հետ գնում է Պիղատոսից խնդրելու նրա մարմնին գերեզման դնելու համար: Նիկողեմոսին է վերագրվում պարականոն մի ավետարան,

որը անցյալում կոչվել է «Գործք Պիղատոսի» և լուս է տեսել Դ դարի սկզբին (Ծնք. թարգմ.):

- 93 Մկրտությունն ու հաղորդությունը մեզ սովորեցնում են, որ հոգևոր կյանքը ներկայանում է միաժամանակ որպես բաժանում, զրկանք, ժուժկալություն, մահ, անցում մեկ վիճակից մյուսին, ներքին լուսավորություն, կենդանարարություն, նաև՝ վերընթաց և սպառիչ քայլ «դեպի անհունը հետզիետե ավելի մեծ բարձունքներ նվաճելով»: Նյուսացին այն համենատում է Մովսեսի կյանքի հետ:
- 94 Նոր ակնարկություն Աստծու պատկերին վերաբերող թեմային, պատկեր, որն անջնջելի է մարդու սրտում և որը պիտի առաջնորդի նրա վարքը: Նա է կազմում Աստծու զավակների կյանքի մոլիք ուժը և նրանց սովորեցնում ճգտել հասնելու Դոր բարձրությանը: Զարության ժամանակ, երբ վերանորոգված կլինի այդ նիստի պատկերը, մկրտության դրոշմով է, որ կճանաչվի մեր պատկանելությունը Քրիստոսի փրկված մարմնին: Մկրտությունն ըստ Եկեղեցու Հայութի, (Փրանս.), էջ 166:

* Զակրեոս – Մաքսավոր և հարկահավաք Երիքովում Քրիստոսի ժամանակ: Յիսուս տեսմելով նրա հավատը՝ այցելեց նրա տունը: Այցելության ընթացքում Զակրեոսը խորհի խայթ զգալով անցյալի իր անարդարությունների համար՝ խոստացավ իր ունեցվածքի կեսը տալ աղքատներին (Ծնք. թարգմ.):

- 95 Քրիստոնեական ավարտվում է վախճանաբանության կամ հավիտենականության պատկերացման վիրա, որը թաքրուն ուղեկցում է սույն ուսումնասիրությանը սկզբից մինչև վերջը, որովհետև Քրիստոսի միավորող գործը իր մարմնի բոլոր անդամներին նետում է «նորավագրի մեջ հասնելու համար այն երանական վիճակին, որն առաջարկված է ամեն դասի մարդկանց»: Օրիներգ, 15:

Քրիստոնյան ճանապարհ է ընկնում դեպի Երանություն, երբ հարուցյալ մարմինը կիազմի «մեր կյանքի մաքրությամբ հյուսված զգեստները»: Մելեցիոս*, Դամբանական ճառ:

Նյուսացու համար հավատն ամենից առաջ կյանքի վարդա-

պետություն է: Նա այս միտքն արտահայտում է գեղեցիկ մի պատկերով. «Ենթադրենք, որ մեկը երկար ժամանակ քայլում է ցերեկվա ուժեղ տապին զլուխն այրված արևի ճառագայթներից և մարմնի խոնավությունն ամբողջովին կլանված: Յոդը կարծր է նրա ոտքերի տակ, ճանապարհը՝ չոր և դժվարին: Յանկարծ նա հանդիպում է մի աղբյուրի, որի ջուրը հոսում է զուլալ և թափանցիկ: Առատահոս այդ աղբյուրը ասես մեղմորեն հրավեր է ուղղում նրան հագեցնելու իր ծարավը: Ի՞նչ եք կարծում, նա ակի մոտ նստելով կսկսի փիլիսոփայե՞լ նրա բնության մասին, մտորել, թե նա որտեղից է սկիզբ առել, ինչպե՞ս, ինչո՞ւ և մնացյալը: Ավելի շուտ, վանելով իր մտքից այդ բոլորը, նա չի կրանա մոտեցնելու համար իր շրբները ակնավճիտ ջրերին և շնորհակալություն հայտնելու Նրան, ով տվել է իրեն այդ պարգևը:

Ուրեմն, դու ել քո հերթին, ընդօրինակիր այդ ծարաված մարդուն»:

* Մելեցիոս (310-381) – Ընդհանրական Եկեղեցու մեծ հայրերից: 360թ. ընտրվել է Ամստիոքի պատրիարք: Յաստատակամորեն և հետևողական կերպով պայքարել է արիստականների դեմ, որոնց հովանավորողների կողմից երեք անգամ արսորվել է: Այդ պայքարի բովում առաջանում է Ամստիոքի հերձվածը, որը տևում է 85 տարի: 363թ. Մելեցիոսը նախագահում էր Ամստիոքի ժողովին, որի ընթացքում առաջին անգամ դատապարտվեցին արիստականները (Ծնք. թարգմ.):

* Ժան Պոլ Միմյը (1800-1875) – ֆրանսիացի ականավոր Եկեղեցական և մատենագիր: Նրա հրատարակած գործերից հայտնի են հատկապես 171 հատորներից բաղկացած աստվածաբանական բառարաններն ու համրագիտարանները և մանավանդ՝ «Յունական հայրաբանություն» և «Լատինական հայրաբանություն» բազմահատոր աշխատությունները (Ծնք. թարգմ.):

ԲՈՎԱՇԴԱԿՈՒԹՅՈՒՆ

<i>Ա. Գրիգոր Նյումանցի</i>	5
ՔՐԻՍՏՈՆԵԱԿԱՆ	
<i>Նախարան</i>	9
<i>Աստված մեկ է</i>	13
<i>Մարդը</i>	23
<i>Քրիստոսը</i>	47
<i>Ասրծու խորհուրդը</i>	62
<i>Տակառակորդների առարկությունները</i>	87
<i>Խորհրդական լյանք</i>	99
<i>Վերջնական նպատակ</i>	125
<i>Ծանոթագրություններ</i>	127
<i>Բովանդակություն</i>	142

Խմբագիր՝ Ասողիկ Եպիսկոպոս
Գեղ. Խմբագիր՝ Վետնդ քահանա
Շապիկը՝ Ա. Օհանջանյանի
Սրբագրիչ՝ Ս. Բովաթյան

